

ASO LULU, 19 MATI 2014

Na nofoia le Nofoa e le Fofoga Fetalai i le itula e 9:00 i le taeao.

Tatalo.

ISI FAASILASILAGA A LE FOGO FETALAI

FOFOGA FETALAI: E faatalofa atu i le paia ma le mamalu maualuga o le tatou Palemene i lenei taeao fou, e i ai le talitonuga o lea ua poto moli futiafu e tasi, o lea ua tatou toe potopoto i lenei taeao fou aua le faaauauina o le tatou galuega.

Ia viia pea le Atua i Lona alofa ma Lona agalelei, o lea ua vaai atu sulu o le tino o lea lava e agai mai le paia ma le mamalu o le tatou Maota i lenei aso, malo le usufono malo foi le onosai. E manatu o lo o tele ma anoanoai tuatuaanoa faale-Aiga faale-Malo, ia ae le mafai ona o lea ua uma ona faataoto galuega a le Palemene e ave i ai le tatou faamuamua aua le faatinoga o le tatou valaauina.

E faatalofa atu ai i le tulaga aloaia i le afio mai i lea tala na atoa i le paia o le tatou Malo, aemaise le paia ma le mamalu maualuga o sui usufono mamalu o le Palemene i lenei taeao.

E faatalofa atu foi i le paia ma le mamalu maualuga ua tatou faatasi i lenei taeao fou, le paia maualuga i tupu ma ee, o tamalii ma failauga, faletua ma taus, saoa ma tamaitai, o matua ma faiaoga, aemaise o alo ma fanau a lo tatou atunuu, pei foi o le aso ananafi, ia sa tatou potopoto uma ai ma Primary Schools uma mai le motu tele i Salafai. O lenei taeao o lea ua tatou faatasi ma Primary Schools i le motu nei i Tumua. E le toe tau faamatalaina o Polokalame Faalauiloa a lo tatou Palemene ina ia folasia i malae lo latou soifua aoaoina, aemaise le faatinoina o tulaga tau aoaoga o lo o mafuta faatasi ai le tatou Palemene ma le Matagaluega o Aoga ina ia o latou mautinoa ma iloa ona silafia lelei tulaga o tu ma aga a Palemene. E i ai le talitonuga ma faamoemoe, ia e le fai mo tatou le Maota nei, e alu aso ae sau aso, e i ai foi le vaiata i tupulaga lalovaoa o le atunuu, e latou te tulai mai foi e tauavea le atunuu, ae o lo o faapena ona latou vaavaai i faataitaiga lelei lea e tatou te faia atua.

O le agaga lona ma le faamoemoe o latou polokalame e omai e silasila ma vaavaai ma matamata, ia ma o latou maitau, pe faapei aga a le tatou Maota nei, latou te maitau ma silasila i tuleiga ma saunoaga mai lea sui usufono ma lea sui usufono ma Tualumaga a le tatou Fono e masani ai, ia o auga na o faamoemoe o lenei taeao.

E matou te ofo alofa atu ia ma faamanuia atu ia manuia lo outou alofaiva, aemaise o polokalame uma o le a outou feagai ai ma le Ofisa o le Fono ma le faamalalamaina o le manulauti na mafua ai ona tatou mafuta i lenei taeao.

E faapena foi ona ofo alofa atu ma faatalofa atu i le paia maualuga i Faauluuluga o Matagaluega ma Faalapotopotoga a le Malo ua tatou mafuta i lenei aso.

Samoa e le o galo lau tapuaiga i lenei aso o lo o tui mai pea le mulipapaga ma outou pati ma po ma sasa le fala e pei o le faiva i Poula, ia o lo o outou tapuaia pea faiva o lau Palemene. Tapuai maia, o manatu ma lagona e oo mai pea le faamafanafanaga o le tatalo e le aunoa, e manuia ai faiva a lou Palemene.

E pei lava o le tatou lafo na faatu i le aso ananafi, ia o lo o tele ma anoanoai le tatou galuega, a o le agaga foi ia, o lenei lava ua matua saausi lava le tatou faasoa. Ua matua tatala foi le avanoa e mafai ai ona tuuina mai fesili taitasi i so o se Tulafono faatoa tuuina mai i le Maota, Tulafono Toe Teuteu aemaise o tatou Tulafono ua pasia. E faapena foi ona tuuina atu le avanoa i le Malo, latou te talatala ma le la o latou finagalo, ina ia matua manino ma malamalama lelei tulaga o le tatou faamoemoe ma le faasologa o le tatou galuega.

E i ai foi nisi o taimi sa fai o pupuu a tatou aso Fono, ia a o le agaga o le Taitai o le Malo ma au nei, o le avanoa lenei o le tatou Fonotaga i le masina lenei, ua tataua ona faasolo ai le tatou galuega e faaumauma mea ia e taatitia i tua, ae tatou agai e tatou te talanoa i Lipoti fou ma Tulafono fou, o lo o talia e le Palemia ma le Kapeneta mo le faatinoina o le atinae, aemaise o le faagaoioiga o Komiti Faa-Palemene.

TUUINA ATU O LIPOTI A KOMITI FILIFILIA

Na tolaulauina e le Failautusi Lipoti a Komiti Filifilia nei ua faataatia i luga o le Laulau a Fono e tusa ai ma le T.T. 51(5).

1. P.P. 2013/2014 Nu. 128, Lipoti a le Komiti o Galuega, Felauaiga & Siosiomaga i le P.P. 2012/2013 Nu. 24, P.P. 2013/2014 Nu. 22 & P.P. 2013/2014 Nu. 23, Lipoti Faaletausaga a le Pulega o le Suavai mo le Tausaga Faaletupe faaiiina aso 30 Iuni 2010, 30 Iuni 2011 ma le aso 30 Iuni 2012.
2. P.P. 2013/2014 Nu. 129, Lipoti a le Komiti o Galuega, Felauaiga & Siosiomaga i le P.P. 2013/2014 Nu. 7, Faamatalaga o Sini Autu a le Pulega o le Suavai mo le Vaitaimi 2013-2015.
3. P.P. 2013/2014 Nu. 130, Lipoti a le Komiti o Ofisa o le Palemene i le P.P. 2012/2013 Nu. 74, Lipoti i le Palemene a le Ofisa o le Komesina o Sulufaiga e tau i le aso 30 Iuni 2012.
4. P.P. 2013/2014 Nu. 131, Lipoti a le Komiti o Oloa Gaosia Tulaga Muamua, Mataupu tau Pisinisi, Alamanuia ma Leipa i le P.P. 2011/2012 Nu. 85 & P.P. 2012/2013 Nu. 72, Lipoti Faaletausaga a le Matagaluega o Pisinisi, Alamanuia ma Leipa mo le Tausaga Faaletupe na faaiiina aso 30 Iuni 2010 ma le Tausaga Faaletupe faaiiina aso 30 Iuni 2011.

5. P.P. 2013/2014 Nu. 132, Lipoti a le Komiti o Mataupu tau Faamasinoga, Leoleo & Falepuipui ma Faamasinoga o Fanua ma Suafa i le P.P. 2013/2014 Nu. 49, P.P. 2013/2014 Nu. 50, & P.P. 2013/2014 Nu. 51, Lipoti Faaletausaga a le Pulega o Tineimu & Faalavelave Tutupu Faafuasei mo Tausaga Faaletupe 2009-2010, 2010-2011 ma le 2011-2012.
6. P.P. 2013/2014 Nu. 133, Lipoti a le Komiti o le Soifua Maloloina, Galuega tau le Va Fealoai, Mataupu tau Lotoifale ma Atinae o Afioaga ma Agafesootai i le P.P. 2013/2014 Nu. 42, Lipoti Faaletausaga a le Auaunaga Faa-Soifua Maloloina 2009-2010.

**TULAFONO TAU FAAOFI O TAGATA TOMAI TAU PALAMA 2013
– felafolafoaiga faaauau i luga o le faitauga faalua**

FOFOGA FETALAI: E tolopo a tatou galuega a le Fono Aoao i le po anapo o lo o saunoa le sui usufono mo Aana Alofi Nu. 3 i le Tulafono Tau Faaofi, ma o lea ou te toe tapa ai le sui usufono mamalu e tulai mai e faaauau le saunoaga.

Afioga TOEOLESULUSULU CEDRIC POSE SALESA SCHUSTER (Aana Alofi Nu. 3): Faafetai i lau Afioga i le Fofoga Fetalai mo le avanoa. E piiama foi se vaivaiga lau Afioga i le Fofoga Fetalai e tusa o lau talosaga molia i lo tatou Tapaau i le lagi, faapea ona fesoasoani mai Lona Agaga Paia e tautoalua ma i tatou a o feagai ai i le faatinoina o tatou tiute ma le valaauina aua se lumanai manuia o Samoa.

E le gata foi i lea lau Afioga, e avatu foi le piiama i lau saunoaga e faafeiloai ai e le gata o le tatou Maota nei i sui usufono taitasi, e le gata i lea o sui o Matagaluega, aemaise foi o alo ma fanau ua faapea ona tatou mafuta i lenei taeao, a o le seu faafogafoga a lo tatou atunuu o lo o taputapu mai i afioaga ma alaalfaga i tua.

Lau Afioga i le Fofoga Fetalai, e toe faaauau se faamatalaga e ala lea i le Tulafono Tau Faaofi o Tagata Tomai Tau Palama 2013. E pei ona ou taumafai atu i le afiafi anapo, e talitonu o se Tulafono taua lenei Tulafono, o se vaega foi e talitonu lou nei sui usufono, o le a mafai ai ona siitia ai le auaunaga foi a i latou o lo o i ai lenei tomai faapitoa. E pei ona saunoa le Afioga i le Minisita, o le auga o le faaleleia o nei auaunaga e le gata ina ia mafai ona faaitiitia le suavai maimau, a o le faia faalelei foi lea o tofaga aemaise o fale o le tatou Malo ina ia mafai ona lelei le lumanai.

O ni tuualalo lau Afioga i le Fofoga Fetalai e ala i le Tulafono, pei ona avatu se lagona, e talitonu o lo o i ai se vaega o le Tulafono o lo o faapea ona i ai ia exemptions, atonu pau lea o se vaega e mafai ona tagatagai ina ia mafai ona faaulu ai i totonu ia le tele o tatou palama foi po o i latou foi e le o mafai ona ausia ia faailoga, ae o lo o i ai le tomai faapitoa i le faatinoina o galuega, e le gata i totonu o afioaga aemaise o aiga taitasi, ona e i ai le talitonuga, e tele i latou foi o lo o i ai e mafai ona faatinoina lenei taleni, atonu e le mafai ona maua e i latou le tomai ma le faatinoina foi o qualification foi o lo o manaomia. E le gata i lea o le tele foi o i latou ua loa foi lo latou soifua ma ua faigata foi ona toe autovaa mai e faatinoina e le gata i le aperenitisi a o nisi o

aoaoga. A o le naunautaiga ina ia mafai ai e i latou ona faatino pea ia galuega, faapei o vai tumaoti i totonu o afioaga ma alaalfaga o lo o i ai Komiti o Vai, o i latou foi ia o lo o faia le tele ina faatinoina nisi o galuega, ona e le o oo atu i ai le malosiaga foi po o le faatinoina o le auaunaga a le Pulega o le Suavai.

Lua lau Afioga i le Fofoga Fetalai, pei ona saunoa le Afioga i le Minisita, e talitonu o se popolega po o se faanaunautaiga foi lea i lou nei sui usufono, ina ia faaleleia le auaunaga lea ona o le suavai maimau. O lea e maitau atu ua savali nei i le tolu tausaga o le tatou Paeaiga, ae o lea e silia lava ma le 66% le suavai maimau i le tatou Pulega o le Suavai. O le loto foi ma le naunautaiga o le fautuaga mai lea Pulega, a o le naunautaiga lau Afioga ina ia mafai e le gata ina aoga lenei Tulafono mo le lautele ae ia faatauaina i latou o lo o faapea ona faatinoina galuega a le Pulega o le Suavai, ia vave ona faaitiitia mai i lalo i se vaega po o le 20% le leakage. O le taua o lea vaega pei ona silafia, e tele le seleni e mafai ona faasaoina a lo tatou atunuu, e le gata i lea o le lava ai foi o le suavai ma faaitiitia ai vaega o lo o tupu pea i tausaga taitasi, o le tetele mai o timuga pe le paipa sau le mugala pe le paipa. O auala ia atonu e aoga foi lea Tulafono e toe fagufagu ai ma fautuaina le Pulega o le Suavai e tusa o lea auaunaga.

Lau Afioga i le Fofoga Fetalai, o se isi vaega e tusa ai o le Tulafono e faaoo atu ai foi ma se talosaga i le Pulega o le Suavai ona o nisi foi o vaega o lenei itumalo, e maitauina pea atonu o lea e i i tamaiti aoga o le primary school a Satapuala, ia o le a maua ai le suavai i lenei aso ona o lea ua oo mai i i, a o le paipa o lo matou nuu o le aoga lea, e tele ina tapunia le aoga ona o le lē sua o le suavai, atonu o le a faaaogaina ni palama qualify ma oo atu se suavai lelei i ai. O le a o atu foi latou ma avatu se tala fiafia i le aoga, atonu o le a oo atu i lea vaiaso ua fai faalelei a tatou paipa. E avatu foi le agaga faafetai i le Pulega o le Suavai ona ua faatinoina se tasi foi o talosaga sa faapea ona faaoo atu i le aoga a Aana Nu. 1, ona e maitauina talu ona umusa lea aoga e lei oo lava i ai le suavai. Peitai o lea e faafetai ai e le gata o le Matagaluega o Aoga ae faapea foi le galulue faatasi ma le Pulega o le Suavai, o lea ua mafai ona faaoo atu le vai sosoo ma le falemai fou o lo o faapea ona faatuina ai. O lea foi o le a taumafai e lagolagosua mai e aumai ni palama qualify e palamaina le vai lea ina ia aua ne i faaitiitia le suavai maimau.

Lau Afioga i le Fofoga Fetalai ona faaiu atu ai lea....

FOFOGA FETALAI: Malie le sui usufono mamalu, sei tuu atu le avanoa i le Afioga i le Sui Palemia.

Tofa Hon Fonotoe Nuafesili Pierre Lauofo (Minisita mo Pisinisi, Alamanuia ma Leipa): Lau Afioga i le Fofoga Fetalai, e tulai atu ma le faaaloalo. E taua tele o le mataupu pei ona saunoa i ai le sui usufono, pau lea o le fia malamalama o lea foi e faafogafoga le Afioga i le Minisita, o le mafuaaga o le lē maua o le suavai lea sa e taua o le leai o ni palama, aua o le Tulafono o Palama lea tatou te talanoaina. O le a tonu le faafitauli? Lē lava palama, leai se palama? O le sao lea?

FOFOGA FETALAI: Tulai mai le sui usufono mamalu mo Aana Alofi Nu. 3.

Afioga TOEOLESULUSULU CEDRIC POSE SALESA SCHUSTER: Faafetai lau Afioga i le Fofoga Fetalai mo le faauilavea a le Afioga i le Sui Palemia. A o le i faauma lau lauga ae se i tali atu e fesoasoani ai i vaivaiga o le Afioga i le Sui Palemia. (*Upu na faatonuina e le Fofoga Fetalai e aveese mai saunoaga a le sui usufono mo Aana Alofi Nu.3*).

Lua, e le au le suavai i totonu o le aoga ma ua uma foi ona asia ma faaoo atu le talosaga i le vaega o le paipa lea sa pa i totonu o le lotoa a le aoga. O lea la ua uma ona faaleleia, ae peitai o lea.....

FOFOGA FETALAI: Malie le sui usufono, se i tulai atu le Afioga i le Sui Palemia.

Tofa Hon Fonotoe Nuafesili Pierre Laufo: Lau Afioga i le Fofoga Fetalai, e matuia le tuuaiga lea e faasaga i le Matagaluega. O le tulaga i palama a le tatou Faalapotopotoga, o palama ua pasi uma a latou aoaoga faa-Palama. E leai ma se palama faaletonu a le Matagaluega, o la e lelei foi le faagasologa o galuega ma le faatinoga o a latou galuega. O lea na ou fesili atu aua o le suavai lau mataupu, a o lea tatou te talanoa i le Tulafono Tau Faaofi o Tagata Tomai Tau Palama 2013 e faavae ai le lesitala o Palama ma agavaa o Palama. O le mafuaaga lena.

FOFOGA FETALAI: Malie le sui usufono se i tuu atu le avanoa i le tali faaopoopo a le Minisita mo Galuega, Felauaiga ma Atinae Eseeese. Tulai mai lau Afioga i le Minisita.

Afioga Hon Manualesagalala Enokati Posala (Minisita mo Galuega, Felauaiga ma Atinae Eseeese): O lea lava sa talia sei i ai se taimi ona tuuina atu lea o le tali e tusa ai ma le saunoaga a le sui usufono mo Aana Alofi Nu.3, a o le tuuaiga matuia lea o le tulaga i le fesiligia e le o agavaa palama a le Pulega o le Suavai. Aua e i ai le tulaga foi lea pei ona taua anapo, e gata le Pulega a le Suavai i le mita, a o faaletonu la e i ai, o totonu o le lotoa a le aoga la e i ai liki ma faaletonu, o i la lea e faaletonu ai. E le o afaina la, e i ai taimi e le talafeagai ai ma utiuti le suavai, e le mafai ona oo i totonu a o faaletonu la e i ai o totonu o le lotoa o le mea e tataua ona nafa ma Komiti, o i latou e vaaia. Atonu e talafeagai ma le Tulafono Tau Faaofi lea. A o le tuuaiga lea e tuuaia ai le palama a le Pulega o le Suavai, e sili ona toe faui i tua lau Afioga i le Fofoga Fetalai.

FOFOGA FETALAI: Ia, o le manatu lea o le Nofoa lau Afioga i le Minisita, o lea lava sa tuu atu le avanoa. E faamanatu atu foi i le sui usufono tatou te talia ae popoe, e silafia foi o tatou lafoga ma a tatou tala i le Maota leni, o lo o i ai isi o le tatou atunuu o lo o faia le auunaga e le mafai ona tali mai nei meaane ua laaloa lau silasila i le tulaga o le tuuaia o le Pulega, a o lea ua saunoa manino le Afioga i le Minisita o le matafaioi a le Pulega o le Suavai, e vaavaalua ma le tatou Komiti o Aoga. E taua foi lou finagalo aua le tuuina mai o le faamanatu, o tatou qualified plumbers ia o le a sue, e mautinoa ai e le toe i ai ni mea faaletonu e le gata i le auunaga i totonu o le lotoifale i le mea e gata ai le pule ao ma le pule po a le Pulega o le Suavai, e faapena foi totonu o tatou nuu. Ou te faatonuina ina ia aveese faamaumauga

ia o le tuuaia e leaga le auaunaga tau palama a le Pulega nei oia ai le va, ae tulai mai le sui usufono mamalu e faaauau le saunoaga.

Afioga TOEOLESULUSULU CEDRIC POSE SALESA SCHUSTER: Faafetai i lau Afioga. Atonu e mau eseese i le faamatalaga, e le o se tuuaiga i le leaga o le palama a le suavai, o le vaega lea e avatu ai le tuualalo, ona ua umi tausaga, e le faatoa tupu nei, ma ua feiloai soo foi ma le Pulega a le Suavai ma vaavaai se auala e mafai ona faaola ai le vai, aemaise lava i le taimi o aoga. Ma ou te molimau atu lau Afioga i le Fofoga Fetalai, e tai faalua, faatolu i le vaiaso ona sue vai le aoga lenei, e le gata o le malae vaalele, a o nisi vaega o aiga e asu atu le suavai, ae o lea e oo atu i ai le paipa. A o le faanaunautiga lea ina ia mafai ona faaleleia lea auaunaga. O le leak foi lea i le Tulafono o lo o avatu, e leai, ina ia galulue faatasi le lelei o le palama i totonu o lo o faatinoina maota foi ma laoa o aiga, a ia lelei foi palama ma i latou inisinia o lo o faasoasoina le suavai i lalo o le tatou Pulega o le Suavai.

Ona oo mai ai lea lau Afioga i le vaega mulimuli o le tuualalo e pei foi ona taua muamua i le suavai o lo o faapea i le pitonuu lea o matou i Satui e faasolo atu i le Aiga i le Tai, e fai lava si sualua, ma o lo o i ai foi le talosaga, o lo o i ai nisi o pamu po o faatanoa ua uma ona vili e le Pulega o le Suavai ina ia mafai ona toe silasila i ai ma faaoga i ai le Tulafono fou lea. Faafetai lava.

FOFOGA FETALAI: Ia, tulai mai le Afioga i le Minisita mo Galuega.

Afioga Hon Manualesagalala Enokati Posala: Lau Afioga i le Fofoga Fetalai, ona o lea ua faauma mai, pei o le a agai ese le saunoaga i talosaga e le o se tatou te le o talanoaina se tala o se tupe faaletausaga, o lea tatou te talanoa i le Tulafono Tau Faaofi o Palama. Ma le faaaloalo.

FOFOGA FETALAI: Ia, o le finagalo faalauaitele o le sui usufono lau Afioga i le Minisita, o mea uma lava e aafia ai tulaga tau suavai, a o lea foi ou te tau mau iumaea ona ua tagi talatala le sui usufono e le o ola lona paipa i nei tausaga e tele po o le faaletonu la o le tulaga tau palama o lea na mafua ai ona toe talatalanoa, ia aua nei tetele tafega selefutia Vaisigano, e tau uma ai le galuega lelei a le Matagaluega atoa. Ae atonu o lea e sagatolu lau o le fo i le finagalo o le sui usufono, ia i latou o lo o atu e faatino le galuega i lea vaega o le atunuu. Ae silasila ane pea lau Afioga i le Minisita, leaga ua le tupu tasi, ua tupu faafia ma o lea foi e maitau le Nofoa ua lauga soo ona o le tulaga o le taumafai atu, o aoga aemaise tulaga o mea o faaletonu ai le palama, a o le taua lena o le tatou Tulafono Tau Faaofi, ina ia limataitaiina ai ma tulituliaupu i latou e le o faatinoina le tulaga tau palama i le tulaga talafeagai ma le lelei atoatoa.

Le sui usufono mo Gagaemauga Nu.2 o lea e maua sa e fia tulai mai. Tulai mai le sui usufono.

Tofa LEVAOPOLO TALATONU (Gagaemauga Nu.2): Faafetai mo le avanoa. E puupuu lava se manatu vaivai o lenei itumalo e tusa ai ma le Tulafono Tau Faaofi. Na pau lava le tulaga faafetai, o lea o le a faamautu uma tulaga ia i mea tau palama o le tatou atunuu, e resitala uma i latou, o lea

foi sa tau fesili atu i le tulaga foi lea o nai palama foi lele e matua 150% lo latou tomam masani, ae pei o lea e tau maua ma ii le tulaga lea o lea e i ai fesoasoani a le tatou Malo i nai tagata ia o le tatou atunuu o lo o i ai lo latou tomam. O le isi foi faafetai lau Afioga i le Tulafono Tau Faaofi, atonu o le a toatele ai nisi o le a tagai i le tulaga lea pei ona saunoa i ai le sui usufono mo Aana Alofi Nu.3, o le 60% lea o le suavai maumau po o le vai leiloa. Afai la e 100%, e ova atu le suavai faamaumau i lo le 40% lea e taumamafa ai le tatou atunuu. Ae maua lava is au faalogo, e pei lava o totonu o le taulaga lea e i ai leakages o vai ia, a o le faalavelave, ua le maua e le Pulega po o le a le ituaiga fai e fai ai ona ua le avatua se finagalo o le Malo po o le a toe sua uma i luga pe re-pipe atoa le tulaga lea. A o se tulaga taua tele le vaega lea e tatau ona silasila totoa i ai le Malo, aua e alu alu foi nei tei ua toe tuu mai nisi sene i luga o le totogiina o le pili o le vai ona o le tulaga lea i le le lava o le suavai, a o le tele ia o le tatou suavai lea e maumau. Pei na o se fautuaga foi lele i le tatou Malo sei silasila ane, ua leva ona fia minoi le Pulega o le Suavai i le faiga o le galuega lea, ae le o mautonu atu le Malo i se tonu sao e mafai ona foia ai le faafitauli lea i le 60% o le vai lea e faamaumau. Ma le agaga faaloalo.

FOFOGA FETALAI: Malo faafetai saunoa. Tulai mai le sui usufono mo Faasaleleaga Nu.2.

Susuga PAPALII LIO FAAVAIIVAIOMANU TAEU MASIPAU (Faasaleleaga Nu.2): Faafetai i lau Afioga i le Fofoga Fetalai faapea foi le paia o le Maota. I le vaai a lenei usugafono i lenei Tulafono Tau Faaofi, pei foi ona faamalamalama e le Afioga i le Minisita faapea foi le faaopoopo a le Afioga i le Palemia, manaia tele le agaga o le Tulafono Tau Faaofi, aemaise lava o le tautua a lenei foi poto faapitoa mo le tautuaina o le atunuu. Manaia tele le agaga ae i ai lava si vailiu lea e le o malamalama ai lou nei sui usufono nei tei ua sese lau faalogo i le faamalamalamaga a le Afioga i le Minisita i le po anapo, o le tulaga foi lea i le auaunaga masani a le Pulega o le Suavai mo nai o tatou tagata. Po o le tulaga a faapea o le a pasia le Tulafono Tau Faaofi lea ma aloaia palama ma le latou sosaiete lea ua taua, po ua mei ese loa le fesoasoani lea sa maua e nai o tatou tagata, nai aiga vaivai foi nei a faaletonu lava latou paipa e mafai ona vili atu i le Pulega omai siaki mai tau i le mita, ma nai mea faaleleia i totonu? Po o le mea a pasia loa le Tulafono Tau Faaofi i lau maitau faasao mai au lau Afioga i le Minisita, ua oo foi la palama i le tulaga foi lele o le fai o le latou sosaiete, e pei o le sosaiete a loia, sosaiete a fomai. Ia manatua foi o le sosaiete a fomai ma le auaunaga faafomai, o la e i ai le fesoasoani a le Malo e ala i le falemai, e faapea foi i loia, o lea e i ai le fesoasoani a le Malo e ala i legal aids, lea e maua mai i le Matagaluega o Faamasinoga. Ae a faapea loa e pasia le Tulafono Tau Faaofi lenei, e toe maua se isi fesoasoani a le atunuu mai le Pulega o le Suavai? Pei o le agaga lena o lea e tau maitau atu, a o le agaga o le Tulafono Tau Faaofi e manaia.

Na pau lava si vailiu lea e le o manino ai lou sui usufono, o le auaunaga i nai aiga ia. Ia taatia ia le pulega a nuu ma faleaoga, a o nai aiga. Mo se faataitaiga o le matou motu i Savaii, e faapena, a i ai lava nai mea e tutupu mai, e faafesootai lava le Pulega, ona o atu loa lea o le Pulega o le Suavai siaki le mita ma faasolosolo atu ai lava i totonu i le lotoifale. E ofo foi i lena fesoasoani, o le auaunaga fua a le Pulega. E pei o le uiga o lou manatu, a

faapea loa e pasia le Tulafono Tau Faaofi lea ma aloaia, fai pisinisi aloaia a le au palama ma le latou sosaiete, e mafai ona toe maua le auaunaga fua lea mo nai o tatou tagata? Ma le faaaloalo lava.

FOFOGA FETALAI: Ia, sei faasolo atu pea finagalo o sui usufono ona tuu atu loa lea o le avanoa e tali le Minisita ma le... Malie se tasi o sui usufono mo Salega, Afioga Afualo Wood Uti Salele sei lafo i lea Itu o le Maota. Tulai mai le sui usufono mo Vaa o Fonoti, ona sosoo ai lea ma Salega.

Afioga TIALAVEA FEA TIONISIO SEIGAFOLAVA (Vaa o Fonoti): Faafetai i lau Afioga i le Fofoga Fetalai mo le avanoa. E muamua ona momoli le faafetai i le Minisita ma le Pulega aemaise foi o le Faalapotopotoga o Palama ona ua i ai se Tulafono Tau Faaofi e taitaiina ai le auaunaga a palama i totonu o le tatou atunuu. Na pau lava le agaga e soso atu ai i le Tulafono Tau Faaofi, ona o lea e le o i ni faamaumauga o le Tulafono Faatonutonu, o nai tagata foi nei e mafai ona ausia le atamai faa-palama ae le mafai ona i ai ni tusi po o ni faailoga. O lea ou te vaai atu i le Vaega 8 o le Tulafono Tau Faaofi e mafai, po o le asiasiga e fai e le Komiti Faatonu, e mafai ona latou asiasia galuega o lo o faatino ona mafai ai lea ona maua se pepa e avatu e ave ai ma sui o le Faalapotopotoga.

O le agaga po o le talitonuga i lau Afioga i le Fofoga Fetalai, e tele palama faapea o lo o i ai i le tatou atunuu mo le poto masani. O lea out e talanoa atu ona o matou galuega, o isi foi palama qualified matou te faaaogaina, e tofua lava le palama ma ana metotia e faaaoga. A o le agaga ma le aano o le Tulafono Tau Faaofi, e momoli atu ai le faafetai i le Minisita ma le Pulega ina ia mafai ona faatulafonoina le asosi lea. I totonu o le Tulafono o le fauina o maota ma laoa, e mafai e so o se isi ona fau lona fale, ae i ai le vaega o le Matagaluega o Galuega e o atu e asiasi ma vaai. O la e faataga i lalo o le building code a Samoa so o se tagata e fauina lona fale. O le fauina la o le fale e lavea ai ma le palama ma mea uma lava i totonu. O la e faataga i le code. Ae asiasi atu e le au pasifale a le Matagaluega po o faatino i lalo o le Tulafono fale nei. Atonu o se agaga faapena foi e tataua ona maua e le au palama, ia asiasi e latou le tulaga o le faiga o galuega ia, a asiasi atu e faaletonu ona aveese lea, po o le a foi se faiga e fai i le aiga o lo o latou faaaogaina se faiga faapea. A ou te talitonu i le tipi motu ese o palama ia e le mafai ona auai i suega, atonu e faigofie pe a faapea e faa-Samoa foi la le faiga o suega ia, leaga o suega ia e tele lava i le faapapalagi. O le tele o palama matutua ma tatou palama i le tatou atunuu, a mafai ona faa-Samoa le faiga o galuega nei ma suega nei, e pasi uma lava, ona o le tomai ma le atamai o lo o i ai, na pau lava le eseese o le leai o se fasipepa e uu atu. A o le agaga ia ma le aano o le Tulafono Tau Faaofi, ou te matua sapaapaia le Tulafono Tau Faaofi ona e tasi lenei trade e faatonutonu ai foi tagata e galulue ai, so o se palama. O lea e fai matou pisinisi kamuta, masalo po ua ova i le sefulu ma ona tupu palama e te faaaogaina eseese mai, ona e eseese foi tagata ma latou amio, e tei lava ua sosola ae lei uma le galuega. O lea la ua fai le code, faafetai i le Tulafono Tau Faaofi ua mafai ona faasaoina foi pisinisi o lo o galulue i le galuega lea, ae na o le pau lava lena o le itu o lea out e vaai atu e mafai ona asiasia e le Komiti Faafae galuega a le au palama, ia a siaki atu ua lelei atonu ma ni faamaumauga i e o lo o faia galuega e

lagolago ai se latou talosaga e ave i le Komiti lea ina ia maua se latou tusipasi. Na pau lava le agaga lau Afioga i le Minisita e ala atu i le Fofoga Fetalai, ina ia maua se avanoa mo tatou palama ia faamolemole. Ia manuia le tatou Fono.

FOFOGA FETALAI: Malo faafetai. Ia tulai mai se tasi o sui usufono mo Salega, Afioga Afualo Wood Utu Salele.

Afioga AFUALO WOOD UTU SALELE (Salega): Faafetai i lau Afioga i le Fofoga Fetalai. O le Tulafono Tau Faaofi, e momoli atu le faafetai i le Minisita ona o le taua o lenei Tulafono. Silasila foi, o le isi lenei auaunaga e ese ma le taua e le gata i le tamaoaiga a o le tapenaina foi o le fatuaiga tausii, e le gata o galuega e maua ai, ae mafai ona faasoaso ma faasao lelei ai le suavai.

I le taoto mai la o le Tulafono Tau Faaofi, e lua ituaiga palama lea ou te malamalama i ai, o le palama foi lea ua maua lona tusipasi aloaia mai lalo o le polokalame lea o le aperenitisi, po o nisi lava aoaoga mai fafo, ma le isi ituaiga palama lea masalo o lena e mamafa i ai le tele o le au palama, e faa-Peretania o le bush plumbers, pe a faa-Samoa, masalo o le palama taavao. Atonu sei fesoasoani mai i le faa-Samoa. O i la lea e tele ma mafai i ai le tele o galuega faaletonu, ae faafetai ona o lea ua tapena le Tulafono Tau Faaofi, o lea o le a fesoasoani malosi le Faalapotopotoga, ina ia mautinoa aua o lea na saunoa se tasi o sui usufono, ina ia mafai ona aumai uma i totonu le tele o tomai nei, aua o le tele o tomai nei e le o aloaia i lalo o faiga faa-aperenitisi, na o le fasipepa lava e manaomia, ae tatau ona maua pea le aoaoga faapitoa lea mai uta i le Iunivesite ina ia faigofie ai ona faaoga, aua o le upu moni lava, o le tele lena o faafitauli lea e tulai mai i le tele o maota ma laoa, e le gata foi i lea o galuega tetele. Ua sulufai i ai le tele o aiga aua e le gata e gafatia e le latou tamaoaiga, ae na ona valaau atu lava, o lea o le a alu atu, ona faatino loa lea o le galuega, ae le o i ai tusipasi ia ma le puipuiga lea ua mafai nei ona tapena mai i lalo o le faalapotopotoga. E pei lava o isi faalapotopotoga lea ua i ai nei a faaletonu le auaunaga, e toe foi lava i le faalapotopotoga e fai le iuga pe aveese foi lona laisene.

A o le tatalo atu i lau Afioga i le Minisita ina ia taumafai ia aputiputi uma mai ma faaoga lelei o lea ua mautu le polokalame a le aperenitisi a le tatou Malo e tusa o le Iunivesite, o le tele ia o le sao i le vaega. Na o ni vaega lava ina ia mafai ona toe faaleleia lo latou tomai, aemaise lava ona o lenei vaitau e siisii lava i luga ma siitia le malamalama. E tatau lava la ona faamalamalama ia i latou, e le faapea na o le o atu lava e galueaiina galuega nei ona faalagolago lea i le poto masani, e leai. E tatau ona i ai se aoaoga e o faatasi ina ia faigofie ona faaleleia atili ai ona foia ai lea o le tele o le faafitauli lea e taua nei i le tele o le suavai lea e maumau.

Lau Afioga i le Fofoga Fetalai, o le vaega mulimuli o lau talosaga vaivai i lau Afioga i le Minisita ona o lea ua faaoga se vaega o le lauga faalauaitete, faamolemole i le agaga maualalo e tatalo atu i lau Afioga, o le vai o si ou nuu o Sagone, ia o le vai e mai, ae atonu sa logo muamua atu foi, sei silasila ane i ai po o le a se fuafuaga ae toe vili le vai i uta atu i isi fanua. Faafetai tele lava mo le avanoa.

FOFOGA FETALAI: Malo faafetai saunoa i le sui usufono mamalu mo Salega, Afioga Afualo Wood Uti Salele. Ia, tulai mai le sui usufono mo Faleata Sisifo.

Tofa LEALAILEPULE RIMONI AIAFI (Faleata Sisifo): Faafetai lava i lau Afioga mo le avanoa. E faatalofa atu foi i lenei taeao i le paia o le Maota o Samoa, aemaise o le faafofoga mai o le tapuaiga a le atunuu. E faatalofa atu foi faapitoa i nai a tatou fanau ua maua le avanoa e omai ai e maimoa ma faalogologo a o tatou felafoai aua se manuia o Samoa. Ia manuia tele outou, a outou matutua ia fai ni tou mea aoga, aua tou te omai i lenei Palemene.

Lau Afioga, e muamua ona momoli lau faafetai i le Afioga i le Minisita mo lenei Tulafono Tau Faaofi taua. Ua saunoa nisi o sui usufono, o le autu o le Tulafono Tau Faaofi, ina ia puipuia i tatou nei e faaaogaina lenei auunaga mai ia i latou e le lelei ona faatinoina galuega. Ae ou te talitonu o le mea aupito sili ona taua i lenei Tulafono Tau Faaofi, ua mafai ai ona siitia le tulaga o le faatinoina o galuega a i latou palama ma siitia ai foi le latou tomai, maua ai le avanoa e puipuia ai le latou profession, le latou tomai faapitoa lenei. E faafetai ona ua loa tausaga o lea faatoa oo mai se Tulafono Tau Faaofi e tuufaatasia ai lenei itutino e taua tele le latou sao. Aua e maitauina, o le faigata ia i tagata o i ai tomai faapitoa faapea ona galulue faatasi, e pei e toso lava le pitolau a le tagata ia ae faigata ona tuu i se itutino e tasi ina ia manino aiaiga e galulue ai ma taiala e faatino ai latou galuega ma puipui ai latou mai soligatulafono. O le mea lea e momoli atu ai le faafetai le Minisita i le tofa loloto, aua o lona uiga o lea o le a faamalumalu le Malo i le faatinoina o lea itutino fou ina ia aua nei pei o se leoleo saua a ia galulue faatasi ma lea itutino e fesoasoani ma faufautua ina ia tumau ma umi ma lelei. Ae le gata i lea, e maua ai le avanoa i a tatou palama e maua ai lenei resitala faapitoa, e le gata e galulue ai i Samoa nei, ae atonu e i ai ma se avanoa e faaaogaina ai lava lenei tusipasi e galulue ai i so o se atunuu o le Pasefika po o atunuu foi o Niu Sila ma Ausetalia, pe afai o le tulaga lelei lea e oo i ai tusipasi nei po o tusi aloaia nei. Aua e maitauina, e i ai nisi o poto faapitoa aemaise lava le au faufale, e tele foi le au faufale i le tatou Maota, e leai se latou itutino faapea. A ta alu la e sue se isi e faia lata galuega, e fuafua lava i se tagata masani pe recommend mai e se isi ae ana i ai se latou itutino faapea e o i ai i tagata e talanoa i ai ma aumai ai fautuaga, e lelei. Aua ou te tautino atu, e i ai isi o au uo ia e i ai a latou galuega, ua fai fai sosola kamuta a o la e tatiai galuega faatoa afaafa pe lei taitai ona uma ona faatino. Ua le iloa foi la e tagata nei po o fea e ave i ai se latou faasea. Ae momoli atu le faafetai tele i lenei itutino ua tulai mai.

Na pau o le atugaluga lea e i ai lau Afioga i le Minisita, e le o manino mai aiaiga e avea ai oe ma sui resitala. Faafetai o lea ua i ai le avanoa mo nai o tatou tagata matutua foi ia ua leva ona i ai le tomai, ua i ai le exemption e tuusaunoa ai i latou ua leva ona galulue ae leai ni o latou faailoga faapitoa. O se tulaga lelei lea. Pe mafai foi ona fai se latou refresher course foi lea pe vaiaso pe lua vaiaso ona aloaia lea i ai o se latou resitala e mafai ai ona galulue. A o le mea lea e popole i ai lou nei sui usufono, pe i ai la se avanoa o galulue faatasi ai pe a faatino le itutino fou lenei ma le tatou Polytech i le latou curriculum mo le faatinoina o latou aoaoga ina ia mautinoa e iu mai le tagata ua talafeagai ma latou foi requirements ma latou standards pe fia foi ni

tausaga e toe foi mai ai toe faigaluega ona maua lea o se tusipasi faapea ae po o ai foi e totogia, aua o isi mea ia e ono alofia ai tulaga faapea.

O le isi mea lea e i ai, e tai tausaga ma faafou lou laisene, pe faafou fua pe fia le tupe e faafou ai, aua o isi ia vaega e atugalua ai tagata e foi ai le fia resitala, e tausaga uma lava e faafou ai. Pe tuu i ai se tailua tausaga pe taitolu tausaga pe tuu i ai na o se stamp foi lele e validate ai lau certificate. Ae afai e tausaga uma ma totogi, e ono augata ai foi nisi e faaauau i latou i le avea ai ma sui o lenei faalapotopotoga taua.

O le isi vaega, o le mea lea e pei ona saunoa i ai le tele o sui usufono i le leakage, aua... Faafetai i le finagalo o le Matagaluega o lea ua faailoa mai o le a omai se vaega faapitoa mai Iapani e galulue faapitoa ina ia taumafai e foia le faafitauli tele lea. Aua a faapea e mafai ona faasaoina mai le vai lea e liki po o le 70% lea e taua mai, se vaega o lea e liki, o lona uiga e le toe i ai se tatou faafitauli i le suavai maua. Aua o le lipoti o lo o tuuina mai, e pei lava o le tele o paipa i totonu o aiga lea e mafua ai. Ae talosia ia mafai ona omai galulue faatasi ina ia foia lea faafitauli. A o le tulaga lena lau Afioga i le Tulafono Tau Faaofi, e le gata i lea i le taimi e aveeseina ai lau tusi resitala. O lea ua uma ona pasia e le tatou Palemene se itutino foi lea Tribunal e ave i ai tagi a i latou nei ina ia alofia mai feteenaiga pe afai e ono aveese lau laisene.

Ia o nai fautuaga na lau Afioga i le Minisita, ae faafetai mo lenei Tulafono Tau Faaofi fou ua tuuina mai ma lenei itutino fou o le a faigofie ai, e le gata ina saili tagata e faatino ina a tatou galuega, ae ua i ai foi se itutino e ave i ai faasea pe afai e i ai nisi o lo o faia nei galuega ae le faamaoni ma e le lelei ona faatino. Ma le faaaloalo lava. Faafetai.

FOFOGA FETALAI: Faafetai saunoa i lau Afioga i le sui usufono mamalu. Ia, tulai mai le sui usufono mo Samoa Aoa, Afioga Maualaivao Pat Ah Him.

Afioga MAUALAIVAO PAT AH HIM (Palota Taitoatasi): Malo faafetai mo le avanoa i lau Afioga i le Fofoga Fetalai. E faatalofa atu foi i le mamalu o le Palemene, tainane foi sui usufono mamalu faapea foi Ofisa Sili o Pulega.

Ou te fia talanoa laitiiti e uiga i lenei Tulafono Tau Faaofi taua. E ala ona ou fai atu e taua, ona e leai lava se aiga e le o soifua e leai se paipa. O le vai e taua, o le upu lea e tau o le ola. O le ola, ua totogi le suavai i taimi uma, e tataua ona utiuti le suavai, o lona uiga ua tataua ona tatou maua ni palama e taua ma lelei.

E muamua ona faafetai atu i lau Afioga i le Minisita, faafetai le silasila mamao ua mafai ai ona faatino mai lenei Tulafono Tau Faaofi, atonu foi o i o le a amata ai pei ona saunoa le Palemia, e auauai mai ai ma isi auaua e ao ona faalimataitaiina ma fai a latou Tulafono Tau Faaofi ina ia malu ai foi lea auaua ma meatotino a tagata mai le faaletonu i lea taimi i lea taimi. Ma ou te talitonu o lo o faafofoga mai le tatou atunuu, a faapea o se palama o le a galueaiina lau galuega, ia, e taua le malu lelei o le suavai, aua nei i ai ni mama. Ae a mama la, e talitonu foi o lea ua i ai le avanoa ia te oe e molia ai le palama, aua o le a e totogi nei suavai maumu pe a faapea e tulai mai se faafitauli.

I lau vaavaai i le Tulafono Tau Faaofi i le Vaega 6 o lo o faapea mai: “O se e galue i galuega faa-palama e silafia mea tau palama, e ao ona galue i lalo o

se ua faamauina”. Ma ou te talitonu i lenei vaitau a o le faatoa faaofi mai le Tulafono Tau Faaofi, o lo o tele ma anoanoai galuega o lo o faatino e nisi o palama o lo o i ai le tomai ma le agavaa poto masani. Ma o le anoanoai la o nei pisinisi i Apia o lo o faatino foi e nei tamalii i le latou poto masani. O le poto masani lea o lo o faapena ona ola ai paipa ma agai ai pea le galuega tau palama i mea tau vai o lo o solosolo lelei pea. Ma ou te talitonu o lo o i ai la le auala lea i le Vaega 6, ae i ai la ma nisi fautuaga e tusa ai ma i latou nei, aua e ese lava le sau ma le degree ma le theory, ae ou te talitonu e aoga aoga lava le theory i le tagata poto masani, masani ai foi ma ia i auala ma metotia faigofie ma taugofie. E manaia foi pe a resitala foi i latou nei i se resitala e fuafua ia latou galuega sa fai po o ni galuega sa faatino e referee ai i latou nei ina ia faaaau ai le galuega lea i sailiga o manuia ma le tamaoaiga ia faapea foi le atinaeina o aiga. E talitonu e pasia loa lenei Tulafono Tau Faaofi, e oo lava i se faleoo po o le a se ituaiga fale, e iu ina te i foi ua faapea a le sainsi mai se palama e le mafai ona faauma le galuega aua paipa ia e tai atu. E tai pei o uiga ia e maua ai loa le taugata o le soifuaga. Ae ou te talitonu a lelei lava ona faataoto mai, aemaise lava a tatou palama o lo o i ai nei, e lagona le alofa aua o le tele o i latou, ou te iloa e le o i ai ni latou tikeri, ua uma atu o latou tuua sa o latou maua mai ai le poto masani sa i ai o latou faailoga, a o i latou nei o alo ma fanau o lo o faaaauina lenei matata. O le matou lava vaavaai i ai i lona taimi ma le taimi lenei, o lea lava e faaaau pea e i latou nei le auaunaga lea, ae aunoa ma ni tusi pasi ma ni mea faapena.

Ua ou iloa foi a tuai mai le palama ou te le vili i ai ona ua o ta iloa lava e ita faamotu le paipa ma kelu ma sosoo. O aga ia ou te talitonu e tataua ona silasila i ai le Tulafono ina ia puipuia ai foi i latou nei ua i ai le auaunaga lenei. E taua tele aua o palama o ni tagata ua poto faapitoa ma aoaoina ma ua latou silafia galuega tetele tai pei o pamuvai. Ua latou silafia le malosai ina ia mafai ona agai atu ma tauave le suavai i ni fale mauualuluga. E ao foi ona latou silafia ituaiga paipa e mafai ona fautuaina e faaaoga, paipa ia e i totonu o sima, paipa i lalo o le palapala faapena foi luga i totonu o faalo o fale. E taua tele le Tulafono lenei ona o lea ua tatou matamata atu pe a agai mai mala faanatura e i ai mu ma afi, e ao ona mafai ona faaaoga e i latou le tomai lea. E pei so o se fale lava e fai ua i ai water sprinkler, e lautele le tomai. Ou te talitonu e taua tele le matata lenei o le palama aua e leai se aiga e ola e leai se paipa, ae pei ona avatu ai lau faafetai i le Minisita e tusa ma lea vaega.

Lau Afioga i le Minisita, malie lou finagalo e avatu foi se fautuaga ona o le matou faalogologo pea i lea taimi ma lea taimi ma asiasiga e alu agai i aoga ma tua atu i aiga, o le mea lava lea o le suavai. O lea foi faatoa maea atu ona lauga isi sui usufono, o nisi taimi ua faigata ona tatali le talosaga soo. Lau Afioga i le Minisita na o ni fautuaga lava i le agai i luma o tatou aemaise lava faleaoga o lo o toatele ai le fanau aoga, o le matou vaavaai i le taunuu atu o asiasiga, o la e timu ae leai se vai, aisea, ua fau fau le faleaoga pe miliona le tau, ae ave ifo le tanevai na o sina 500lita. E le o gatasi ma le fau o le faleaoga e miliona tala ae a tuu mai loa i le suavai na o le 500 lita le tane e faatali ai le vai mo le ola. E le oti se isi i le leai o se faleaoga, ae oti tagata i le leai o se vai, tulou. E tataua ona tofua le faleaoga ma ni tanevai e faatali ai vai ia ua mamau, atonu e mafai ai ona foia le faafitauli lea. O lona lua, mo le agai i luma o aoga aemaise lava le fanau aoga ma faleaoga, tuu ai i totonu ma le feagaiga e leai se faleaoga e le toe fausia ia maea ae leai ni tane ma talivai, atonu ailoga e toe talosaga se sui faipule i ni vai aua aoga ma fanau aoga. O

se mea manaia tele, o lou iloa i ai ou te manumanu pe ou vaai atu i le suavai, ae o lea lava e fetagisi mai i vai. O nai fautuaga ia, atonu e lelei foi lea Tulafono i palama ua poto atoatoa ai. Tatou matamata i auala o le tatou atunuu, eli eli tanu ou te le iloa pe moni, ae le iloa po o i lea e sese ai le palama ae ou te talitonu, o mea ia tatou te o e faalelei, o le suavai o le mea taua i le atunuu atoa, o le agaga faaaloalo lau Afioga i le Minisita o nai fautuaga ia, e moni o lea tatou te talanoa i le Tulafono ae auala atu ai nai motugaafa e fesoasoani atu ai i lau pitolaau. Faafetai tele mo le Tulafono ua faataatia mai tatou te velo aso i ai ma maua ai le mea e talafeagai ma lelei mo le atunuu.

FOFOGA FETALAI: Malo saunoa i le sui mamalu, tulai mai le sui usufono o Aleipata Itupa i Lalo.

Afioga TAFUA MALUELUE TAFUA (Aleipata Itupa i Lalo): Faafetai lava i lau Afioga i le Fofoga Fetalai, Maleifua mai lau Afioga aemaise le sui Palemia ma le mamalu o le tatou Palemene, faatalofa aloaia foi i le Afioga i le taitai o le Itu Agai, o lea ua fiafia sulu o le tino ua vaai atu ua e afio mai i lenei taeao fou ua tatou feiloai, faapea foi i lea itu o le Maota, lau Afioga i le Failautusi o le Fono Aoa mamalu o le aufaigaluega ae tainane foi le mamalu o ofisa sili o pulega ma ofisa sili lagologo ua tatou faatasi ai, faapitoa foi se faafetai i le Matagaluega o Aoga, faiaoga aemaise o tamaiti aoga alo ma fanua ua tatou faatasi ai i lenei taeao fou. Malo faafetai le taumafai, faafetai foi le pue lelei o outou o mea pueata i lenei vaitau. O matou nei ao outou taeao. O se tuualalo i nai faiaoga aua tou te naunau i le totogi ae naunau ia lelei ia maka o tamaiti ma maua ni tatou pasi lelei, faalogo lelei i le PSC o latou na o faia Tulafono, e 55 loa le tagata o le taimi lava lea ua tatau ai ona litaea ae faasolo mai le isi vaega fou la e aoga i Iunivesete aua tatou aoga aua e faapena lava le faagasologa. Ae faamalo i le taumafai, faafetai le tauatia faafetai le aotauina o le fanau. Lau Afioga i le Fofoga o le Fono, e le tele ni manatu na o le tolu lava mataupu o le Tulafono ou te fia talanoa i ai, atonu o lea e manino lava le faatomuaga o le Tulafono, e pei o se Tulafono e faatonutonu ai le faa-Tulafonoina o le faamaumuina o tagata tau palama o aofia ai le tuuina atu o latou tusi faamaoni po o certificates o le faamaumuina, aofia le tumau aveese ma le toe faamaumuina o le faamaumuina e le komiti o le pulega o le faalapotopotoga faapea foi ona faaauuina le faalapotopotoga o tagata tomai tau palama a Samoa ona tuufaatasia faale-Tulafono lea. Po o a lava a tatou Tulafono e fai, e mautinoa lava ma manino, a leaga se matou paipa i tua pe ua liki le paipa pe ua i ai se faaletonu, e le faapea o le a sue le tusi telefoni e sue le palama ua resitala, tatou mulimulitai i le Tulafono ua i ai nei, o le tulaga moni lava o le tofa fetuutuunai ma le tofa fetalai e sue lava le palama o le nuu ia e alu atu loa e sosoo le paipa ma fai le mea la e faaletonu, aua a faatali masalo o le lua i le tolu itula po o le aso atoa foi pe sei alu atu i le aso e sosoo ai ona faataunuu lea o le faamoemoe. Ao le Tulafono lava faafetai tele i lau Afioga i le Minisita o Galuega ma suavai manaia le Tulafono ua leva ona tatau ona fai, o le agaga lea lau Afioga i le Fofoga Fetalai, o le Tulafono lava ia e pei o se taiala tatou te mulimulitai i ai, o le faataitaiga foi e pei o le Tulafono o taifau lea na pasia i le tausaga ua mavae, ia ou te leiloa pe ua fia ni taifau a le atunuu ua resitala, aua o le mea moni, ua lua nei vaiaso talu ona oo mai le isi tamai taifau i le matou fale, ia la ua tausi

ai lava, e lei resitalaina ae ou te leiloa po o fea e sau ai, ia o le alofa lava ia faa-tatou ae e le o usitaia foi le Tulafono e pei ona i ai. Lau Afioga i le Fofoga Fetalai, e tolu nai vaega ia na ou taua, o le vaega ono o le sala, lea e faapea mai e \$10,000 pe a faapea e solitulafono le palama. E i ai lou talitonuga sei toe silasila totoa lau afioga i le Minisita, pei lava ua fai si mamafa o lenei sala, ao le sala muamua atonu o le mutaaga lea e gata ai le malosi o le sala. Ae o lou talitonuga ua fai si mamafa tele O lona lua lau Afioga ma le faaaloalo o le vaega e 12, lea e faapea mai ai ae lei tolu masina uma lou resitala aua e tai tausaga ma resitala e pei ona saunoa i ai lau uo o le sui usufono o Faleata Sisifo, e pei e manaia foi lona finagalo, e manaia pe a faapea e tai tolu tausaga ma resitala aua o tatou lea e tai lima tausaga ma fai le palota faapea uma foi pule sili o pulega a le Malo ma pule sili lagolago e tai tolu tausaga ma fai a latou konekarate.

FOFOGA FETALAI: Malie le sui usufono o saunoa o lo o i ai le faauilavea. Tulai mai lau Afioga i le Minisita o Leoleo ma Falepuipui.

Afioga Hon Sala Fata Lisati Pinati (Minisita mo Leoleo, Falepuipui ma Auaunaga o Tinei Mu ma Faalavelave Tutupu Faafuasei): Faafetai mo le avanoa faamalie atu ua ou tulai atu ona ua taua taifau, o le taimi nei o lo o faagasolo ia galuega fai a le pulega o lea e tau fuafua po o le a se faatatau e talafeagai ma o tatou tagata, aua a avatu nei e \$100.00 e laisene ai le maile po o taifau sei tulou, o lona uiga ua le mafai ona laisene, aua e le tofu tupe uma. O le ala lea ua faatuatua ai ona ua uma ona fai tofiga o i latou na aotauina i le tolu vaiaso i le lua vaiaso e o ai i Niu Sila le toafa lea ua uma ona filifilia e fai le aoga i Aukilani i Niu Sila. A maea le aoga o le a tuuvaa atu ai i Niu Sila foi mai ma le atamai, o i ina e maua ai le tau. Afai o se tau e \$5.00 e faapena ona \$5.00, ae o ē uma o lo o i ai taifau..., afai o ni taifau e aoga e puipui mai ai le aiga i le au talepe fale, ia fai ina ia maua se 50 o maile ina ia aua ne i solitulafono tagata e solia maota ma le au tofafa, ma le faaaloalo lava.

FOFOGA FETALAI: Ou te manatu i lau Afioga i le Minisita mo Leoleo ma Falepuipui, ona o lau Matagaluega tonu lea o lo o fitoitonu..., o le aano o le fesoasoani mai o le Afioga i le sui usufono ma le lagona, ona o le tatou Tulafono, ae taua le Tulafono. Faafetai o lea ua malamalama atili ma e le o nofonofoa'i le Matagaluega, o lo o faasolo pea le aiaiga o le Matagaluega i le lesitalaina o taifau ma le lesitalaina o taifau o le a faatamai.

Tulai mai le sui usufono mamalu e faaauau le saunoaga.

Afioga TAFUA MALUELUE TAFUA: Faafetai atu i le Minisita mo Leoleo ma Falepuipui, Auaunaga o Tinei Mu ma Faalavelave Tutupu Faafuasei o le aoga foi o le Tulafono e avatu e silasila i ai le Matagaluega ia atoa se 10 tausaga ona faatino lea. O le manaia foi lena e oo atu i ai ua tapenapena uma tagata ma aiga taitasi mo le lesitalaina o latou taifau.

Ma le faaaloalo lau Afioga, o le Vaega 12 lea e pei ona ou taua, o lo o faapea mai ae lei uma lau lesitala faale-tausaga, e tuu atu le tolu masina e tataua ona toe faafou lau lesitala. Na o se tuualalo i lau Afioga i le Minisita, pe manaia le taitolu tausaga ma lesitala tatou palama, e aoga foi lea e fesoasoani i latou tulaga tau tupe. O le mea moni o le tulaga lea e fai ai, a uma nei o na

resitala i le tausaga muamua, lua ma le tolu o le tali e le toe faia le resitala, ae a taitolu ou te talitonu e manaia le tulaga lea ma le faaaloalo.

O le vaega mulimuli o le vaega lea ua resitala palama, e leai se mea ua ou vaai ai i le Tulafono e tuliloaina ai le palama pe a faapea e le o lelei le auunaga. O lea e i ai le Vaega 17(d) functions and powers of committee, a faaletonu o lona uiga e fai le suesuega ma le sailiiliga. Ae sei fai sina au tamai tala puupuu atonu e faamanino ai le tulaga lea ou te tautala ai ma le faaaloalo. Sa oo mai i le vaiaso ua tuanai atu lua nei vaiaso talu ai se tasi o lou itumalo, ua tipi lana moli, tulou, ae ma o atu i le ofisa o le EPC ua fai faagaoi le tulaga o le eletise, ma o le tala a le tamaitai le tagata faigaluega o lo o i ai i le Matagaluega e faapea mai, e ova i le 200 aiga o lo o latou faia lenei vaega. Lau Afioga i le Fofoga Fetalai e i ai le talitonuga e le o le aiga e mafua ai lea faatamala, o lona uiga e i ai le faimoli o lo o faia le vaega lea, e alu atu ona sosoo lea o le uaea aumai sao i le main e alu sao, ae le avea i totonu o le mita ina ia faitau ai le eletise la e faaaoaga. O lona uiga la e tatau ona tatou tuliloa le faimoli o lo o faia lea vaega faaletonu ma le sao ma le lē faamaoni. O le uiga o lau tala, maimau pe ana i ai se mea i le tatou Tulafono e tuliloaina ai le palama e mafai ona divert mai le vai ae lei oo i totonu o le mita. O lona uiga, e faagaoi ona fai le suavai, pe i ai se mea e puipui ai, aua na o le vaega d lea ou te taua i lalo o le vaega 17, ia ae manaia pe a i ai se mea foi lea pe compulsory le aumai o le card po o le suafa o le palama, ia ona tuliloa ai lea. E moni lava o tatou e faigofie ona iloa ma silafia lea ma lea, ae faigofie foi lena mo le aiga, a i ai se faaletonu pe siaki atu e le o lelei ona fai le vai i vaega lava lea o le faagaioiga o le suavai, e faigofie ona tuliloa e le Malo. O nai manatu ia lau Afioga i le Fofoga Fetalai, ae momoli atu le agaga faamalo ma le faafetai i le tatou Tulafono, o se mea aoga ma o se mea ua leva ona tatau ona fai. Ma le faaaloalo.

FOFOGA FETALAI: Malo faafetai saunua. Ia sei tulai mai le.....ia sei tuu atu ia muamua le avanoa i le Taitai o le Itu Agai, malo le soifua manuia.

Afioga Hon PALUSALUE FAAPO II (Taitai o le Itu Agai): Ia ou te tulai atu ma le faaaloalo e puupuu foi sina sao lau Afioga i le Fofoga Fetalai. Atonu o lea ua saunua sui usufono i le aoga o lenei Tulafono Tau Faaofi. Ae e tatau foi ona tilotilo i le isi itu, o lea e fai atu ai lau fesili i lau Afioga i le Minisita, o le a le tau o le Tulafono i aiga ma tagata o le tatou atunuu, pe o se faamama avega, ia po o se faaopoopo o le avega le tau o le soifuaga? O le mea lea e tulai atu ai aua i le taimi nei, o la e fai e le kamuta le tele o le palamaina o aiga, aua o tatou i tua ma galuega e fai i tua, o le fale lava ia ma le fale e tua i ai ia ma sina sink o le umukuka. O mea ia ua i ai lava le pote faapitoa o kamuta latou te faatinoina le galuega lea.

O le mea la ua ou tulai atu ma le faaaloalo lau Afioga i le Fofoga Fetalai, o le taimi nei, o le matua mamafatu i aiga o le fai o se galuega fou, fai se fale fai pemita, aumai le faatagana a le PUMA, fai le pemita o le eletise, pemita mea uma. O le mea lea e popole i ai, i fai foi ma se pemita o le au palama. O la e taoto Sosaiete a Palama pe a mananao e fai, fai le latou faavae constitution e silasila i mea ia. O fale tetele ia e faamoemoe e fai, o la ua lesitala kamupani e feagai ma galuega tetele nei pei o galuega a le Malo o lo o faamoemoe e fai.

FOFOGA FETALAI: Ia malie lau Afioga i le Taitai o le Itu Agai, sei tulai mai le Minisita e faapulapula lou finagalo. Tulai mai le Minisita.

Afioga Hon Manualesagalala Enokati Posala: Lau Afioga i le Fofoga Fetalai, o le mea tonu lava lea o lea ua fai, o le Sosaiete lea o le Asosi lea a le au Palama lea ua faatino nei mo a latou fuafuaga ma ia amanaia ai, e le o i ai se mea i le taimi lenei, o lea faatoa fausia mai i i e i ai le Tulafono lea, ma le agaga faaaloalo.

FOFOGA FETALAI: Ia leaga o lea na e taua le PUMA, ia sei tulai mai le Minisita e vaaia le PUMA pe oso mai i totonu le PUMA.
Ia tulai mai le Minisita o le Matagaluega.

Tofa Hon Faamoetaulua Lealaiauloto Ulaitino Faale Tumaalii (Minisita mo Punaoa Faalenatura ma le Siosiomaga): Faafetai i lau Afioga i le Fofoga Fetalai mo le avanoa, leai e saolele lava, o lea ua taua le PUMA, o le PUMA lea e fesoasoani tele lava i le afaina o tagata lautele i atinae foi ia e fai ma le lē fuafua i tagata lautele i autafa ane o latou maota i le tulaga o le atinaeina mo pisinisi ma mea faapena, e aoga tele la le PUMA ma lana Tulafono e mataitu ai tulaga ia aua le manuia lautele o tagata. Ma lou faaaloalo lava.

FOFOGA FETALAI: Sei tulai mai le Afioga i le Minisita mo le Soifua Maloloina.

Afioga Hon Tuitama Talalelei Tuitama (Minisita mo le Soifua Maloloina): Lau Afioga i le Fofoga Fetalai, o lea ua taua ia pemitā. O le mea la e fia faamalamalama e fia malamalama i ai lau Afioga i le Fofoga Fetalai ma le mamalu o le Fono, o le faafesili i le sui usufono, po o ua i ai sona pemitā ina ia auai i Fonotaga nei i le aso? O lea sa maua ia le faamatalaga ua gasegase i le mai mata. O le faafesili la ona o le tulaga faa-soifua maloloina, o lea o le a sau ma aumai le faamai ia i tatou uma nei. Ae po o i ai la se tusi mai le fomai e faapea mai ai, ua mafai ona mafuta i se nofoaga e tumutumu ai tagata ina ia taofia ai le faalauteleina o le faamai lea sa aafia ai? Ia o le faafesili lea i lau Afioga i le Fofoga Fetalai.

FOFOGA FETALAI: Malie o lea o le a avatu muamua le avanoa i le Sui Palemia ona tuu atu lea o le avanoa le sui usufono mo Faleata Sisifo.

Tofa Hon Fonotoe Nuafesili Pierre Lauofo: Lau Afioga i le Fofoga Fetalai, ona o le taua tele le mataupu ua saunoa ai le Minisita, pe mafai lava ona sei faamalamalama atili mai le gasegase lea, o le faamai mata lea e te taua, mo le puipuia o le Maota? Aua o lea ua e fesili, po o i ai se...e maitau la, aemaise le aso, ona o lea tatou te faatasi ma le toatele o fanau aoga nei aafia atu ai. O lau vaega lea i lau Afioga i le Minisita mo le Soifua Maloloina.....

Afioga Hon Palusalua Faapo II: Lau Afioga i le Fofoga Fetalai, se o le mea e fia faamalamalama, ou te lei sau e....Lau Afioga o lapisi mea ia e

aumai, o lapisi e toso ai le Fono, e fesoasoani i lau Afioga, a o mataupu ia e lagalaga, leaga e amo e le atunuu le mea lea.

FOFOGA FETALAI: O lea o le a avatu le...tulai mai le sui usufono mamalu mo Faleata Sisifo.

Tofa Lealailepule Rimoni Aiafi (Faleata Sisifo): Lau Afioga i le Fofoga Fetalai, ou te talitonu o lea ua i ai le pemita a le Afioga i le Taitai o le Itu Agai. Ae i le puipuiga lava o lau Afioga ma i tatou uma, e talitonu e tatau ona faatu se lafo, *Ina ia aveeseina ma le tatou Fono i latou uma o lo o maua i le gasegase o le mata, ina ne i te i ua afaina mai i tatou, o lea e tele a tatou galuega o lo o fia faatino.*

Ma le faaaloalo lava.

E le i faaluaina le lafo.

FOFOGA FETALAI: Ia e tatou te faaataata lafoga, ae tatau ona tatou tilotilo totoa i le mea lenei, aua na alu le po atoa anapo o tatou talanoa i le puipuiga, ma o lea foi ua saunoa manino le...e le natia sa oo mai le faanoi a le Taitai o le Itu Agai ia te au ma faailoa mai foi le tulaga lea, ma sa ave foi i ai le avanoa taua ona o le amanaia o Tulafono Tumau o lo o faailoa mai, o lo o i ai le gasegase ia te ia ona o le tulaga o lona fofoga. Ia o lau lea maitau, o la ua silafia lelei lava e le Taitai o le Itu Agai po o ua faafoisia lona malosia, pe leai. O lea ua saunoa malamalama le Minisita mo le Soifua Maloloina, ma ou te tatalo atu e le tatau ona tatou le faia se faaiuga i le mataupu lenei, leaga o lona uiga, a tatou aafia, ua tolofia le tatou Fono. O lea foi na ou talosaga sao i nisi o sui usufono na talosaga mai ia te au, ona ou fai lea i ai, malilie foi e malolo lelei sei manuia ona omai lea leaga ou te talitonu e aafia ai le tatou Fono.

Ma ou te tatalo atu a o faia le tatou malologa, lau susuga i le alii fomaini, sei siaki ane ifo le tulaga lea, afai e le o i ai se tulaga mo le lamatia o le tatou Maota, ona malilie lea o sui usufono mamalu, e tatou te taliu foi ae popoe leaga e tatou te faatalasua, ia ae ou te manatu ne i te i ua tatou aafia o lea e ova ma le 12 itula lea tatou te faatasi i le ea o le Maota. Ma o lona uiga e le faapea o le tau faatauvaaina ia po o se tulaga e tulai mai ai le teena ona o se tulaga le migao, ia ae outou seu silasila foi ona o le tulaga o le faamoemoe. E manatu foi o lenei lava e nanau mai lau Afioga i le Taitai o le Itu Agai ona o le naunau i le galuega, ae tatou seu silasila foi ona o le faatinoga o le galuega, ae taua le mataupu ua tulai mai. Ae ou te lafo atu i lau Afioga i le Minisita mo le Soifua Maloloina, please certify to me and give me the right information pe tatau ona toe auai sui usufono o lo o aafia. O lea e maitauina foi i le isi tulaga lea, o lea ua i ai sui usufono ia ua le toe nonofo mai i le tatou Fono, ou te le iloa la po o ua maua i le mai mata, pe te i lava ua tulai atu ae lei faanoi mai i le Fofoga Fetalai. Ua outou iloa le Tulafono Tumau e 23? E alu ese le tagata mai lona nofoa ma faaleaogaina lona nofoa, pe a tolu aso e sosoo, e le logoa le Fofoga Fetalai e aunoa ma se faanoi i taimi o a tatou Fono. Ma o lea lava ou te faaaloalo atu ma ou tuu atu le tulaga o le tatou vafealoaloai, ae aua ne i ave lea ma mea e fai ai le tulaga o le fia alu lava o le tagata alu, e le o se Fono a tamaiti le mea lea e fai, Fono a le atunuu, e tatau ona faailoa mai i le Fofoga Fetalai, po o fea lea e agai i ai lea ma lea ma

lea i taimi uma o le aso. O lo o tapu i a tatou Tulafono Tumau, o lou le auai i totonu o le lua tolu itula, e te le o fonu i le aso lena. Ae tataua ona ou faamanatu atu leaga o lea lava e fai le faiva o le maitau, ae o lea foi ua faatulai mai le mataupu lea ona o le faatulai ese o nisi o tatou sui usufono, ia ona o tulaga faale-Fomai. Ae o le a ave le avanoa pea i le tatou taimi lea ae lei faia le taimi malolo, ae lafo atu i lau Afioga i le Minisita mo le Soifua Maloloina, sei silasila ane ona tuu mai lea o se faaiuga e tuuina atu ai i le Nofoa.

Tulai mai lau Afioga i le Taitai o le Itu Agai e faaauau le saunoaga.

Afioga Hon PALUSALUE FAAPO II: Lau Afioga ua ou popole lava, aua e ese lava le fomai o tina, ese le fomai o mata. O lea la ou te popole, vaeatu le Afioga i le Minisita, e lei aumaia sana fautuaga, ae o la e i ai le fomai o mata e silasila i ai.

FOFOGA FETALAI: O le tina e i ai fofoga o le tina, e vaai uma lava, e mo le tina e fai ona mata e silasila i ai le fomai, e leai la se mai tina e leai ni ona fofoga. Taatia le faaiuga i le Afioga i le Minisita a sau ia ona malie lea o lau Afioga i le Taitai o le Itu Agai. O lea lava ua tulai le fofoga o alii o la outou faa-Faletui, ia ona fai lea o le tatou faaiuga.

Ia tulai maia faauma maia le saunoaga le Taitai o le Itu Agai.

Afioga Hon PALUSALUE FAAPO II: Ia e pau lava le mea lea na ou tulai atu ai lau Afioga i le Fofoga Fetalai, o le avega i le atunuu, o le faamamafa avega le mea lea, aua o lea ua saunoa mai le Minisita o le PUMA, e sao lelei, lelei le faamoemoe o le Tulafono lea ua faatuina ai le PUMA. A o le mea ua tupu, ua fai ma avega mamafa i tagata e fia faia a latou galuega, fai o pemitā o fale, aumai le approval a le PUMA, aumai le approval a le Matagaluega o Galuega, a o la ua i ai taiala, taiala o le Matagaluega o Galuega e silasila i galuega nei. O lona uiga, tasi lea faamamafa avega o le a feagai ma le atunuu, o palama, ioe. O lea ua saunoa le Afioga i le Minisita o le ala lea o le Tulafono. Ae o la e avanoa le lesitala o le.....e le tau aumaia i se faatulafono ia mea ia o Sosaiete, o lena e faamau i o i le Matagaluega o Fefaatauaiga, faamau i le Ofisa o Lafoga. E silasila i ai i galuega e fia fai, o la e taoto lava ia palama e agavaa i lea galuega ma lea galuega, aemaise o galuega tetele a le Malo lea ma galuega tetele a le aufaipisinisi. A o tua lava i nuu i tua le fale o se aiga o la e fai le nonogatupe i le Housing, toe faaopoopo atu i ai ma nei mau avega, ia o le mea lea ou te tulai atu ai i le mativa o le atunuu o lo o i ai nei, a toe faaopoopo atu i ai ma nei mea e fai, o la e i ai kamuta e mafai ona tosoa le paipa o le sink, o la e i ai kamuta e mafai ona faia le fale le taua....

FOFOGA FETALAI: Sei tuu atu le avanoa i le Afioga i le Minisita.

Afioga Hon Faumuina Tiatia Faaolatane Liuga (Minisita o Tupe): Ou te faamalulu atu i le Taitai o le Itu Agai, faafetai i lau Afioga i le Fofoga Fetalai, ia o le saunoaga masani lava ia a le Taitai o le Itu Agai ia po o le la foi itu o le Maota. O le mea lea e saunoa i ai le Taitai o le Itu Agai, e le totogia e le tagata ia le resitaraina o le Sosaiete, e fai lava e latou a latou Faalapotopotoga. A silasila le Taitai o le Itu Agai ma le Maota i tatou Tala o Tupe, e na o le lua lava ia Faalapotopotoga a le Malo e ave i ai tupe lea e tau

o le community service obligations, o tupe na, na fuafua mo le tagata e vaivai lona tamaoaiga, afai o le a tipi le auala e tai ai le paipa i le maota po o le laoa o le aiga, e totogi e le Malo, e le o toe totogia tagata, a o i lea e totogi ai. A talosaga mai ia le tagata i tua e fai le moli i le auala ona o le fanau, e fai le moli. E fai e ai? E fai e le Malo e totogi e le Malo. E oo foi i le faamama avega i le tulaga o mea nei o galuega mo le atunuu lautele, o lea ua faataatia ai, e oo lava i le VAGST o le eletise, o lea foi e totogi e le Malo, ma o fuafuaga a le Malo e le o taumafai e avatu se avega e amo e le atunuu. Ae pei o le faamalamalama lea, e leai, leai, leai se mea e faaopoopo i le faatulagaina o le Sosaiete a le Au Palama e avatu i le atunuu. O le talosaga lena a le atunuu lautele e ave i le Pulega o le Suavai e ui atu i le Afioga i le Minisita ma tuuina mai ai i le tatou Maota nei pe a faapea o ni tupe e faaagaga e fesoasoani ai i le atunuu. Ma lou faaaloalo lava.

FOFOGA FETALAI: Malo. Faafetai fesoasoani mai e faamalamalama le mataupu i le atugaluga o le sui usufono.

Afioga Hon PALUSALUE FAAPO II: Lau Afioga i le Fofoga Fetalai, e eseese mamao lava mea ia o CSO la e saunoa mai ai le Minisita o Tupe ma le mea lea. O le mea lea o le palama o lou fale, e le faia i se CSO, e aumai i le taga a le tagata e ona le galuega. A resitala nei la palama, e resitala foi i le tupe. O le pemita, e le aumaia fua se pemita e totogi le tupe. O ai la e fafa i ai le totogi lea?

O le mea lena o lea ou te tulai atu ai, a o le CSO e vavamamao lava ma le mea lea e feagai ma tagata.

FOFOGA FETALAI: Malie lau Afioga i le Taitai o le Itu Agai sei tuu atu le avanoa i le Afioga i le Minisita.

Afioga Hon Faumuina Tiatia Faaolatane Liuga: Lau Afioga i le Fofoga Fetalai, se o le faalavelave lea o le Taitai o le Itu Agai o la e gasegase o lea e pei e faapea ai lona finagalo. E leai leai, o lea lava e fai i le taimi lenei. Pe i ai se sosaiete pe leai se sosaiete, o la e lava e totogi e tagata tupe e fai ai mea i totonu o latou maota, e leai se mea e toe faaopoopoina i totonu o le mea lea e saunoa i ai. O la e fai pemita a le PUMA, o la e fai le pemita a le Matagaluega o Galuega, o la e foi e fai le pemita a le Pulega o le Suavai i le taimi nei. E leai la se mea faaopoopo i luga o le mea lea, ma le faaaloalo lava.

Afioga Hon PALUSALUE FAAPO II: Lau Afioga o se mea e fia faasao, e leai se tagata e fai se konekarate e alu e totogi i ana tupe mea ia. E totogi muamua e ia ae faatumu mai e le tagata e ana le galuega. O mea na, o le faagasologa na o galuega, e alu le palama e fai lana pemita e totogi e ia i le taimi lenei, ae ave lana pili i le aiga, e faaopoopo i ai i le pili o le galuega.

FOFOGA FETALAI: Lau Afioga i le Taitai o le Itu Agai, o lea ua maua lou finagalo. O lea ua tali malamalama le Afioga i le Minisita, o le tali foi lena a le Malo. So o se galuega lava, e le o se mea fou lenei mea o le tatou o e vaai pemita ma mea e fai. O le pemita a le kamuta, e aofia uma ai le faieletise, o le palama ma isi mea uma. O lea la e tau tulai mai nei le Tulafono Tau Faaofi ina ia tuumavaevae mea ia. O lea ua saunoa le Minisita e leai se

tau faaopoopo. Ou te le iloa la po o le a se isi tali e toe aumai, o lea ua saunoa e leai se isi tau faaopoopo i luga o le mea lea. O lea ua saunoa manino le Minisita o Tupe, o le tali lena. Ae o le a tatou manino pe a tali lelei aua o lea e i ai le atugaluga, o lou atugaluga ina nei i ai se isi mea faaopoopo i luga atu. A o le aua o le Tulafono Tau Faaofi lea e tuuina mai nei tatou finau umi, o le faaleleia o le matafaioi tau palama e foia uma ai atugaluga ia pei ona saunoa i ai le sui usufono, mama i, mama i, oti i, faaletonu i. O ai? A le lava le suavai ma utiuti le suavai, o lona uiga o lea e tele liki. O lona uiga o le mea e tataua ona fai muamua, fix muamua palama, omai e o i le Water Authority ma vaai po o fea le mea e i ai mea nei e tutupu. A o le tatou talanoa i laisene ma isi mea, o lea o le a tatou talanoa i le mea e aafia uma ai. Ia o lea ua lote le PUMA, o lea ua lote le Soifua Maloloina, ua atili ai ona felefele le mataupu ae tuu le mataupu a le Minisita e a ia le Tulafono Tau Faaofi.

Tulai mai lau Afioga i le Minisita mo le Soifua Maloloina.

Afioga Hon Tuitama Talalelei Tuitama: Lau Afioga i le Fofoga Fetalai, ona o lea ua taua foi pemita ma pili ia e totogi o i latou ua uma ona fai pemita. Ona o lau faatonuga e vaai le uso lea i se taimi o le malologa, o lea la e faafesili atu ai, po o ai la e totogia lou pili pe a ou vaaia le uso lea. O le faafesili lena ma le faaloalo.

FOFOGA FETALAI: Ia saunoa ia, aua masalo...

Afioga Hon PALUSALUE FAAPO II: Lau Afioga i le Fofoga Fetalai, o lea o le a uma. O le agaga tonu lava lea, e leai ma se isi o toe fai fua se galuega, e leai ma se isi. O le tau faaopoopo o le mea lea e fafa i luga o le atunuu. O lea ua saunoa sao lava le Minisita i le tulaga ua i ai le olaga i Samoa nei, ua leai se isi e toe fai fua se galuega. O le mea la lea, o le Tulafono Tau Faaofi lea lau Afioga i le Fofoga Fetalai, ona o le naunautaga ina ia faalelei, a o lea ou te fai atu, o le faaleleiga lea o le a pau le mamafa i le atunuu, ua atili ai le taugata o le faiga o galuega. E lelei lava le Malo ia, i le fale fogafale 15 lea o le a fai, aua e le o ni tupe... o tupe a le Malo. E oo foi i le CSO lea e saunoa i ai le Minisita o Tupe, e le o ni tupe e pau mai le lagi, o tupe o lafoga a le atunuu. E le fai fua la? O le afu o le atunuu. O le mea lea lau Afioga i le Fofoga Fetalai, ia manuia le Tulafono Tau Faaofi.

FOFOGA FETALAI: Malo. Ia, sei tulai mai lau Afioga i le Sui Palemia.

Tofa Hon Fonotoe Nuafesili Pierre Laufo: Lau Afioga i le Fofoga Fetalai, ona e pei e foliga mai i lau faalogologo i le saunoga a le Taitai o le Itu Agai, e le o maua tonu lava le mafuaaga o le Tulafono Tau Faaofi. O lo o i ai le sosaiete a le au palama ua maea ona resitalaina i lalo o le Tulafono o Sosaiete 1952. O le faaauuina la lea o le latou polokalame. O lenei foi Tulafono Tau Faaofi, na aumai i luma ina ua maea ona soalaupule ma le au palama pasi o le atunuu, ua maua o latou tusipasi i le matafaioi tau palama. O lea la e i ai le finagalo ona o le tele o faasea a le atunuu i le le lelei o le palamaina o paipa ma vai i o latou maota ma laoa, lea e mafua ai ona faavae le Tulafono Tau Faaofi lea, ina ia i ai se Faalapotopotoga faavaeina faaetulafono a le au palama. Aua o le tele o faasea nei e matautia le anoanoai o faasea mai tagata o lo o fai a latou galuega i le fauina o latou maota ma laoa

i tagata e le o ni tagata ua pasi i le matata o le palama pe ua pasi atoatoa, a ua o atu faatino galuega nei. O le mea la lea e i ai, ua faaletonu le sooga o paipa, o ofe, ua fai ma papa, ua tupu soo tupu soo. O taimi uma lava e pa ai lea paipa, faaleleia ai lea ofe, faaleleia atu lea gutu paipa ma le a ma le a ma le a. Ia, o tupe na o lea e alu a tagata. O le mea la lea ua tupu nei, ua matua taugata i nai tagata o lo o i ai galuega le tulaga lea o tagata faapea ua pasi atoatoa.

Afioga Hon Palusalue Faapo II: Lau Afioga i le Fofoga Fetalai o se mea e fia faasao.

FOFOGA FETALAI: O le a tuu atu le avanoa pe a uma le faamalamalama a le Sui Palemia.

Tofa Hon Fonotoe Nuafesili Pierre Lauofo: O le agaga la o le Tulafono Tau Faaofi lea, ina ia resitala palama ua pasi lelei ma maua tusipasi e faatino galuega tau palama ina ia lelei ma atoatoa le faiga o galuega ona umi lea o se taimi o lelei paipa ma le tulaga o le suavai i le faasoaina o le suavai, faapea foi i totonu o maota ma laoa i le tulaga o le faatinoina o le galuega, umi. A umi la, e le tele se tupe e alu i le toe faaleleia aua o le faasea a isi tagata o le atunuu, toetiiti masina uma masina uma, ona o ituaiga tagata la ia palama e lei pasi atoatoa pe le o ni tagata ua lava le tomai tau palama, ua o atu tagofia galuega nei. O le mea la ua tupu, e uma ifo le tausaga, ua tele le tupe a nai aiga e alu e tau faalelei ai paipa, soogapaipa ma mea uma faapena ma mea faaletonu ona o le le lelei ona faatino o le galuega.

Afioga Hon Palusalue Faapo II: Lau Afioga i le Fofoga Fetalai, o le mea e fia faasao, ona o lea o le a see ese le Afioga i le Sui Palemia.

FOFOGA FETALAI: E uma ou avatua le avanoa le Taitai o le Itu Agai. Onosai mai e lelei lava le saausi ona malamalama lea.

Tofa Hon Fonotoe Nuafesili Pierre Lauofo: Ae a lelei ona faatino o le galuega, e tasi lava ae fia tausaga o lelei. O le faamamaavega tonu lena i le atunuu, lea e mafua ai ona fai le Tulafono Tau Faaofi lena. O lena.

FOFOGA FETALAI: Ia, tulai mai le Taitai o le Itu Agai.

Afioga Hon Palusalue Faapo II: Lau Afioga, o lea ou te talanoa atu i le mea o la e tupu i tua ma nuu i tua. O mea ia e te saunoa mai ai, o faletetele o le Malo la e fai. O lea e te saunoa manino, o le sosooga o le paipa ua liki, o le faiga o le gutu o le paipa, e mafai ona ou faia, e mafai ona fai e le tamaitiiti e faatonu i ai e sosoo le paipa. O le mea tonu lava lena, o le reality lena o le mea la e tupu i tua e le toe manaomia ai le avatu o ni tagata e resitala. O fea la o i ai le faamamaavega lea e te saunoa i ai? O galuega i tua lea ou te fai atu ai. O lou fale Samoa lea ua fai le sink, e mafai ona fai e le kamuta po o se isi o le aiga.

FOFOGA FETALAI: O lea ua maua lou finagalo le Taitai o le Itu Agai. Sei tuu atu le avanoa sei tali mai le Minisita mo Galuega, Felauaiga ma Atinae Eseeese e a ia le Tulafono Tau Faaofi.

Afioga Hon Manualesagalala Enokati Posala: Ou te talosaga atu i lau Afioga pe a tuu mai loa le avanoa sei ou tali atu ai atonu e i ai nisi vaega, a o lei tulai mai nisi sui usufono e tau faamalamalama ai.

FOFOGA FETALAI: Ia, e pei e sili lena leaga o lea e i ai le mea tele e le o mafai ona malamalama, o ituaiga galuega. E i ai lava galuega e faaoga ai le certified plumber, e i ai foi galuega e faaoga i ai le faiai o le tagata e ona le galuega. E le faapea o le a tulituliloa galuega seiloga o se tamai paipa ua mamulu ae aumai se certified plumber e faia. O le mea e tatau ona tatou fetuunai, ae aua le tosoa mai fua le galuega o le masei o le tamai gutu paipa a o le a aumai ai le certified plumber e faia. O le ala lena o lea e taumafai atu e tuutuu mai le mataupu i le ogatotonu. O lea ou te malamalama lau Afioga i le Minisita. O le agaga foi lena ia atoa usu finagalo ona aumai lea o lau tali aloaia e te faamanino, o oe e ona le Tulafono Tau Faaofi. A o le lau atu o finagalo o sui usufono e tau ina matimati ai ae tau faamalamalama, ae sili lena.

Tulai mai e te saunoa i mea ia leaga ua fai si tutua o mea ia e avatu ona manino ai lea ma malamalama ma faasolo le tali mai.

Le sui usufono mo Faasaleleaga Nu.4, e i ai se mea...

Afioga Peseta Vaifou Tevaga (Faasaleleaga Nu.4): Faafetai i lau Afioga i le Fofoga Fetalai.

FOFOGA FETALAI: E le o le tali faaiu lea a le Minisita, na ona tali i mataupu ia na laga, ae o lea e tuu atu le avanoa. Tulai mai lau Afioga i le Minisita mo Galuega, Felauaiga ma Atinae Eseeese.

Afioga Hon MANUALESAGALALA ENOKATI POSALA: Faafetai i lau Afioga i le Fofoga Fetalai, ma ou te talitonu e piiama foi i le talosaga molia i lenei taeao, o lea ua mafai ona faaauauina le tatou Fonotaga lau Afioga ma le maualuga o lenei Palemene, aemaise foi o aoga o lo o mafai ona tatou faatasi, o alo ma fanau. Ia manuia tele le feagai ai ma aoga. Ou te iloa o le Tulafono Tau Faaofi e pei ona tuuina atu i le amataga, o le Tulafono lenei pei lava ona matou faafetai i tamalii ma failauga o e o lo o i ai le tomai ma le agavaa, o i latou nei sa lagalaga le mataupu, sa omai ma lagolagosua ma le Matagaluega ma le Malo ina ia faia se Tulafono ina ia mafai ai ona amanaia o latou sao, ma o latou tomai ma agavaa. E le o se mea na afua atu, ae o le galulue faatasi e pei lava o le tulaga foi lele i le partnership, o le galulue faatasi o le Malo, o le private sector, o le civil society, e mafai ona galulue e atiae ma faatino galuega ia atoatoa ma ausia tulaga lelei.

O le taatiaga atoa la lenei, lea na oo mai lava le savali, e pei foi ona saunoa le Palemia, e i ai foi isi professions. E i ai isi vaega ia o lo o agai mai e pei o le au tusiata ma vaega uma na, ua ese le tulaga ua i ai tatou i lenei vaitaimi, ua tele le suiga ma le atinae, o le tomai ma le technology, o mea uma na ua tatau foi la ona agai tatou e faatulafonoina ma agai ina ia manino ma malamalama ausia tulaga e tatau ona faatino ai galuega, e so o se trade lava, so o se matata, so o se matafaioi. O le tulaga lena, e le mafai ona tatou nofonono ai lava. O le tulaga foi lena o lo o i ai i nuu i tua, ma tele ai tulaga tau palama, tele le faaletonu. E le gata i atinae a le Malo o lo o feagai ai o

faletetele, ae faapena foi o tatou aiga, ua seasea fai se faleoo, ua fai lava le fale e tolu potu moe ua i ai i totonu mea uma, o palama. O lona uiga, ua tataua ona siitia le auunaga ina ia ogatasi. E tele tupe alu pe a le lelei ona fai. A le lelei ona fai pei ona saunoa le Afioga i le Sui Palemia, e sili atu ona tele seleni. A o le agaga maua luga lena o lea e faatino ai le Tulafono Tau Faaofi leni, e faaauau. A i ai le sosaiete a o lea ua taumafai i se tulaga aloaia ina ia aloaia ai tulaga tau palama. Sa momoli le agaga faafetai ona o le silasila mamao o tupu ma ee o le atunuu o lo o i ai tomai ma agavaa ia ua mafai ai ona lagalaga ina ia faatino leni faamoemoe. O le Tulafono Tau Faaofi lea ua fausia, na o se auivi, o se framework o le Faalapotopotoga lea ina ia maua ma faamauiina ma resitalaina o latou tomai ma tulaga tau palama. O totonu foi o le Tulafono Tau Faaofi lea e tofiaina ai le Komiti o Pulega. O le Komiti leni o Pulega, e feagai ma galuega tauave ma malosiaga e iloilo ma fai ai faaiuga o le resitalaina o sui auai. O le fuafuaina o taiala faavae po o le faatonutonuina o agavaa ma tulaga faataatitia e talafeagai mo le faamauiina o tagata tomai tau palama. E i ai foi vaega e tataua ona silasila i ai, e i ai Tulafono Faatonutonu, o Rules ma Regulations. E tasi na vaega ina ia mafai ona ausia le standard e faatino ai galuega. O tapenaga uma lava ia e i ai e lafo uma lava i le Komiti lea o Pulega ma le Faalapotopotoga lea ina ia matua soalaupule ma vaavaai i tulaga uma e pei ona tataua ona oo i ai le faatinoga o le auunaga ma taiala e tataua ona laasia.

O le Komiti foi la lea o le Pulega, o latou foi e fuafuaina le eseese o le maua luga o le tulaga o sui auai aua e talosaga sui uma, ona avatu lea faatulaga e latou i faailoga, o tomai ma agavaa. E oo lava i lalo i le aperature. O la lava e faaoga e galue i lalo o se vaaiga a se qualify plumber. O le tulaga lena, o lona uiga e eseese categories o lo o fuafua i ai sui auai e fua i totogi o le atunuu, tomai ma agavaa o lo o i ai. O lona uiga o i ina o le a agai ai e fau ia lelei le Faalapotopotoga leni i vaega uma e tataua ona silasila o mea ia e tataua ona lelei ai le faatinoga o galuega.

O lea sa laga mai le tulaga lea i suavai tumaoti. O tulaga masani lava na, tasi lea sao e tuu i ai i totonu o le Faalapotopotoga leni aua o lea e faasalalau faataufofo le tusiga o ata ma le vaaiga o galuega – design and supervision i atunuu i fafo. E i ai kamupani o lo o omai i fafo o lo o galulue faatasi e partnership ma local counterpart i totonu o lo tatou atunuu. O lona uiga e mafai ona vaai i ai i kamupani ia o lo o galulue faatasi ma kamupani mai fafo, e tataua ona i ai se sui i totonu o le Sosaiete leni ina ia mafai ona mataitu ai le faatinoga o galuega. E tataua foi ona i ai se sui o le Faalapotopotoga lea i totonu o le Evaluation Panel lea e faatinoina galuega ina ia mataitu lelei ma aloaia ai lo latou tulaga i totonu.

FOFOGA FETALAI: Ou te vaelupeina le saunoaga a lau Afioga i le Minisita ona ua tatou taunuu i lo tatou taimi malolo. O le a toe tuuina atu le avanoa e faaauauina ai lau tali faatasi ai ma avanoa mo sui usufono mamalu pe toalua pe toatolu o totoe o lo o fia saunoa, ona faauma ai lea o le felafolafoaiga i leni Tulafono Tau Faaofi.

Ou te faasilasila atu o le a faataatiaese Taualumaga a le Fono Aoa mo lana malologa masani o le taeao.

Na faataatia ese Taualumaga a le Fono Aoao i le itula e 10:45 i le taeao mo lana malologa masani ma toe faaauau i le itula e 11:27 i le taeao.

FOFOGA FETALAI: Ou te faasilasila atu ua toe amatalia nei Taualumaga a le Fono Aoao Faitulafono. E talitonu le manatu ma le lagona i lenei vaega o le aso, o le a tuu atu pea se tuualalo a le Nofoa e ala i le faasologa o a tatou galuega ina ia tausisia lo tatou taimi amata ma le tatou quorum e amata ai a tatou galuega. O lea lava tatou te tuli tatao le taimi ona o le tuuina atu o avanoa e maua ai la outou faamalosi tino ma la tatou malologa, ae tatalo atu foi ina ia usitaia o tatou taimi amata ma taualumaga o le tatou Fono.

TULAFONO TAU FAAOFI O TAGATA TOMAI TAU PALAMA 2013 – felafolafoaiga i luga o le faitauga faalua

FOFOGA FETALAI: E faia le tatou malologa o lo o faapena ona talifuaitau le Afioga i le Minisita mo Galuega, Felauaiga ma Atinae Eeseese e a ia le Tulafono Tau Faaofi o Tagata Tomai Tau Palama 2013, a o lo o i ai foi nisi o sui usufono o lo o taumafai e tulai atu ona o le fia faaalua o finagalo. O lea ou te tapa ai lau Afioga i le Minisita mo Galuega, Felauaiga ma Atinae Eeseese e a ia le Tulafono Tau Faaofi e tulai mai e faaauau le saunoaga.

Afioga Hon MANUALESAGALALA ENOKATI POSALA: Lau Afioga i le Fofoga Fetalai, e momoli atu le faafetai tele aua atonu o lea ua to i tua Apolima ua maea foi ma palega auau le taliga o le sua i le maualuga o lo tatou Maota Fono nei. E momoli foi le agaga faafetai tele i lau Afioga i le Fofoga Fetalai ma le Ofisa ona o taumafaiga e ala i taumafa sa tapenaina.

O le agaga autu lava o lenei Tulafono Tau Faaofi e pei ona tuuina atu ma faamalamalamaina, o le tulaga ina ia faatumauina – sustainability ma le tulaga i le tau – cost saving e tasi le taimi e faatino ma fai ai galuega ia, ae umi se taimi o tumau ai pea tau ia. E taugofie atu i lo le fai pea, fai pea, fai pea, e le gata i le fai soo ae afaina ai maota ma laoa.

O le tulaga i le faatinoga o galuega ia e pei ona sa ou taua i suavai tumaoti. O lo o faatino lava i nuu i tua ma alaafaga ma tuuina atu ai i Komiti o nuu le vaaiga o suavai ia, a o le Tulafono Tau Faaofi lenei o Tagata Tomai tau Palama ma maua agavaa, atonu o le a se i silasila totoa i ai. O le faatinoga o galuega ia e kamupani, e talitonu foi o le a i ai le sao o le Sosaiete lea o Tagata Tomai tau Palama e silasila i ai e tatao i le taimi e aumai ai tauofoga ona i ai se tagata e tomai faapitoa i totonu o le Faalapotopotoga ina ia mataituina le faatinoga o galuega. Afai e le lelei, e i ai foi aafiaga o le tagata lea e tomai i totonu o lea kamupani sa faatinoina le galuega e silasila ma vaavaai i ai le Faalapotopotoga mo le agai i luma.

O le isi mea ou te lagona e tatao lava ona faamautuina e le Faalapotopotoga lenei, o Komiti ia o nuu ia e vaaia suavai. Aua a maea galuega ona tuuina atu lea ia i latou e faatinoina le galuega, aua o le tele lava o nai o tatou nuu e pei foi ona faaalua ua i ai le experience po o le tomai foi lele e faatino ai galuega e aunoa ma ni faailoga, ae e tatao lava ona fai se fuafuaga i lea vaega, ia silasila afai e i ai se sui o le nuu e agavaa i totonu o le Komiti lea, e mafai ona certify mai e le Faalapotopotoga lea e faapea o lea e i ai se tagata i totonu o

lea nuu e mafai ona faatinoina le galuega lea ma galulue faatasi aua o le tasi lea o faaletonu o i ai o le palu faasolo atoa e Komiti ia o nuu, ae e le o i ai se agavaa o i ai ma ua tele ai le suavai e maumau ma le lelei ai ona faatino galuega, a o le aoga lea o le Faalapotopotoga ma le Tulafono Tau Faaofi lenei ina ia silasila i o tatou nuu o lo o i lalo o vaega tumaoti le suavai. E pei o laasaga na o lo o agai i ai le taua tele o lenei Tulafono Tau Faaofi.

O le vaega e pei ona laga o a tatou talosaga. E i ai talosaga ia sa tuuina mai mo suavai, ae e pei o le mataupu lea tatou te talanoaina o le Tulafono Tau Faaofi mo Palama, ae i ai talosaga sa tuuina mai ona o le suavai, a o lo o fai lava feutagaiga. O lo o fesootai lava Ofisa e pei o Satapuala ma Aana Nu.1. O lo o fai lava fesootaiga ma e i ai faaletonu o lo o i ai ona e fai sina mauaululuga o tulaga o faleaoga ia ma le tulaga o lo o taatia ai le laina. E i ai la taimi e gafatia ai le oo i ai o le suavai, ae i ai foi taimi e faaletonu ai. E talitonu ona ua faaopoopo aiga ua nonofo ai i le va lea ma utiuti ai lava le faasoa o le suavai o lo o latou maua. O le a vaavaai pea i ai ma taumafai e foia ia faafitauli.

E sao le tulaga lea i le liki. O le tausaga e 2012, o le leakage e 66% lea sa i ai. E oo mai i le taimi lenei o lo o faatino ma o ananafi na ou sainia ai le konesale o lo o faaauau i le isi 12 masina le tulaga i le vaavaaia pea o le suavai maumau. I le Pulega o le Suavai na o revenue water e le o mafai ona maua mai ai se tupe. O i ina la o lo o vaavaai pea i ai le Pulega, atonu o le 2012 e oo mai i le taimi lenei ua i ai se suiga ona o lo o fai lava sailiiliga ma iloa ai vaega o lo o i ai afaina nei, ona sui lea o paipa ma fai i ai nisi auala e foia ai le tulaga lea, ae ou te iloa ua pau mai i lalo le pasene lea sa i ai i le 2012. Atonu o Iuni i le tausaga nei o le a mautinoa ai se tala i le tulaga ua i ai le pasene o le suavai lea ua maumau.

O Faasaleleaga Nu.2, e tumau pea le auaunaga a le suavai ma e fai lava le auaunaga lea i mita ma o le isi lea auaunaga tele o lo o faatino pea o le lipoti mai ua tetele a latou pili, ona o atu lea o le Pulega o le Suavai e vaai ma matauina ai, ua felavasai solo paipa. O lona uiga o le tasi lea o pine ma molimau i le leai o se agavaa faapalama o lo o faatino ai galuega i tua i o tatou aiga ma nuu ona ua tele le liki ma tele le faaletonu. Ona uma lea o le siaki, fautuaina, faatino ma lelei ma ua tuumamaina foi a latou pili e pei ona i ai. O le tulaga lea e faaauau pea le galuega a le Pulega o le Suavai aua o le mea e sili ona taua o lea o le a galulue faatasi ma le Faalapotopotoga, e tatau ona i ai se faiga e vaai muamua se tagata o lo o i ai le agavaa faapalama na te vaaia ma siaki po o ua atoatoa, ona fesootai lea.

E pei foi o le faiga o le eletise lea e i ai, e i ai le fai moli e avatu lava e le aiga latou e faia le latou moli, ona omai foi lea e certify mai ua lelei ma atoatoa, ona o atu lea o le vaega a le EPC ua faafesootai. O le tulaga lena o le a vaavaai i ai i connections ia e fai o le suavai, e tatau lava ona i ai se lipoti mai se tagata o lo o i totonu o le Faalapotopotoga lenei o la sa ia siakiina ua lelei ma sosoo le suavai ina ia aua ne i tele se suavai maumau, ma afaina ai tupe pe afai e tetele a latou pili ona o le leaga ona faatino. A o lalo foi i le Tulafono Tau Faaofi, o lea e manino mai, e mafai ona faatino e le tagata i lona lava fale. O la e i ai i totonu o le Tulafono Tau Faaofi i galuega laiti. Afai e afaina se paipa, e mafai ona faatino e ia. O le taumafaiga lena e faamama avega. A o le tulaga foi lele mai le amataga, e tatau ona i ai se faiga lelei ma aloaia ina ia mafai ona aua ne i afaina tele aiga.

FOFOGA FETALAI: Malie lau Afioga i le Minisita, sei tuu atu le avanoa i le faauilavea.

Tofa Levaopolo Talatonu: Faafetai lava i lau Afioga i le Fofoga Fetalai. E puupuu lava se mataupu e fia malamalama ai ona ua tau see ese le Minisita ma le tulaga lea o a tatou suavai foi ia ua maumau e tusa ma le 66%.

O lenei mataupu lau Afioga i le Fofoga Fetalai ua fai sina umi ma ua lata i le sefulu tausaga talu ona tulai mai. Na ona fesili atu lava ona o le tulaga i le tele o a tatou seleni ua alu i le tofogiina o lea atinae ma lea atinae ma polokalame i le tulaga lea, a o le a tonu lava se vaitaimi e foia ai le faafitauli lea?

FOFOGA FETALAI: O lea ua maua le finagalo o le sui usufono mamalu. Mo le faasaoina o le taimi, tulai mai le Taitai o le Itu Agai.

Afioga Hon Palusalue Faapo II: Faafetai lava i lau Afioga i le Fofoga Fetalai. O le mea tonu lava lea na oo i ai lau lauga. O lea la ua manino mai e palama le fale ona alu atu lea o le tagata o le Faalapotopotoga Palama e siaki po o ua lelei le palamaina. O lau fesili la lau Afioga i le Minisita, e alu atu fua la le tagata lea pe totogi e le Malo aua o le isi lea tau faaopoopo o le a i luga o aiga?

FOFOGA FETALAI: O lea ua maua, tulai mai lau Afioga i le Minisita.

Afioga Hon MANUALESAGALALA ENOKATI POSALA: Lau Afioga i le Fofoga Fetalai, o le tulaga lea na ou taua, o la e faatino galuega ma o galuega e faifai pea, o galuega ia o le siakiina o suavai maumau aua o paipa e sosoo e i ai ona aafiaga. Afai o mafuie ma vaega e ono aafia ai le taotoga o paipa ia, a o le mea e sili ona taua o la e agai le Pulega ina ia siaki ma fai i ai se fofo ina ia foia le faafitauli lenei. E pei lava ona ou fai atu, o la e spot e le Pulega vaega o lo o tele ai suavai maumau, ona o atu loa lea toe sui paipa ia, ae faataatitia paipa fou e sui ai. O le faiga lena ma le latou polokalame o lo o agai i ai. Ae atonu o Iuni i le Tala Faatatau o le Tupe o le a manino po o le a se suiga o lo o i ai. E pei ona ou fai atu, o lo o faaauau pea le galuega a konesale o lo o fesoasoani mai mo le vaaia o ia vaega.

O le tulaga lea i le faaaogaina o palama e i ai agavaa, atonu pei o le matou fai atu, o le auivi lea ua faataoto e le Faalapotopotoga ae i ai rules ma regulations o Tulafono ia e faafoe ai o lea e le i agai tele i ai le Pulega o le Komiti Faatino ma le Faalapotopotoga. A o vaega ia afai e... ia ona oo atu foi lea i le Kapeneta, e silasila i ai le Kapeneta i tulaga ia ma saina ai Lana Afioga Mamalu O Le Ao o le Malo i tulaga masani o le faatinoga. O lona uiga o le a faaauau pea galuega ia pe afai e faatino le tatou Tulafono Tau Faaofi ma le Faalapotopotoga lea, ma faapena lava ona i ai a latou polokalame e faafoe ai ma faatonutonu ai le latou Faalapotopotoga ma le agai i luma. O le tulaga....

FOFOGA FETALAI: Ia malie lau Afioga i le Minisita sei tuu atu le avanoa i le Taitai o le Itu Agai.

Afioga Hon Palusalue Faapo II: Lau Afioga i le Fofoga Fetalai, o le faigofie ia o lau fesili, o le faigofie ia. Pe i ai se totogi faaopoopo i luga o le

galuega pe a o atu la le au palama lea e siaki le galuega, ae pe fia foi? O lea e faafofoga mai le atunuu i a latou galuega lea e fai...

FOFOGA FETALAI: O lea ua maua le Taitai o le Itu Agai lou finagalo. O lea sa tali manino le Afioga i le Minisita o Tupe analeila, e leai se tupe faaopoopo. Ou te le maua la o lea ua manino le tali a le Malo, o inspections lava ia i house inspections a le Malo, e i ai lava le vaega o lo o faafoefoeina tulaga ia. E i ai foi le vaega o le asiasiga o vai lafoai, ou te talitonu o lo o aafia ai, ae tulai mai pea lau Afioga i le Minisita mo Galuega, Felauaiga ma Atinae Eseese.

Ia, tulai mai lau Afioga i le Palemia.

Susuga Hon Tuilaepa Fatialofa Lupesoliai Aiono Neioti Sailele Malielega: Lau Afioga i le Fofoga Fetalai, o mea nei o asiasiga ia e fai nei, e leai se eseese ma asiasiga i le fale, galuega masani. Masalo ana manatua e le Taitai o le Itu Agai i le taimi foi sa Minisita ai, e le o suia lava se mea. A alu lava a latou asiasiga, o vaega o le galuega. E faapena foi pe a o le vaega lea sa i lalo o oe e asiasi telefoni ma asiasi moli o le taulaga. O ai o le a tuu fua i ai e le o galuega tauave ia a le Matagaluega? Lau Afioga, o lea ou te malamalama lelei, e te tau taalo polokiki, se o mea na ua leva ona matou tiaia. O pepa na ua leva ona tatiai. O lea ua uma ona faamatala atu e le Minisita, o galuega masani e faifaipea, o mea na a le Malo.

FOFOGA FETALAI: Ia, tulai maia lau Afioga i le Minisita e faaauau le saunoaga ae lei toe tuuina atu le avanoa.

Afioga Hon Manualesagalala Enokati Posala: Faafetai. O tulaga lava na, e le mafai ona tatou maua ma le faigofie se mea e saili ma se mea e tatau ona agai i luma ma lelei ma mautu.

O le sui usufono mo Faleata Sisifo i le tulaga o le resitala i tausaga taitasi, atonu o vaega ia o le a vaavaai i ai le Komiti o Pulega ma le Faalapotopotoga i tulaga o sui auai ma le tulaga o tupe maua a tagata taitasi, e fua foi i ai le tulaga o le tau o le resitala lea e fai. E le o se mea o pulea atu i le Tulafono, o la e lafo e faatino lava e latou i le fua e iloa o tupe maua ia o lo o maua e sui auai taitasi. Ma o tausaga uma. O lona uiga, o le tulaga lena o lo o i ai, o tausaga uma, e fua foi la i ai le tupe e tatau ona gafatia. Afai o la e naunau mo le latou Faalapotopotoga ia tupu ma ola, e faapena foi ona fua i ai le latou saofaga. A o tausaga uma, e tatau lava ona faatino ia iloa o la e lava e tumau pea sui auai o le latou Faalapotopotoga ou te iloa e gafatia ai vaega ia.

Ou te manatu o le tele o isi vaega ia ua uma ona taua e pei o le tulaga i le vai tumaoti ma galuega a Komiti e pei ona tuuina atu ai. O faasalaga, atonu o le naunautai e leai se manatu e faamamafa se faasalaga, a o le agaga maua la e i ai ia lelei le faatinoina o galuega, ia faamaoni sui auai ma ia mafai ona fai i le tulaga e ausia ai le mautu ma lelei. A o le agaga i faasalaga, se i tau taofiofi ai le taua o le galuega faa-palama o la e agai i ai. E ala foi la ona faasala ua matua leai lava se manatu e fai ia lelei le galuega. Ae afai o i ai se agaga e faatino ma lelei, e leai foi se faasalaga tau tupe o le a aafia ai sui auai.

E pei o le tulaga lena, ae pei ona matou faailoa atu o i ai vaega o le a vaavaai i ai le Komiti o le Pulega ma le Faalapotopotoga ina ia fausia ia lelei, afai e

maua le tonu i lea vaega ma tuuina atu i le Kapeneta e silasila i ai pe talia pe leai, ia ma saina ai Lana Afioga Mamalu O Le Ao o le Malo i Tulafono Faatonutonu ia.

E pei o le atoaga lena o e na tulai mai e faaali finagalo e tusa ai ma lenei Tulafono Tau Faaofi.

FOFOGA FETALAI: Malie lau Afioga o lo o tulai mai le Afioga i le Minisita mo Aoga, Taaloga ma Aganuu, ae ua ala ona ou tuuina atu le avanoa lau Afioga ona ua manao e faamanino vave le finagalo na atugalua i ai le Taitai o le Itu Agai lea sa tuu atu ai le avanoa. O lo o i ai nai sui usufono sa faailoa mai le fia lauga, o le sui usufono mo Falelatai ma Samatau, o se tasi o sui usufono mo le Au Palota Taitasi, Afioga Maualaivao Pat Ah Him, faapea foi se tasi o sui usufono mo Falealili, Tofa Tusa Misi Tupuola. A maea loa lena ona tuu atu loa lea e tali le Afioga i le Minisita mo Galuega, Felauaiga ma Atinae Eseeese i lana tali faaiu.

Ae tulai mai lau Afioga i le Minisita mo Aoga, Taaloga ma Aganuu.

Afioga Magele Mauiliu (Minisita mo Aoga, Taaloga ma Aganuu): Lau Afioga i le Fofoga Fetalai, ou te tulai atu ma le faaaloalo e fia faapoo i le saunoaga a le Afioga i le Minisita mo Galuega, Felauaiga ma Atinae Eseeese ona e i ai vaega taua sa afea i saunoaga a sui usufono e aafia ai le tulaga tau aoaoga, o le taualoa o tusipasi aemaise foi o le vaega lea e i ai le poto masani, ma ou te manatu e tatau ona malamalama. Ae ou te fia amata mai i le amataga ina ia malamalama aemaise foi le faafofoga mai a le atunuu. O aoga o matata eseese o lea ua faatinoina e le tatou Iunivesite ina ua uma ona tuufaatasia ma le aoga sa i ai o le Aoga Faapitoa o Matata Eseeese tausaga 2006, ua siitia atu ai i le tatou Iunivesite ma ua faapea ona faaauau e oo mai i le taimi nei. O le taimi nei e iva a tatou matata eseese o lo o faatinoina e le Iunivesite, o le inisinia o taavale, o le faimoli, o le gaosiga o totoga o masini, o le fausia o fale, o le uelo po o le soo uamea, o le ea malulu ma pusaaisa, faia o tino o taavale ma le vali taavale, o le palama, o aliivaa po o alii ma tamaitai vaa. O matata ia o lo o aoaoina i le tatou Iunivesite, ma o se tama po o se teine e fia avea ia matata, ua faatulaga foi le maualuga o togi e tatau ona maua mai a tatou suega o le SC faapea foi ma le suega foi lele i le Vasega 13 po o le PSSC, lea ua suia nei i le Samoa Secondary School Leaving Certificate. Ma e tatau ona lelei le numera, igilisi ma se isi mataupu faa-saienisi. O lo o mafai foi ona ulufale i ai tamaiti mai le Don Bosco faapea foi le Laumua o Punaoa, a o lo o ua i ai faiga faapitoa i le va o le tatou Iunivesite ma aoga ia e mafai foi ona ofi atu i a ii latou mai le vaega lea.

O aoaoga i le vaega lea e lua tausaga, a o tatou standards e faaaoaga, e le o ni standards a le Iunivesite. O standards e faaaoaga ma requirements o matata taitasi, o le mea lena e pule ai le falefaigaluega, le industry mai lea taimi i lea taimi, e fonu i latou le komiti ua faaigoaina o trade advisory committees po o panels a matata taitasi e pei foi la o le palama, ona ave lea o le feau i le Iunivesite, o mea ia matou te mananao tou te fetagofi e aoao. O lona uiga, e le faia se aoaoga i se mea e manao ai le Iunivesite, e fai i luga o le fautuaga a falefaigaluega ma e ona pisinisi. O le lelei lea o aoaoga, aua foi o la e fai tonu lava i manaoga o falefaigaluega ma e ona pisinisi. Mai le vaega la lea e lua tausaga, ae a iu mai, ona iu mai lea ma le tusipasi. O le a ou oo mulimuli mai i le SQA ona faailoa atu lea po o fea le mea e tu ai le tusipasi lea. A uma le

lua tausaga, ia, ona oo lea i le isi ituaiga aoga lea e faipaaga ai foi le Iunivesite ma le Matagaluega o Leipa, e taua o aoga faa-aperenitisi. O i la e ese le taua, aua o i o le a faigaluega ai le tamaitiiti full time, pe tasi pe lua itula o le vaiaso e toe foi a ii le Iunivesite mo isi aoga mea tau theory. A o le tele lava o le taimi ma le lelei o le polokalame lea, e faamoemoe i le lelei o le tagata le employer, po o le tagata na te aaoina le tamaitiiti lea. O lona uiga e le tuufaua, o lea ua uma ona saina le konekarate ma le labour, o le tamaitiiti lea o le a faigaluega i lou falefaigaluega, o ai le tagata e vaaia le palama lea, o le a lana qualification, o standards ia e tataua ona achieve. A uma loa la le isi lua tausaga faaopoopo ma ausia mea o itula, o le mea taua lea o le itula e tuli e le tamaitiiti, o le itula lea e sue ai le poto masani. O le taimi nei e pei lava e 6,000 itula e tataua ona sue e le tamaitiiti. A ausia loa itula ia, faaopoopo la i ai ma le suega mulimuli e fai e le Iunivesite, ona certify loa lea e le Ministry of Labour, a mea o le tamaitiiti lea po o le tamaitai lea ua agavaa i le matata lea.

O le vaega lea e faapea mai ua umi le taimi o i ai le poto masani, ua leva lava ona i ai le polokalame a le Malo i le vaega lea, a o si vaega lea e lei o i ni aoga, le formal education ae ua i ai lo latou poto masani i le matata.

Masalo o le tausaga e 1976 na amata ai le polokalame lea sa taitaia foi e le Ministry of Labour e faipaaga ai ma le tatou Aoga o Matata Eseeese e taumafai ai le vaega lea e le i i ai se tusipasi aloaia mai se aoga ina ia ave i ai lea faamanuiaga. O i latou la ia o le mea sa fai ma o lo o fai pea, e ave faasalalaua, a ua i ai nisi ua lima pe ova atu tausaga o faigaluega ae le i aoga i se matata eseese e fia sue se tusipasi, e i ai la tusipasi na e lua o latou level o le trade certificate mo le vaega lea tulaga muamua ma le tulaga lua. A talosaga mai loa tagata ia, ona faasino foi lea i le tatou Iunivesite e fai ai ni a latou aoga, pe taitolu pe taifa i le lima vaiaso. A o nei aoga e le matele i le suega o le tomai aua o lea ua faaoga lava le tomai lea sa i ai. A silasila foi i ai le Komiti ua lelei le tomai, ae mafuli i le vaai lea po o mafai e le faimoli ona mulimuli i Tulafono po o le palama foi. Aua o Tulafono nei e faaoga e tatou, o Tulafono lava a Niu Sila sa mafai ona adapt mai foi lele ma tulaga faapena.

FOFOGA FETALAI: Malie lau Afioga i le Minisita mo Aoga, Taaloga ma Aganuu se i tuu atu le avanoa i le faauilavea a le sui usufono ona o ia lea sa lauga tonu i le mataupu lea.

Tulai mai le sui usufono mo Faasaleleaga Nu.4.

Afioga Peseta Vaifou Tevaga: Faafetai tele lava mo le avanoa lau Afioga i le Fofoga Fetalai. E talitonu foi o lo o matagofie lava ma malamalama le saunoaga a le Afioga i le Minisita. E taua tele ona e tasi lea vaega sa ou lauga ai i le taimi ua sola, ona o tulaga lava nei i matata ona o lea ua faalogologo atu i le saunoaga a le Afioga i le Minisita, e peiseai o lea na te aumaia le aofaiga o itula. A faapea ua atoia itula, o lona uiga ua i ai i lea tamaitiiti po o lea foi tagata le tomai lea. O lou foi manatu i lea tulaga, ona e ese foi lou talitonuga aua ua tataua ona vaai i le practical ma sailiiliga i tulaga tau tulafono ma taiala o lea matata ma lea matata. O lona uiga, mai le tulaga lea e aaoina ia le tamaitiiti faa-Aperenitisi, o lona uiga, e tataua ona e tataua ona toe i ai le isi siitaga i luga pe a faapea ua talia lea tamaitiiti ua lelei i ana training. I lou lava talitonuga pe a ou vaavaai i le Tulafono lea i le vaega e 4, ia o lea ua faapea mai, 'e tataua i le Aperenitisi ona galue i lalo o le tagata ua lava le

tomai,' i lalo o le Tulafono fou lea ua aumai. O lea la e avatu ai le fesili i lau Afioga i le Minisita, pe faapefea ona ou mautinoa o tagata ua lava le tomai? Aua e maimau le Apenitisi ae tuu i ai le achievement aua o le faailoga lea po o le tulaga lea, a uma le Apenitisi ona sosoo lea ma le tusipasi lea o le achievement po o lou laisene lena. O lona uiga, ua ia te oe le tomai i le tulaga lena le practical ma suega tau tulafono o lea matata ma lea matata. Ma le faaloalo lava.

FOFOGA FETALAI: O lea ua maua le finagalo o le sui usufono, sei toe tulai mai lau Afioga i le Minisita mo Aoga, Taaloga ma Aganuu e faaii mai le saunoaga.

Afioga Hon MAGELE MAULIU (Minisita mo Aoga, Taaloga ma Aganuu): Lau Afioga i le Fofoga Fetalai, o le vaega lea e pei ona ou taua muamua, e taua tele tagata e vaavaaia on the job, a? O i latou e filifilia le tagata e supavaisaina ia tama ma teine ia, o i latou ia e filifili mai lava e le employer ia le tagata e agavaa, ia ona faapea ona aumai i le Ministry of Labour, ia o i ina la e silasila foi le Labour ia ma le Komiti lea e aofia ai foi ma le Iunivesite, ia ona saina loa o le feagaiga. O le tausaga mulimuli lava, ia e sue ai le suega tele lava e fai i uta i le tatou Iunivesite ia ma toe fai ai la ma ni poloketi foi lele e demonstrate mai ai skills ia sa tatau ona maua e le tamaitiiti. Ma o le tulaga lena e i ai, ona maua ai lea o le...faatasi ai lea ma le ausia o itula ia, o i ina la e iloa ai ua lelei ia lea tama po o lea teine i le matata.

Ona ou oo mai ai lea i le sootaiga lea o tatou tusipasi ma le SQA. O le tatou SQA na faatuina e le tatou Malo i le 2006, o le itutino lea o le Malo e nafa ma le faataatia o faiga faavae e maitauina ai ma ia lelei ai ia le tulaga o tusipasi e maua mai i lea aoga ma lea aoga, o le a ou oo mai ai ou te faalauina mulimuli aoga ia. O latou ia, latou te faataatitia faiga faavae ma set of skills e tatau ona i totonu o lea qualification ma lea qualification, o latou ia e feutagai ma Faalapotopotoga i fafo e uiga la i le malosia o lea tusipasi, ma le skill e maua i lea tusipasi. O i foi e faatoai mai ai ia ni fesili mai fafo. A alu atu nei se tatou tamaitiiti palama alu atu faigaluega i o i le Ukraine for example, e le iloa e o po o le a le tulaga lea e i ai, ia ona fesili mai lea o o ia tatou, Samoa o le a lea qualification? O i la i le SQA tatou te o i ai, a, o i e maua mai ai le tali o latou ia e fesootai i o, o le tusipasi lea o le palama lea e i le Level 4, ona o le level 4 la e i ai skills ia, 1, 2, 3, 4, 5, 6, o i ina la e iloa ai e o le level lea e i ai, o i ina foi e tuu i ai tatou tagata faigaluega po o fea lava le itu o le lalolagi e o i ai? O le faatulagana la e le SQA o tusipasi uma ia a le tatou Iunivesite, ia o lea ua lisi uma i lalo ia tusipasi ia a le SQA faatasi ai, ua uma foi ona lesitala le tatou Iunivesite i le SQA. O lona uiga, tusipasi ia e maua mai i i le tatou Iunivesite faatasi ai ma tusipasi a le Apprenticeship po o nisi lava tusipasi, ia o lea ua uma ona faatulaga i i. O le tatou tusipasi la i mea o certificates ia e fa level lea e i ai, a fesili mai nei po o le a le mea ua fa ai? O lena o lo o outou silafia, e i ai tusipasi foi ia e tasi le tausaga, a, po o le 6 masina, e i ai tusipasi e 1 ma le afa tausaga, e i ai tusipasi e tailua tolu tausaga, o i ina la e fua i ai levels ia, a, ia ma set of skills i lea tusipasi ma lea tusipasi. O le 1 la i le 4, o lea e faataatitia ai a tatou tusipasi. Ona tatou sosoo mai ai lea i le level 5 ma le 6, o i ina lea e faataatitia ai a tatou diplomas, a? A sau le tagata ma le diploma pe offer e le Iunivesite a tatou le diploma, otometi lava, afai o la e

fulfill uma criteria, tuu i i i le level lea, level lea o le five and six, e depend foi i luga o le kind of diploma.

Ia ona tatou oo mai lea i luga o le level lea ua taua o le level 7, lea e faapea mai o bachelors degrees, graduate diplomas and graduate certificates, o lea e faasolosolo lava i luga le maualuga. Ia ona oo mai lea i le level lea o le 8, lea e i ai mea o post graduate diplomas, bachelor with honors, post graduate certificates. O tusipasi ia ua e faia ina ua e maua lou first degree, lea la i le 8 lea.

Ona oo mai lea i le 9, ia o i ina e i ai a tatou masters degree, ia ma le 10, o i ina e i ai a tatou doctorate. Ia ua uma ona faataatitia uma i lalo o le tatou SQA lea ia le faavaa lea o tatou qualification e iloa ai, o lo o amanaia e Samoa nei ia faapea ma atunuu i fafo.

FOFOGA FETALAI: Malie lau Afioga i le Minisita, sei tuu atu le avanoa i le sui usufono mamalu, tulai mai.

Tofa Lealailepule Rimoni Aiafi: Lau Afioga i le Fofoga Fetalai, faafetai. E matagofie le faamalamalamaga a le Afioga i le Minisita, ae e le o talia lau fesili lea na fesili i le Afioga, a maua la lau...aua o le Afioga i le Minisita mo le silafia o le tasi lea palama numera tasi lea e i ai, a maua la lau lesitala lea ma le tatou Tulafono lea e fai, o le a la le grade e i ai? Ae pe faapefea foi la ona tatou mautinoa e talia e atunuu ia i fafo, pe a e alu atu ma lau lesitala lea, aua tasi lea aoga pe afai e moni? Ia o le isi mea o lea ua saunoa le Afioga i le Minisita i tipiloma a o lea ua faasa mai e isi Matagaluega ona toe fai ni diploma a faiaoga, na o degree, pe o le a alu ese foi la ma diploma? Ma le faaloalo lava.

FOFOGA FETALAI: O le a faaauau pea le tali a le Minisita, ou te iloa e lei oo le Minisita i mea tau grade ma trade e faataga ai diploma ma lē faatagaina ni diploma. O le a tuu atu pea lau Afioga i le Minisita.

Afioga Hon MAGELE MAULIU: Lau Afioga i le Fofoga Fetalai, o le tusipasi lea e award nei pe a uma le Apprenticeship, o le tusipasi maualuga lava lea e taatia i i i le level 4, a. O la foi o le a iloa e fafo le mea e igoa o le level 4 a tatou, aua o lea o le a aumai nei fesili mai i le SQA, avatu e le SQA le faamatalaga, ia ona nofo foi lea o latou ma fuafua i le latou foi scale faapea ma le latou foi framework. O diplomas ia e i i, ia e i ai mea o diplomas in engineering e le gata o lea e maua iinei lea ua fai i inei, ae i ai foi tagata mai fafo e omai ma diplomas. E omai la tagata ia mai fafo ma diplomas, o lea foi ua tatou iloa e tatou le mea e tuu i ai, level 4, level 5 and 6, o le faavasegaina ia o a tatou tusipasi. Ma e o tusipasi uma nei ua uma ona lisi i lalo o le SQA, ma e oo foi la i Institutions uma ia e fai aoaoga faapenei, o le tulafono a le SQA e faamalosia le lesitala.

O lea o le a ou lau atua ia i latou ua uma ona lesitala, e aoga foi lea ai o faafogafoga mai le isi vaega lea e lei lesitalaina. O le Australia Pacific Technical Centre APTC, o le Don Bosco Technical Centre, o le Early Childhood Education Teacher Training Institute, Harvest Bible College, Laumua o Punaoa Technical and Vocational Centre, Malua Bible School, Martin Hautus Institute of Learning, National University of Samoa, Oceania University of Medicine, ia o lea ua tuufaatasi nei ma le tatou NUS, Samoa

School of Maritime Academy, o le aoga foi lele a le tatou Samoa Shipping Corporation lea e fai e prepare ai i latou mo galuega i vaa, Small Business Enterprise Centre, South Pacific Nazarene Theological College, Tesese Institute of a Ministries Studies, Uesiliana....

Afioga Hon Palusalua Faapo II: Lau Afioga i le Fofoga Fetalai o se mea e fia faamalamalama.

FOFOGA FETALAI: O lea o le a uma mai le lisi.

Afioga Hon Palusalua Faapo II: A o le mea tonu lava lena o lea ou te tulai atu ai.

FOFOGA FETALAI: Malie lau Afioga i le Taitai o le Itu Agai, sei faamaea ia. Malie lau Afioga i le Minisita, sei fai atu lau tala lea. O lea lava e tuu avanoa ona o le Tulafono lenei, o Palama Aoaoina Faale-Tulafono, o lea tatou te talanoa nei, bush plumber ia lea e tupu ai nei faafitauli. O lea la e faailoa mai e le Minisita, o aoga tonu lava nei e aoga e agai i ai le kegi a tatou lea e i kuaback, lea e tupu ai nei le faalavelave i mea ia o faafitauli lea e tulai mai. Ina ia silafia aua ne i oo i ni faalapotopotoga e lei lesitalaina aua e le taulia a latou specification, ae agai tonu lava i le mea e saunoa i ai le Minisita, o i ina e faamaonia ai a latou certificate, diploma ma ni degree pe a faapea aua o lea o le a grade nei palama, pei foi lava o le faaeletise grade a, b, c, o lona uiga o le tulaga foi lena o le a oo i ai. Tulai mai lau Afioga e faaauau le saunoaga.

Afioga Hon MAGELE MAULIU: Lau Afioga i le Fofoga Fetalai, o lea ua ou iloa atu e sili atu lou malamalama i o i le....O le World Wide Mission Training Centre, RHEEMA Bible Training Centre, ia ma le Leulumoega Fou School of Fine Arts. Ia o tatou providers ia po o aoga ia e 17 o lea ua lesitala i lalo o le tatou SQA e mafai ona latou faia ia polokalame ia, aua o mea uma lava nei e te faaigoaina o matata eseese.

Ona oo mai ai lea o lea ou te fia lau atu ai i latou ia ua amata ona lesitala.

FOFOGA FETALAI: Malie lau Afioga i le Minisita, sei tuu atu le avanoa leaga o le sui usufono lea sa saunoa, tulai mai le sui usufono mo Faleata Sisifo.

Tofa Lealailepule Rimoni Aiafi: Lau Afioga i le Fofoga Fetalai, ou te talitonu o lea e malamalama le Afioga i le Minisita i a tatou certificates ia....ma ranking, a tatou o atu foi la i Niu Sila ma Ausetalia, e i ai foi latou ranking la e i ai – ma o le tele o le mea lea e maua mai, a alu atu le tamaitiiti i inei ma lana faailoa nursing e toe fai lelei suega i faailoga ia a le NUS. Pe mafai la ona faamaonia mai e le Afioga i le Minisita, afai o se tulaga lelei lea ua mafai ona fesootai ma o atu tatou ma faailoga ma faaoga i o, o le mea taua lea. O le isi vaega ona o lea ua laulau mai ia le tele o Bible School, o lona uiga ua le toe faaogaina la le Malua Theological College ma le Piula Theological College, aua foi o le a le toe faaogaina aua o lea e le o sau i le lisi, ia ma le tele o aoga? O lea foi ua fai le Aoga Tusi Paia a le Tautua Samoa. O lau fautuaga i lau Afioga i le Taitai, faaulu le tatou aoga i le SQA.

FOFOGA FETALAI: Ia malie lau Afioga i le Minisita e faasao lou taimi.

Afioga Hon Palusalue Faapo II: Lau Afioga i le Fofoga Fetalai, e ese le aoga o lau faalaulau mai, a o le fesili lava lea e tulai mai, e aoga fua ai la nai palama ia mai tua? E aoga fua ai e totoi e le Malo pe a fia lesitala? Ia pei o le fesili lena.

FOFOGA FETALAI: Ia tulai mai lau Afioga i le Minisita e tali mai.

Afioga Hon MAGELE MAULIU: Lau Afioga i le Fofoga Fetalai, ia e leai se mea e igoa o se aoga fua i lalo o le lalolagi lenei. There's no such thing as a free lunch. E tatau lava ona totoi sina au mea e te galue agai i ai. O lea ua aoga fua a tatou primary schools ma colleges. O le faafesili lea na ou faamalamalamaina atu muamua, o le aoga lea o le framework lea, atonu e leai se atunuu o le lalolagi e te alu atu sao lava ma sau qualification pigi sao i i. E te alu atu faapea mai, e manaia ae sei e sit i le tamai mea lea. E oo foi i tatou fomai, a o atu i o e o atu sit le registration faafomai i atunuu la, e faapena foi i i. E i ai lava le qualification e alu atu sit lelei lava i o, e i ai foi le qualification e te alu atu faapea mai, sei fai la si au tamai suega laitiiti lea. E leai lava se eseese o a tatou... A o le mea taua, na ona alu atu lava o le tagata i o ma le qualification alu atu iinei ma le faamalamalamaga, saina ai le SQA ona uma lea, aemaise lenei vaitaimi i le tele o qualifications foi nei e mafai ona e tago fai i luga o le internet. Ae sei ou lauina atu le vaega lea o lea toetiiti lava uma ona resitala. O le vaega lea o Ierusalem Fou Theological Institute. Ua tele a tatou Aoga Tusi Paia lea e i i. O June Ryan School of Music, Le AMOSA Iunivesite o Savavau, Malua Theological College, Moamoa Theological College, Pacific International Unitech, Piula Theological College ma le Iunivesite o le Pasefika i Saute. O le tele o vaega nei ma le vaega la e ua amata faatalatalanoaga ma e le o toe umi se taimi ona selau pasene lea o le tatou lisi lea ma achieve ai loa le faanaunaga o le Malo na ala ai ona fai le Tulafono ina ia siisii i luga a tatou matata.

Lau Afioga, o le taua lena o le Tulafono Tau Faaofi ua taumafai atu i ai nei le Afioga i le Minisita mo Galuega, Felauaiga ma Atinae Eeseese, o lea e auga faatasi lava ma o tatou faamoemoe a o tatou palama i o e faigofie lava ona maua galuega, e le toe o atu tauapu muamua pe o e fai isi mea, e alu atu lava alu sao i le matata ae alu atu e tetele totoi, faimoli po o le a, ia lafo mai tupe e tele. Ia soifua ma ia manuia.

FOFOGA FETALAI: Malo faafetai fesoasoani mai i lau Afioga i le Minisita mo Aoga, Taaloga ma Aganuu. E taua tele foi lenei mataupu ona o le faamalamalamaina o finagalo o le Maota. O lo o maitauina foi le faalavelave na tupu i Kalaiesetete, e manatu na matua faasalalau aloaia mai i atunuu uma o le lalolagi aemaise Samoa nei ma le Vasa Pasefika i le manaomia o ni faa-eletise ma ni palama ma ni tagata faapea. Out e talitonu o le taua lena o le faataua o qualifications o tatou tagata e i ai tomai faapitoa, ae faafetai ua matua malamalama le taumafai mai o le Minisita e a ia le Tulafono Tau Faaofi.

O lea ua faafogafoga ma le manino sui usufono na tuu atu i ai avanoa e toe saunoa, a faapea o le a sa outou faafogafoga ua kava a ii i le mea ua i ai lo

outou atugaluga, ia lafo atu pea ae tatala atu lava le avanoa ae a faapea e i ai nim ea fou, o le a tuu atu pea le avanoa e tulai mai.

Tulai mai le sui usufono mo Falelatai ma Samatau.

Afioga TAEFU LEMI (Falelatai ma Samatau): Faafetai i lau Afioga i le Fofoga Fetalai, ae sa i ai le faamoemoe e umi lava se lauga, a o lea ua puupuu ona o le saunoaga malamalama a le Minisita. Lau Afioga i le Fofoga Fetalai, e matua lagolago lava i le asosi lea ma le Tulafono Tau Faaofi lenei, e i ai lava le lagona o se mea ua leva ona tatau ona fai, ma e i ai foi le naunautaiga ia oo i isi industry le agaga lea ia fai asosi ia maopoopo. Aua na pau lava lea o le mea e tutusa ai gagana e talanoa ai le vaega lea i totonu, ia maua ai le maopoopoga. O le taimi lenei, a fai lava sata galuega foi lenei, o le palama lava e taugofie. A o le maopoopoga la lea e mafai foi ona autilo i ai latou i standards, o requirements po o specifications o galuega palama e tatau ona ausia iinei i Samoa ma latou Tulafono Tau Faaofi e fuafua mo le plumbing services. O le agaga la atonu e i ai se taimi sau le Tulafono Faatonutonu e manino ai Tulafono Tau Faaofi ma tulaga faapena, a o le agaga lava ia e tatalo atu i lea vaega e tapena mai le Tulafono Faatonutonu sei outou alolofa i le atunuu pe a faapea e faatulaga mai a outou Tulafono Tau Faaofi mo auaunaga, e le faigofie. E le i leva atu foi le Tulafono a Loia ma tulaga faapena, sa tatou talanoa ai foi i Tulafono ma tulaga e tatau ona fai ma le alofa i le atunuu. E pei o le agaga lea na ou mana'o au e faamamafa atili lau Afioga i le Fofoga Fetalai, o le malu lelei ai. O le taimi nei, a sau lava le faimoli po o le palama mai atunuu mamao, e sau lava ia fai lana auaunaga o ia o le palama iinei i Samoa. A o le taua la lea o le Tulafono, e mafai ai ona tuumatamaga ma fai aiaiga, o se isi palama e ulufale i totonu i i, o aiaiga nei e tatau ona ausia. O le itu taua lena ma e tatalo foi, e le gata i le palama ae tilotilo i isi vaega, e iva vaega ia na saunoa i ai le Minisita.

Lau Afioga i le Fofoga Fetalai, sa manatu foi e fia tulai atu ona o le tulaga lea tau aoaoga. Na saunoa manino lava le Minisita ma e leai se agaga e toe uia le ogasami lea. Na pau lava le agaga lau Afioga, o mea e lei manino lelei i le saunoaga a le Afioga i le Minisita, o le tulaga... manatua o le vaitau lenei ua talia foi matured student. E fai la le tala ona e le faapea na o le tamaitiiti ua matua lelei lava ma ausia togi po o maka e ulufale ai i lea matata ma lea matata, ae ua faaoga le mea e tau o le current competencies e fua i ai le malosi o le tamaitiiti po o lona silafia la e ua i ai ona tuu loa lea i totonu.

Lau Afioga e i ai ma le... o aoaoga la lea pei ona atugaluga i ai nisi i le faaaogaina o le gagana faa-Peretania, e i ai lava le agaga ma le maitau ma le totoa i development o le sector lea ua i ai i le education, ua tauau lava ina faamamafa le aoaoga ua ausia e le tamaitiiti, ua faamamafa le practical o le tamaitiiti ua acquire, skill ua acquire e le tamaitiiti, ae le o tusitusiga foi nei o lona silafia. O le mea foi lena o lea ua see ai tatou aoaoga e faaoga le mea foi lenei o le competency based assessment, aemaise lava i mea nei tau trade, ina ia test le silafia o le tamaitiiti ae le o lana tusitusi po o lana Igilisi po o ni tulaga faapea. Aua le faamamafaina le vaega lea ae faamamafa le silafia ua ausia. Na pau lea lau Afioga i le Fofoga Fetalai. Ia manuia le Fono.

FOFOGA FETALAI: Malo faafetai. Tulai mai se tasi o sui usufono mo le Au Palota Taitoatasi, Susuga Hon Papaliitele Niko Lee Hang, sosoo ai ma se

tasi o sui usufono mo Falealili, Tofa Tusa Misi Tupuola sosoo ai ma le sui usufono mo Vaisigano Nu.1.

Susuga Hon PAPALIITELE NIKO LEE HANG (Palota Taitoatasi): E momoli atu le faafetai i lau Afioga mo lou avanoa. E puupuu foi se manatu lau Afioga. Ae lei tuuina atu se manatu i le Tulafono Tau Faaofi, e fia faamauina foi le agaga faafetai i le Afioga i le Minisita ona o lenei Tulafono Tau Faaofi taua. Ou te manatu o le taua o le Tulafono Tau Faaofi i lau maitau, o le toomaga lea o le mamalu o le atunuu e ono faaletonu ni galuega tau palama e aafia ai i latou, ma ou te talitonu o lenei Tulafono Tau Faaofi e maua ai se fesoasoani mo i latou pe a faaletonu ni galuega faatino i le vaega lea o le auunaga i mea tau palama.

Lau Afioga ma le paia o le Palemene, out e fia fesiligia lava le tulaga lea, ona o lea e le o tulai mai ni regulations i le taimi nei po o ni tulafono faatonutonu aua lenei Tulafono Tau Faaofi. A o lau fesili i le Afioga i le Minisita, ona o lea e agai lau fesili i pemita o le faiga o fale. E le o po se lilo sa amatamata mai lava nei pemita ae lei tulai mai le PUMA sa faigofie lava pei se one stop shop e lipoti uma lava e moomia aua le galuega ae lei faatinoina, sa faatino lava e le Matagaluega lea o Galuega e aafia aim ea o le fausiaina o maota ma fale. A o lau fesili faamolemole, ona o lenei vaitaimi ua moomia foi le lipoti po o se faamaoniga foi a le PUMA a o la e foi ua i ai le latou pili, e totogi muamua le tupe faatoa pasia lau pemita. E faapena foi la i mea nei o le Auunaga o Tinei Mu, o le LTA, ua o uma lava le mamalu o le atunuu i Ofisa nei e aumai ai le faatagaga, aemaise ai foi e totogi ai foi tupe.

O lau fesili la faamolemole, ona o lea ua faatulai mai le Tulafono Tau Faaofi lea o Palama, ae ou te talitonu o le isi vaega lea e aafia i le fausiaina o maota ma fale, o le galuega lea faa-palama. Ona o lea la e le o maitauina se Tulafono Faatonutonu i le taimi lenei, po o le a se faamoemoe, po o le tulaga foi lea e saili foi se lipoti mai le sosaiete lea a le au palama, e aumai foi se latou faatagaga ae lei pasia se pemita o se fale, ae pe fia se tupe e totogi. O lea ou te le o manatua pe i ai ni pili a le vaega lea o le electricians, le au inisinia ma le au faufale, aua pei o le mea foi lena o lea ta te mafaufau i ai, a tulai mai la ni pili ia, a o a foi la ni aafiaga i le process o le pasiaina o le pemita, aua a faapea foi la e i ai ni Tulafono Faatonutonu e tataua ona aafia ai isi faalapotopotoga ia, o lau masalosalo lena e ono tulai mai foi nisi... o lou popolega lena aua o lea lava ua maitau atu i ai, so o se mea lava e moomia se pemita totogi le tupe, totogi le tupe.

Ma lau fesili mulimuli lau Afioga i le Fofoga Fetalai, i le Part 6 lea o Miscellaneous, e i ai lou talitonuga ua faavae uma lava faalapotopotoga, ua i ai latou constitutions. A o lau fesili la i le directive lea a le Minisita, o lea e faapea mai pe a faaletonu le conduct ina o ni galuega a le sosaiete, o lea sa ou faapea e i ai le faavae e resolve e latou disputes ia i le latou... Ae ou te fia malamalama la i le vaega lea o le Tulafono Tau Faaofi, po o le a lava le mea o le a aia atu ai le Minisita i galuega a lea foi sosaiete lea ua tulai mai, ua resitala, ua i ai le faavae, ua i ai foi le latou Tulafono Tau Faaofi e soalaupule ai ni a latou mataupu e dispute ai.

Ia pei o nai manatu ia lau Afioga e fia maua i ai se malamalamaaga. Ma lou faaaloalo lava.

FOFOGA FETALAI: Malo faafetai saunoa i le tatou mataupu. Tulai mai se tasi o sui usufono mo Falealili, Tofa Tusa Misi Tupuola ona faaiu mai lea e le sui usufono mo Vaisigano Nu.1, ona fai ai lea o le tali faaiu a le Minisita.

Tofa TUSA MISI TUPUOLA (Falealili): Lau Afioga i le Fofoga Fetalai, faafetai mo le avanoa, e tu atu e avatu foi se lagolago a lenei itumalo i le tatou Tulafono Tau Faaofi ua i luma nei o le Maota. Lau Afioga, o le lagolago a le itumalo i le tatou Tulafono Tau Faaofi, ona o le vaai lautele i le vave o le tamaoiga o le tatou atunuu e pei ona i ai, aemaise o le tele o galuega tetele ua manaomia ai lava lenei matata o mea tau palama. Maumau e pe ana faapea lau Afioga o le taimi lava na amata ai foi nisi tomai faapitoa i mea tau inisinia, mea tau kamuta aumai faatasi ai ma mea tau palama, semeamanu ua tele ni tatou palama agavaa ma le lelei ua i a ii lenei vaitau. A o le mea lea ua tulai mai nei, pei o lea faatoa aumai le Tulafono Tau Faaofi a ua talafeagai foi ma le tele o suiga fou ua i ai nei le atunuu, aemaise foi o le agai i luma o lona atinae ma lona tamaoiga.

O le tulai atu lau Afioga ma le faaaloalo e fia avatu pea se fautuaga e le tele, ona o le toatele o nisi tagata ia o lo o i ai lo latou tomai tau palama, ua i ai o latou tusipasi, ua leva foi ona aoaoina i latou i mea tau palama. A o le tulai mai la o le Tulafono Tau Faaofi, e foliga mai ua le toe aoga i latou nei o lo o i afioga i tua, lea e i ai lo latou silafia i mea tau palama, o le practical o la e lelei, a o le theory ua faigata aua masalo po o i latou nei sa... e pei lava o le mea foi lele o le supokako a le pasi a iloa loa ave le pasi, ave loa. Ae pei o tagata la na o lea e tau faafesili atu a ii lau Afioga i le Minisita ma le Matagaluega pe le o i ai se fuafuaga mo ia foi tagata o le atunuu o lo o i ai lo latou iloa i le faiga o mea nei o paipa, palama ae le o lava lo latou silafia i mea tau aoaoga. O le manatu ina ia faateleina pea a tatou palama mo le agai i luma aemaise foi nai galuega laiti o lo o fai i nuu i tua e fesoasoani ai i latou ia pe afai e talafeagai, aua o lea ou te vaavaai atu i le Tulafono Tau Faaofi, e le faatagaina i latou i totonu o le latou sosaiete lea, vagana i latou ua i ai tusipasi faa-aperenitisi.

O le faafesili atu lea i lau Afioga po o le a se finagalo i ai, ae faafetai tele lava i lau Afioga mo le avanoa.

FOFOGA FETALAI: Malo faafetai i le sui usufono mamalu le saunoa. Le sui usufono mo Vaisigano Nu.1, tulai maia e faaiu mai le felafolafoaiga i le tatou Tulafono Tau Faaofi ae sei tuu atu le fesili.

Afioga TUFUGA GAFOALEATA FAITUA (Vaisigano Nu.1): Faafetai lava mo le avanoa i lau Afioga i le Fofoga Fetalai. E leai sa ou popole i le Tulafono Tau Faaofi, ae o lea ua fofoga atu e isi Tootoo. O le popolega sa faapea lava au e faasala ma nai tagata ia e ona fale ia e fai e latou galuega laiti, ae peitai o lea e faatagaina i lalo o le Tulafono Tau Faaofi, ma ua maea foi ona saunoa i ai le Afioga i le Minisita. A o lenei itumalo, e talia ma le agaga fiafia le aoatetele o lenei Tulafono Tau Faaofi. Faafetai.

FOFOGA FETALAI: Malo faafetai, o le a lafo atu i lau Afioga i le Minisita ona o lena ua e faafofoga i manatu faaopoopo. A faapea e leai, faaiu mai le saunoaga ae se i tuu atu le Fesili.

Afioga Hon MANUALESAGALALA ENOKATI POSALA: Lau Afioga i le Fofoga Fetalai, faafetai. Ou te iloa ua manino ma malamalama atugaluga i tulaga tau aoaoga i tomai ma agavaa e pei ona saunoa i ai le Afioga i le Minisita mo Aoga, Taaloga ma Aganuu. A o le tulaga lea i pemitā, o le pemitā masani e ave i le Matagaluega o Galuega, Felauaiga ma Atinae Eseeese e i ai uma le eletise, e i ai ma plumbing. O vaega uma na e i ai i totonu o le Matagaluega lena, ona alu lea o le tagata e sue lana fai moli e faia lana galuega.

O le tulaga i le Tulafono Tau Faaofi, e ao ona agai le tagata e sue se palama e faia le galuega ina ia mautu ma lelei; o le mautu la ma lelei le mea lea e agai i ai. O lona uiga e tatau ona faatino e se tagata o i ai se potō ma se agavaa, ona iloa foi lea ua leai se toe afaina i le agai i luma. A o le pemitā lava ia e pei ona masani ai, e manaomia le tusia o le ata ma vaega uma ia e ao ona pasia. A o le fesootaiga i le tulaga o le palama, o le vaega lena e le faapea o i ai se tupe faaopoopo i luga o le pemitā lea sa totogi mai. O le tulaga lea e pei.....

FOFOGA FETALAI: Malie lau Afioga i le Minisita, se i tulai mai se tasi o sui usufono mo le Au Palota Taitoatasi, Susuga Hon Papaliitele Niko Lee Hang.

Susuga Hon Papaliitele Niko Lee Hang: E faamalulu atu i lau Afioga i le Minisita. Ona o le tulaga lea na fesiligia o aafiaga o le Sosaiete o Palama. Pe moomia le latou.... pe tapa le tagata lea e alu atu e talosaga se pemitā po o se faamaoniga mai lana ia silasila i le ata o le fale ma aumai foi sana fautuaga i le galuega lea. Ou te faamoni atu i lau saunoaga ona e i ai le faiga faavae i pemitā, ae pei o se mea faaopoopo lea. Ona o lea ou te le o malamalama pe i ai se tulaga faapena. O lau fesili lea faamolemole, faafetai.

FOFOGA FETALAI: Tulai mai lau Afioga i le Minisita mo Galuega, Felauaiga ma Atinae Eseeese.

Afioga Hon MANUALESAGALALA ENOKATI POSALA: Lau Afioga i le Fofoga Fetalai, e pei o le vaega lena. O lona uiga afai e moomia se qualified electrician e faatinoina le galuega, e faapena foi la le tulaga i le plumbing. O se qualified plumber foi e tatau ona vaavaai i ai i agavaa e mafai ai ona faatinoina galuega ia ma ausia le tulaga lelei ma tulaga talafeagai e tatau ona i ai. O lea ua i ai le Minisita o le a galulue faatasi ma Faalapotopotoga eseese ma Sosaiete ma le Malo ina ia mafai ona faatino le Tulafono Tau Faaofi.

Ua matauina ua fia ni Sosaiete ua tele ai ni faaletonu ma ni Faalapotopotoga o lo o tulai mai, e pei o le Malo lea e aapa atu i ai ma toe teuteu ma faalelei vaega ia. O lona uiga o le Malo lea e agai e toe faalelei, aua a oo ina taapeape ma faaletonu ia Sosaiete ma Faalapotopotoga, na o le Malo lava e mafai ona toe fofoina ma faaaau pea le tulaga taua o latou matata ma matafaioi.

O le tulaga lava ia o lena e manino mai i le tulaga lea e pei ona saunoa i ai se tasi o sui usufono mo Falealii, Tofa Tusa Misi Tupuola. O lea e manino, e mafai ona auauna ma faia e se tagata ua agavaa po o se qualified plumber. O lona uiga e mafai lava ona faatino i lalo o se vaaiga a se tagata ua i ai tomā ma agavaa i le faatinoga o galuega. O isi vaega, atonu o lea e fuafua e faatino

le Tulafono Tau Faaofi ae ao ona teuteu vaega ia mo le agai i luma. O le aotelega lena, lau Afioga i le Fofoga Fetalai, ma ou te iloa ua.....

FOFOGA FETALAI: Malie lau Afioga i le Minisita, o le a tuu atu le avanoa mulimuli lea i le sui usufono mo Faleata Sisifo.

Tofa Lealailepule Rimoni Aiafi: E tasi lava le vaega taua lea. O lea sa taua i le tali a le Minisita, o le mea lea o le resitala i tausaga taitasi lea sa taua faapea e pule lava latou i le tau e fai ai. Ou te talitonu lau Afioga o se vaega lea e tatau ona fesoasoani i ai le Malo, aua e fai ma alofaga i tagata pe afai e resitala i tausaga uma, tausaga uma. A e resitala foi la, pe ese lau resitala a o oe e fai lau pisinisi, pe ese lau resitala a o oe o le tagata e galue na o oe, aua a taugata e alofia foi e tagata mea nei. O le mea lea e ala ai ona alofia faalapotopotoga faapenei ona o tau faaopoopo, ae a i ai se tau talafeagai, pe na o le validate lava... O le mea lena e tatau ona fai.

FOFOGA FETALAI: Malie le sui usufono mo Faleata Sisifo se i tulai mai le Afioga i le Palemia.

Susuga Hon Tuilaepa Fatialofa Lupesoliai Aiono Neioti Sailele Malielegaoi: Lau Afioga i le Fofoga Fetalai, se ua tatou nonofo ma tau vaivai tagata a o professionals. Se matua sese tele lea taofi. O lona uiga afai e fai le mea lena, e fai foi la i Loia, Accountants ma Doctors? E le mafai ona e vaai pito tasi i se mea. O mea o professionals tagata nei, o tagata e maua tupe. Na ona ou fesoasoani atu ona o lea tatou te talanoa i tagata qualified. O lona uiga e toe alu le Malo e toe totogi? Oi sole, matua faatamala tele nei fautuaga ua aumai.

O le mea lea e tupu nei i le vaega lea, e pei e mananao e fai fua uma mea uma, ae a avatu Tulafono e sue mai ai tupe e faatino ai galuega, ua alalaga foi. O lona uiga e manao e fai fua. O a ia ituaiga manatu faapenei? E fai fua uma mea uma, ae a avatu foi auala e sue tupe ai le Malo, ua tetee foi. O le a le mea ua outou faapea ai? E le o se alofa le mea lena. Aua ne i outou faapea e valea le atunuu. Aua ne i outou faitau lava aua o le mea lea e faitau mai ai le atunuu ua matua tele lo outou irresponsible. O le fesoasoani atu lena lau Afioga i le Fofoga Fetalai.

Afioga Hon Palusalua Faapo II: Lau Afioga i le Fofoga Fetalai, o se mea e fia faasao.

FOFOGA FETALAI: O le a le mea e fia faasao?

Afioga Hon Palusalua Faapo II: A lea ua manino i le Tulafono Tau Faaofi lea, e faaopoopo le tau i luga o le galuega.

FOFOGA FETALAI: Se i tali atu la le Malo i lau fesili.

Afioga Hon Palusalua Faapo II: E le o fai atu e fai fua.

Susuga Hon Tuilaepa Fatialofa Lupesoliai Aiono Neioti Sailele Malielegaoi: Lau Afioga i le Fofoga Fetalai, o le mea lea.

FOFOGA FETALAI: Onosai mai se i tali atu le Malo.

Susuga Hon Tuilaepa Fatialofa Lupesoliai Aiono Neioti Sailele Malielegaoi: E manao lava outou e fai fua, fai fua uma. O a ituaiga Malo e maua i mea faapea? O le mea lena na lavea ai le Malo i le 1979 i le 1981, lea na tatou omai tau faalelei ona o le ituaiga agaga lea, fai fua, fai fua, fai fua. O lea ua sii le tulaga o le atunuu i luga, ua matua siitia lava le tulaga o le atunuu. O le mea lea ia te outou o la e faafogafoga mai le atunuu, ua lelei ua faafogafoga mai le atunuu i ituaiga tagata e i ai outou. E mananao e fai fua uma mea uma, ae a fai atu le Malo e saili tupe mai e faatino ai mea ia, ua outou tetee. E pei foi o anapo na taumafai atu ai le Vaega lenei e faamanino ma faalauaitele, ae outou tetee foi. Ae a taumafai foi le Malo ina ia faapupuu Fono, ua outou tetee foi. So o se mea e agai i ai le Malo, e tetee, aga atu i lea mea, tetee.

Afioga Hon Palusalue Faapo II: Lau Afioga i le Fofoga Fetalai, o le mea e fia faasao. E leai se manatu o lenei Itu e fai fua mea lau Afioga i le Palemia.

Susuga Hon Tuilaepa Fatialofa Lupesoliai Aiono Neioti Sailele Malielegaoi: A lea faatoa uma nei ona e fai mai e fai fua?

Afioga Hon Palusalue Faapo II: O le mea lea matou te fai atu ai o le Tulafono Tau Faaofi lea o le a faaopoopo ai le tau o le galuega.

Susuga Hon Tuilaepa Fatialofa Lupesoliai Aiono Neioti Sailele Malielegaoi: Lau Afioga i le Fofoga Fetalai, sa e Minisita, ou te le i faalogo lava ia oe o e finau mai i totonu o le Kapeneta e fai fua lea mea, fai fua lea mea. O fea sa tuu i ai lou poto? O fea sa tuu i ai lou alofa? Ua te i lava ua e poto, ua te i lava ua e alofa ina ua e tu mai i ina, ae sa e saofai i totonu o le Kapeneta?

Lau Afioga i le Fofoga Fetalai.....

Afioga Hon Palusalue Faapo II: Lau Afioga i le Fofoga Fetalai, ua fai soo lea saunoaga. E le i aumaia ni Tulafono faapea i totonu o le Kapeneta i le taimi na ou i ai.

FOFOFGA FETALAI: Malie lau Afioga i le Taitai o le Itu Agai.....

Afioga Hon Palusalue Faapo II: E le i avatua ni Tulafono faapea, pau le mea lea e taumafai atu ai le Itu Agai, o le Tulafono lea e faaopoopo ai le avega i tauau o le atunuu.

FOFOGA FETALAI: O lea ua maua lou finagalo, tulai mai lau Afioga i le Palemia.

Susuga Hon Tuilaepa Fatialofa Lupesoliai Aiono Neioti Sailele Malielegaoi: Sa ou talanoa atu ananafi, o le mea lea e taumafai i ai le Malo e aumai uma professional bodies nei e resitala ina ia faatonutonu ai a latou galuega. Afai e faaletonu o lea ua i ai le Tulafono e faatonutonu ai. Se e pei

lava o le ao mea nei ua outou saunoa i ai e fai fua, fai fua, fai fua uma. Ae faatoa uma atu nei lava o lea foi na aumai le fuafuaga a le vaega lea o le eletise, se pei o le ao lo outou agai e taofi, taofi, taofi.

Lau Afioga i le Fofoga Fetalai, e le mafai ona agai i luma le Malo pe a leai ni ana tupe e faatino ai.

FOFOGA FETALAI: Ou te manatu ua malamalama le mataupu. Malie Saleaula ua ou faamutaina le talanoaina o le mataupu ona ua manino ma malamalama. O lea foi e taumafai atu le Malo e faapupula ma faamanino le mataupu ma so o se suiga lava e i ai atugaluga, a o suiga i mea lelei. Se i vaai lava i si nei tamai palama a o lea o le a falo, falo, falo o le a umi atu lava le tatou taimi? A o le ua outou tautino lelei, plumbing is one of the profession e tataua ona moomia i le fausia o se fale. E tele a tatou fale o lo o fai, vaai i le tatou Tofilau Eti Alesana lale, ua a? O le palama mai fea? O le palama mai Saina. O lenei e tau togafiti ae ua omai Saina saoloto, ae leai se tatou Tulafono na faia. O le Tulafono Tau Faaofi la lea e limataitaiina ai e le gata ina omai, ae omai faatino i lalo o aiaiga ma aga a le Tulafono Tau Faaofi lea e tau fai atu.

Malilie sui usufono ua manino ma malamalama le Tulafono Tau Faaofi.

Na faamaonia le lafo ma faitauina le Tulafono Tau Faaofi o Tomai Tau Palama 2013 i lona faitauga faalua.

FOFOGA FETALAI: E tusa ai ma le Tulafono Tumau o le a tuuina atu le Tulafono Tau Faaofi i le Komiti o Galuega, Felauaiga ma le Siosiomaga mo le iloilo ma toe lipoti mai i le Fono Aoa o se fonotaga o lumanai.

Ia, ua uma le aso o lea faatoa lua Tulafono Tau Faaofi. Ia, tulai mai lau Afioga i le Palemia.

Susuga Hon Tuilaepa Fatialofa Lupesoliai Aiono Neioti Sailele Malielegaoui: Lau Afioga i le Fofoga Fetalai, o lou tulai atu e momoli atu lau faamalo i lau Afioga i lou onosai, a maitau mai, o lea e taumafai le Kapeneta ina ia faamaioio ma faamalamalama aafiaga o Tulafono Tau Faaofi. O lea foi la ou te tulai atu ai e avatu le faamalo. Faamalo foi i le Itu Agai i le onosai, ae ua tele taimi e tuuaia ai le Malo i le le transparent. O lea la e taumafai e transparent ia matua faamatala e tusa lava pe alu le masina nei o tatou Fono i inei, ae sei faamatala auiliili aafiaga o Tulafono. O lea na ou tau atu ananafi, pe alu lava lenei masina ma le masina fou o tatou Fono, e amata atu lava i le taeao seia tau i le 11 i le po. Ia, o le fesoasoani atu lena ia malamalama a tatou Tulafono Tau Faaofi.

FOFOGA FETALAI: Tulai mai le sui usufono mo Samoa Aoa.

Afioga Mauaiva Pat Ah Him: Lau Afioga i le Fofoga Fetalai, ia faafetai lava. O le agaga tonu lava lea o au sa ou tautala foi i le mataupu lea tau palama, e pei foi o le saunoaga a le Minisita mo Aoga, Taaloga ma Aganuu, sa i ai foi manatu lelei sa ou toe fia tuliloaina, sa i ai foi fautuaga sa ou avatua, peitai ua ou ava tele i lau Afioga o lea la taoto lava i i a ua le tali mai, a ua malamalama lelei ona o le manatu ua umi le tatou Fono i lenei lava tamai mea o le palama. Faafetai.

FOFOGA FETALAI: Malo. Faapea lava e te tulai mai o se tatou taligasua i lou maota nei i le aoauli.

Tulai mai le Taitai o le Itu Agai.

Afioga Hon Palusalua Faapo II: Lau Afioga i le Fofoga Fetalai, ma le faaaloalo, ou te matua faafetai i le saunoaga a le Afioga i le Palemia, faafetai ona ua faamalamalama. O le agaga foi lena o lea e taumafai atu ai le tele o fesili a le Itu lena, ia faamalamalama mea uma. O le mea lea ou te faafetai atu ai i lau Afioga i le Palemia ma lena Itu pe afai faatoa ae lea o se tofa i lau Afioga e faamalamalama i lena Fonotaga.

Ma lou faaaloalo lava.

FOFOGA FETALAI: Sei tulai mai lau Afioga i le Palemia.

Susuga Hon Tuilaepa Fatialofa Lupesoliai Aiono Neioti Sailele Malielegaoi: Lau Afioga i le Fofoga Fetalai, a maitau mai, ua toetiiti lava oo i ni mea e le taua o taumafai lava e faamatala atu ona o le matua mafiafia tele o le la Itu.

FOFOGA FETALAI: Malo.

**TULAFONO TAU FAAOFI O TEUTEUGA O LE TULAFONO O LE FAALAPOTOPOTOGA O SUESUEGA FAASAIENISI A SAMOA 2014
– faitauga faalua**

FOFOGA FETALAI: Mo le silafia e lena Palemene, o le Tulafono Tau Faaofi lena sa faia lona faitauga muamua i le Aso Fono 24 Ianuari 2014. Ou te valaau atu i lau Afioga i le Minisita mo Punaoa Faanatura ma le Siosiomaga e tulai mai mo le lafo.

Tofa Hon FAAMOETAULOA LEALAI AULOTO ULAITINO FAALE TUMAALII: Lau Afioga i le Fofoga Fetalai, ou te tulai atu ma le ava tele e faatu le lafo, *Ina ia faitauina nei le Tulafono Tau Faaofi o Teuteuga o le Tulafono o le Faalapotopotoga o Suesuega Faasaienisi a Samoa 2014 i lona faitauga faalua ma ou te fia tautala faamalamalama i ai.*

Faaluaina e le Minisita o Tupe, Minisita mo le Soifua Maloloina, Minisita mo Aoga, Taaloga ma Aganuu, Minisita mo Galuega, Felauaiga ma Atinae Eeseese ma le Minisita mo Leoleo ma Falepuipui, Auaunaga o Tinei Mu ma Faalavelave Tutupu Faafuasei.

FOFOGA FETALAI: Tulai mai lau Afioga e saunoa faamalamalama.

Tofa Hon FAAMOETAULOA LEALAI AULOTO ULAITINO FAALE TUMAALII: Lau Afioga i le Fofoga Fetalai, ae ou te lei oo atu i le faamalamalamaina o le Tulafono Tau Faaofi, e fia fono faapipii atu foi lou nei sui usufono e faafetaia ai le alofa o le Atua e pei ona e muai sii i le taeao nei i le tatou Fonotaga ona ua maualuga le alofa o le Atua ma lona agalelei i

lenei aoauli i le soifua laulelei o lau Afioga i le Fofoga Fetalai faapea le Palemia, aemaise foi o Minisita o le Kapeneta ma Minisita Lagolago. E le gata foi i lea o lona Itu i le Afioga i le Taitai o le Itu Agai ma le Sui Taitai, aemaise o le mamalu i sui usufono o le Palemene. E ao la ona ave le faamua i le Atua i lona agalelei ma lana tausiga ia te i tatou.

Ou te fia pai atu foi i lou itumalo o lo o faafogafoga mai ma taputapu mai a o alofaiva lo latou sui i le Fonotaga a le Palemene o le Malo o Samoa. Le afifio o Aiga Sa-Peseta faapea le Maopu, Alaalatai foi le Nofo a Usoalii i le Faleiva ma upu ia te oe le Matautu. E le gata foi i lea o le afio o le Afioga ia Maiava, Susu Mataia, Alaalatai le Aitu Tagata ia Mauigoa aemaise o le mamalu ia te oe Satoalepai.

Lau Afioga i le Fofoga o le Fono, o Teuteuga lava o le Tulafono lenei o lo o maioio mai ai auunaga faaletulafono – mandate. E tolu lava ni vaega o lo o aumai i le Teuteuga lea. Muamua, o le tulaga lea i le faaopoopoina o le auunaga a le Faalapotopotoga i auunaga o lo o i ai o lo o lima taitaiina ai a latou galuega fai. O le suesuega auiliili o narcotic e i ai marijuana faapea foi ma fualaa faasaina e i ai le cocaine ma le methamphetamine po o le aisa lea e tau ai e tagata. E le gata i lea o suesuega foi i le lelei atoatoa o taumafa ma le saogalemu o taumafa i totonu o le atunuu, ae faapea foi taumafa o lo o aumai i totonu o le atunuu po o lo o avatu foi ma faatau atu i maketi i fafo.

O le isi faaopoopoga, o iloiloa ia o le afaina o le siosiomaga o lo o aumai i totonu o le Tulafono Tau Faaofi lenei. Atonu la e malamalama pe a ou toe asiasi lava i le amataga mai o le Faalapotopotoga ma le faataatiaga mai o ana matafaioi lea ua tatau ai le faaopoopoina o ona tiute tauave.

O lenei Faalapotopotoga na faatuina i le 2006. E lua lava ni vaega sa faatuina e lima taitaiina ai auunaga a le Faalapotopotoga. Muamua, o le suesuega lea i malosia faafouina. O lona lua, o le tulaga lea i suesuega i fua o faatoaga i le tulaga lea ua uma ona harvest a o lea la ua oo mai i le processing side. Ona pau na o vaega sa taumafai ai le tulaga lea. Na toe suia le Tulafono o le Faalapotopotoga pe na toe amend le Tulafono o le 2006 i le 2008 lea na suia mai ai le igoa, o le Faalapotopotoga o le Research and Development Institute of Samoa i le Samoa Research Organisation. O i ina na maioio ai ma faataatitia ai auunaga faatino ma le tulaga foi lea po o le a le ituaiga research organization e tatau mo Samoa. O i ina la na fai ai loa ma upgraded internationally le Faalapotopotoga aua ua iloa e le mafai ona aloaia faava o Malo suesuega pe afai e le upgraded pe e le avea foi lea o se Faalapotopotoga faasaenisi e amanaia e Malo i fafo. O lea la na upgraded ai loa i lalo o le vaega lea a Niu Sila o le International of Accreditation of New Zealand. O lea la ua toe oo mai i le vaitaimi lenei, o le lona tolu ai lea ona review le Act lea ua sau nei o le Amendment Act 2014. O lea ua faaopoopo loa i ai matafaioi ia e tolu aua ua tuputupu le manaomia o le service i totonu o le atunuu. O le mea foi lea na ala ai ona aumai suesuega ia i le tulaga lea i narcotic mai le USP sa ave muamua i ai i lalo o le Faalapotopotoga ona o lea e i ai le accreditation lea. Atonu la o le fesili e tulai mai, po o i ai le gafatia ma le mafai e le organisation ona faatino functions ia ua faaopoopo atu. O le tali ua leva ona sauniuni i ai le organization, ma o le organisation o lo o i ai agriculture scientist, forensic scientist, food scientist ma le environmental scientist o lea e i ai uma lava. O le vaega foi lea e le gata ina i ai faailoga tau le poto aloaia e i ai Phd, Masters ma isi degrees eseese mai Universities i fafo, a o lo o i ai foi le poto masani e faatino ai auunaga ia. O lo o galulue

faatasi ma organizations i Niu Sila. O lo o galulue faatasi ma scientists a Niu Sila i le tulaga o le earnalise ina o drugs ia. O lea la na set up ai loa le laboratory i totonu o le SROS, lea la ua faagaoioi ai lava auunaga nei e o tatou tagata i tamalii e le gata foi i lea o tamaitai o lo tatou atunuu o lo o i ai.

Ou te fia asiasi mai i le tulaga lea i le faamatalaga lea e faapea o suesuega i taumafa foi ia i lona itu ua atoatoa le lelei mo le taumafa, aua o le tele lava o le vaitaimi lenei pe a aumai ni oloa po o ni apa eleni ae faaletonu, o ia mea uma lava e avatu ma suesue e le SROS. E le gata foi i lona a o le tulaga foi lea i suesuega i le lelei o vai taumafa ma o le tasi lona vaega. E fesoasoani tele foi i le tulaga lea i le aufaipisinisi. A faapea e fai ni a latou pisinisi a o i ai ni maketi i fafo, e le mafai ona talia a latou oloa i fafo, vagana ua meet le standard o lo o aumai e latou ia i latou o lo o produce ina oloa ia. E i ai lava le latou specification e aumai ia meet, e le mafai la na o le SROS lava e avatu i ai latou te analyse ina.

O le tulaga o i ai le SROS, e lua lava vaega ua uma ona upgraded uma faava o Malo. O le vaega lea o le au suesue i siana latou te suesueina le food safety, e le gata i lea o le vaega foi lea e vaai i le lelei atoatoa nutritional values o nei oloa. E faapena le tulaga ma le soifuaga lea tatou te i ai, e aumai sao lava e latou le specification i tagata o lo o produce atu oloa ia ma avatu ma analyse e le SROS ma issue le certificate foi lea o lea e conform ua meet le standard lea e aumai ai, ona lafo loa lea i o i bias o oloa ia ma faagasolo ai loa le fefaatauaiga.

I le tulaga i le environment i le tulaga o le afaina o le siosiomaga, o le tasi lea itu o lea e faatino e le SROS i ana galuega ma auunaga o lo o tauave, aua o lo o i ai le division faapitoa lava i le tulaga lea i le environment ma le renewable energy aua e o faatasi uma. O le renewable energy ia e fesoasoani foi i le tuuaitiia o le greenhouse emissions lea e faapogai i le fesuaiga o le tau. E tasi lona vaega e link uma lava i environment impacts lea la e setup ai le vaega lona o le Faalapotopotoga lea.

E pei o le faataatiaga lona ma le aotelega o auunaga o lo o faatino i totonu o le Faalapotopotoga e pei ona faatino ai, o lea la ua aumai ai le Toe Teuteuga lea o le Tulafono Autu ina ia mafai ai ona faatino isi auunaga e faaopopo atu i isi auunaga o i ai ma faatinoina i totonu o le Faalapotopotoga.

Ma le faaaloalo lava.

FOFOGA FETALAI: Malo faafetai i lau Afioga i le Minisita mo le faamalamalamaga auiliili o lenei Tulafono Tau Faaofi. E manatu foi ua taua lau faamalamalamaga ona ua na o se teuteuga o le Tulafono Autu, ma e manatu o lea ua maua e le Maota lau folasaga na faia e ala i le Tulafono na faatulai mai, le Tulafono Autu, a o lo o i ai sui usufono e tatau pea ona maua avanoa mo felafolafoaiga i le Teuteuga ua faatulai mai.

Le sui usufono mo Gagaemauga Nu.2 o lea ua maua lou taimi.

Tofa LEVAOPOLO TALATONU: Faafetai, ua fetai foi le taimi lea ma nai mea laiti ia. E faamauina lava le agaga faafetai o lenei itumalo e tusa ai ma le Tulafono Tau Faaofi. Ona pau lava lea o se vaega e fia maua ai se faamalamalamaga ona ua fai sina umi o tulai mai le tatou Faalapotopotoga lea, a o le upu moni lava ma le agaga faaaloalo e le o tino mai lava le tulaga foi lea i ni kamupani latou te faaauuina galuega a le SROS e tai pei o gao ia

e fausia mai le avoka ma falaoa mata. Ua pei ua faafagogo tagiao foi i totonu o le Maota le tulaga e faapea ua mafai ona fai, ae e pei e leai lava se kamupani o faaaauuina ia vaega.

E momoli atu foi le faafetai i fesootaiga ia ma taumafa ia e aioi atu ai lava e matua faamalosii, atonu o le itu foi lena ua saunoa ai lau Afioga i le faatupulaia o suesuega. E manaia lava le fai o a tatou suesuega na aua a alu ai tupe, a o suesuega e talafeagai mo le soifua maloloina o lo tatou atunuu. Ou te le o fai atu e fai fua, o lea lava matou te fai atu e fai fuafua ae matou te le o fai atu e fai fua, faafetai.

FOFOGA FETALAI: Tulai mai le sui usufono mo Faasaleleaga Nu.2.

Susuga PAPANII LIO FAAVAIVAIOMANU TAEU MASIPAU: Faafetai mo le avanoa. E manaia tele le faamalamalamaga a le Afioga i le Minisita. Atonu foi o lea laasaga ua tatou i ai e manaia aemaise lava le tatou fale suesue ua i ai nei aemaise o manaoga i lenei vaitaimi.

E taua ia te au le suesuega lea o le environment aua e pei ona silafia foi le nuu lea e pei lava o Fagaloa ea lea na afaina mai lo latou vaitafe i le afi e alu i le suavai. Pe faaono oo la i ai le vaega lea o le Tulafono ma a tatou suesuega i ituaiga mea faapea aua o lea ua aafia ai le siosiomaga. Ua aafia ai aua o lea e pei ona faitio mai Fagaloa, pe mafai ona oo i ai se taumafaiga a le tatou fale suesue. E pei o le agaga lena ae taua tele i le mafaufau le mataupu aua o lea ua oo i le suesueina o lo tatou siosiomaga.

O lona lua e fia faamauiina le faafetai i mea ia o drugs aua atonu e tasi lea mea sa tele ai taimi o a tatou suesuega ma tuai ai foi a tatou faamasinoga ona o lea ua matau atu, a o lea foi sa aoga ai nai tamalii i le USP, ae faafetai o lea ua maua o lea o le a faatino e le tatou fale suesue, ma e moomia foi mea e faatino ai e pei o soligatulafono ma mea faapena po o lea ua atoatoa uma i le tatou fale suesue lea?

O le itu lea i le tatou falaoa mata foi lea sa i ai i aso ia, pe ua tai maua ni a tatou falaoa mata mai a tatou ulu? Ia te au lava ma lou sui usufono out e fia iloa pe ua tai maua mai ni a tatou falaoa mata se i faaoga i ai nai ulu ua tele nai ulu o lo o i ai i lenei taimi, faafetai.

FOFOGA FETALAI: Malie se i tulai atu le Afioga i le Palemia.

Susuga Hon Tuilaepa Fatialofa Lupesoliai Aiono Neioti Sailele Malielegaoi: Lau Afioga i le Fofoga Fetalai, masalo o le fatu lea ua toto e pei ona saunoa le Afioga i le Minisita i le tele o le lumanai o Samoa e maua mai ai. O le Tulafono o lea ua saunoa le Minisita o lo o agai atu i le faalauteleina o suesuega a le tatou fale suesue. O lea ua agai atu i le siosiomaga, o suesuega loloto ia i fualaau faasaina ma o mea uma lava ia e tatau ona fai. A o le amataga lava ia o le vaega lea sa agai i ai, o le faiga faavae a le Malo o le taumafai lea e faamaite mea, ona lafo lea i le tatou private sector. Ia manatua foi o le tulaga lea e tupu nei, o le taumafai o le Malo e aua nei aafia i le faatinoina, aafia i le mea o operations, faagaioioiga o mea tau pisinisi ae sei tuu atu i le aufaipisinisi i tua e omai latou e faagaioioi. E malamalama lelei la le Malo i le taimi lenei i le tuai ona faaalu a o lea ua maua tatou falaoamata gaosi, le tatou suauu e maua mai le avoka, o lea foi ua maua le tatou kiso. E i ai lava le agaga faatuatuai i le aufaipisinisi latou te

omai e fai se mea faapea ae lei iloa tonu le maketi aua e laitiiti foi le tatou maketi. Ua tele foi la taimi ua tapa mai ai e le Faalapotopotoga, agai loa le Malo e fai mea ia. A faatino le mea lea, na i lo le faatali. O le mea foi la i faiga faavae, e i ai lava taimi e alu alu ai a tatou faiga faavae talepe loa e le Malo faiga faavae ae faatino loa mea ia ona o le tulaga foi lea i le fia agai i luma ae le o maua le malosiaga mai le tatou private sector e tali mai ai. O lea la e tau taofiofi atu lava le Malo sei faatali e i ai lava le taimi e tali mai ai latou, a o lea ua taoto formulas o mea faapenei.

Lau Afioga i le Fofoga Fetalai, o le taua ia o le fale leni, leaga o le fale suesue leni o i lea e taoto ai le loloto o le tamaoaiga mo Samoa. Na o le lua lava, o Samoa ma le tele o atunuu, e i ai le vaega o tulaga muamua, o ana industries, oloa e faagaoioi i totonu o le atunuu e pei o le popo, ave le popo i fafo, ave le fai i fafo, ave le talo i fafo. O le tele o le faaletonu o le mea lena, ona e pulea e fafo le tau, le world market, latou te pulea tau e pei o le tau o le koko ma le popo. Ae a oo loa ina agai e gaosi mea o secondary industries, o lona uiga e le aveina le koko i fafo ae gaosi ai le sukalati iinei, gaosi ai le koko foi lea tuuapa, e sili atu lena. O le ala foi lena o lea na taofi ai e le Faigamalo leni le toe ave i fafo o tatou ogalaau ae gaosi i Samoa nei le laupapa mai le laupapa, e mafai ona gaosi ai mea fau meafale, ona tele lea o le seleni e maua mai e tatou. E faapena foi la i i le taumafai ona o le tele o mea o tulafono e taofia ai tatou mea e avatu i fafo ona o quarantine laws, tulafono e taofia ai faamai. Na pau lava la le mea e fai, tatou liliu loa e aumai talo e faa-chips iinei, secondary industries, o le fai e faa-chips iinei ona ave ai lea i fafo, mago faaliliu i le siamu ma mea o juices. O le mea la lena o lea e tele le lumanai o le Faalapotopotoga leni. O le talitonuga faa-saienisi, o le lumanai o se atunuu e matua sili ona maoae i le i ai o sana fale suesue faapenei, lea foi la na ala ai ona amata le tatou fale suesue, ma e tupu pea tupu pea i le lumanai ona o lea e tau taofiofi e le Malo sei tau saili a leai loa, ua agai loa le Malo e produce to be a producer foi lea i le faagaoioi o mea tau pisinisi.

Lau Afioga i le Fofoga Fetalai, o le tele ia o le lumanai o le institute leni o le fale suesue leni, ona o mea ia na amata ai ona maoae le tamaoaiga i le tulaga lua o le tele o Malo o le fale suesue, o lea foi la ua amata ia tatou le tulaga lea ma amata faatino atu ai i i, a o lea lava e tau mataitu le tulaga, ua leva ona tagitagi mai Minisita ae tau taofiofi iumaea atu lava le Kapeneta ona o le faiga faavae e aua le o le Malo e faatino pisinisi. Ia lafo pea ma faatali e tuuina atu i tua. E i ai foi la talosaga ia ua ou vaai atu i ai ua sau i totonu ae sei mataitu lau Afioga i le Fofoga Fetalai, ae ua ou toe tali atu e faaopoopo i le faamaninoga a le Minisita, ona e i ai mataupu ia na lagalaga mai nei, a o mataupu i tulaga o le tupe lea e taofiofia ai le tupu tele, a o le Faalapotopotoga leni, e tupu ma tupu ma tupu pea, ona o lona aoga lena, e tatou te le toe amanaia ai ni mea tau quarantine. E process uma iinei mea ma ave i fafo, a o le aoga foi o le faaagaina ai o tatou saienisi nei e iu mai aoga, ona liliu ai lava lea o le tatou atunuu e gaosi mea i totonu iinei. O le pine o le taua o le mea leni, na lavea loa tatou i le talo i le tausaga e 1994, leai se talo. Ae na faapefea ona toe tupu ma toe maua e tatou le talo? O gaoioiga foi ia a tatou saienisi lea na mafua ai ona toe maua e tatou le talo ma o lea lava ua agai atu lava ina tele le ituaiga talo lea ua maua i le taimi nei.

Lau Afioga i le Fofoga Fetalai o le toe faaopoopo atu lena.

FOFOGA FETALAI: Malo faafetai saunoa faamalamalama i lau Afioga i le Palemia. Ia, e manatu ua manino ai foi ma malamalama finagalo na saunoa. Ae ona o lea ua tatou taunuu i le tatou taimi malolo, o le a avatu le avanoa le sui usufono mo Faleata Sisifo pe a tatou taunuu mai i le tatou taimi amata i le itula e 7:00 i le po a nanei.

E momoli atu le agaga faafetai tele i le paia ma le mamalu o le tatou Maota i leni aso. Malo le onosai, faafetai foi letauatai ma le faapalepale mai pea i taualumaga o le tatou Fono Aoao. E faasilasila atu o la e maua le tatou taumafataga o le aoauli i le Tofilau Eti Alesana, ae faaaoga i ai o tatou mafaufau. O le oloa e foai fua ma le loto fuatia ifo, e te afio atu lava o i ai le pusa a le au kuka e togi i ai lau foai, ae o la e ua saunia le tulaga o le tatou taumafataga e pei o le tatou mea masani, o lo o ua i ai foi le laulau e fai ai le tatou malologa a o lei toe taliu ma ii le amataina o le tatou Fonotaga i le itula e 7:00.

O le a faataatia ese taualumaga a le Fono Aoao mo lana malologa ona tatou taliu mai lea pe a ta le itula e 7:00 i le afiafi a nanei.

Na motusia Felafolafoaiga ina ua faataatiaese Galuega a le Fono Aoao i le itula e 1:00 i le aoauli seia aulia le itula e 7:00 i le po.

Na toe faaauau Taualumaga i le itula e 7:00 i le po.

**TULAFONO TAU FAAOFI O TEUTEUGA O LE TULAFONO O LE FAALAPOTOPOTOGA O SUESUEGA FAASAIENISI A SAMOA 2014
– felafolafoaiga faaauau i luga o le faitauga faalua**

FOFOGA FETALAI: E talitonu foi ua faasolo ina sola le fetu a le tamaloga i lona nofoaga, ae momoli atu le faafetai tele i le onosai mai o le tatou Maota Fono i leni itula o le po mo le toe faaauauina o a tatou galuega e pei ona tolopoina ai mai le aso analeila.

E ofo alofa atu ma faatalofa atu i le afifio mai ma le laina mai, le afio mai ma le tala mai o aao o le tatou Maota aua le faaauauina o a tatou galuega i leni itula o a tatou polokalame faatulagaina. E i ai le faamoemoe o le a faasolo a tatou galuega i leni taimi seia aulia le taimi e pei ona tatou faatuina ai le lafo aua le faaauauina o a tatou galuega.

E momoli atu foi le agaga faafetai Samoa i lau tapuaiga i leni vaega o le afiafi, ia alo maia lau tapuaiga o le a faasolo pea galuega a le Maota Fono nei aua le faatinoga o ana feau ma ona tiute e pei ona faatulagaina mo leni Fonotaga.

E faia le tatou malologa i le aoauli analeila ua maea ona saunoa le Afioga i le Minisita ma talifuaitau foi le Afioga i le Palemia e ala i leni Tulafono Tau Faaofi taua Toe Teuteu mo le Fale Suesue i Nafanua ma o se tasi o Tulafono Tau Faaofi ua toe faatulai mai aua le faamallosia o suesuega taua ma ni mataupu e tataua ona aafia ai leni Matagaluega ma leni Faalapotopotoga aua le faamallosia o lana auaunaga mo le atunuu.

Ua tatala atu foi le avanoa ona e matau atu o lea sa tau tulai mai le sui usufono mo Faleata Sisifo. O lea o le a tamua ia oe i lo tatou afiafi e amata ai saunoaga ma felafolafoaiga i lenei Tulafono Tau Faaofi.

Tulai mai le sui usufono mo Faleata Sisifo.

Tofa LEALAILLEPULE RIMONI AIAFI: Faafetai i lau Afioga i le Fofoga Fetalai mo le avanoa. E faatalofa atu foi i le paia o le Maota o Samoa i lau Afioga i le Taitai o le Malo ma le paia o lena tala-na-atoa, aemaise foi o le Taitai o lenei Vaega ma sui usufono uma o lenei Vaega Faaupufai.

E faatalofa faapitoa atu foi i le Minisita mo Tina ma Tamaitai, Atinae o Nuu ma Afioga ma Agafesootai lea sa malaga e fai ma sui o tatou i le Malo tele o Meleke, ua malo le saili Malo. Ua tele ou ai ona ua faitau atu i le nusipepa i le manaia o lau lauga.

A o se manatu i le Tulafono Tau Faaofi matagofie ua tuuina mai e le Afioga i le Minisita mo Punaoa Faalenatura ma le Siosiomaga po o lau susuga i le Saienitisi, aua ou te le iloa lava se isi Saienitisi i Samoa, ae ona pau lava lea o le Saienitisi ou te iloa e au. A aumai foi lana Tulafono, ou te faaaloalo foi i ai aua o lea e aumai faa-Saienitisi. Aua e le galo ia te au aso a o ou nofo i Alafua a o ou aoga i le Kolisi. A ou alu ou te koleni i Alafua i le USP, sa i ai le Afioga i le Minisita i le taimi lena a o talavou ma le palagi lea e igoa ia Clive Petrana, sa o la paluina le juice foi lea ma le sosi feu ma isi mau mea na fai i Alafua i aso ia. Sa ou faapea, se matua atamai lea tagata. Na uma loa alu Petrana i o toe alu atu ai ma le Saienitisi, a o lea ua toe foi mai.

O le auga la o le Tulafono Tau Faaofi e pei o lea na saunoa i ai le Afioga i le Minisita, ou te fia foi lava i le amataga o lana saunoaga faapea e lua lava mea na faavae ai lenei Matagaluega taua a le Malo.

Muamua, o le tau sailia o le mea foi lea e sui ai le renewable energy foi lele e fetuutuunai e faaoga i le eletise.

O lona lua, o le taumafai lea ina ia fai ni tatou faaaogaina o fua o faaeleeleaga e maua ai nisi o oloa e faaoga lautele e tatou. O vaega taua la ia lea sa i ai i le amataga, e fia fai i ai sina faamatalaga laitiiti, aua na faaopoopo foi le Afioga i le Palemia ma faapea, o i o lo o taoto ai le lumanai o Samoa, taoto ai le tamaoiga. Ia po o le mea la o le tulaga lea o lea e faaletonu ai, ona o lea e taoto, taoto ai i i, e lei tu i luga ma tamoe.....

FOFOGA FETALAI: Tulai mai lau Afioga i le Palemia.

Susuga Hon Tuilaepa Fatialofa Lupesoliai Aiono Neioti Sailele Malielegaoi: Lau Afioga i le Fofoga Fetalai, e tataua ona matou tulai atu e faasao se lauga o le a agai ina sese tele. O le tulaga sa faataatia atu, o le lalolagi lenei e i ai Malo e lilifa i tulaga foi ia o primary producing countries, o lona uiga, e lilifa i tulaga na o le atinae o oloa e ave i fafo i le tulaga muamua. O lona uiga, o lea sa ou taua atu ai i le mea sa masani ona i ai tatou e tata ia mea o ogalaau ona ave lea i fafo, ona taofi lea e le Malo i le 1989 ina ia...afai e ave le tatou laau, ia muamua ona poipoi iinei faalilii ona fau ai lea o nai fale ia ma le anoano o isi mau oloa e ave i fafo e tele le tupe e maua mai ai. O le vaivaiga o atunuu o lo o faalagolago i mea o primary industries po o oloa ia i le tulaga muamua, e pulea mai e maketi o le lalolagi ia le tau, control a world market, pei lava ona i ai le popo i aso la. A o atunuu la e lilifa i le taofiofi o oloa ia numera muamua ae agai loa e gaosi ia oloa numera lua, o

lona uiga ua taofi ia oloa ia e ave mata i fafo, pe ave i le tulaga muamua, e pei la o le suauu popo ua le avea le popo ae taofi le popo iinei, vili mai ai le suauu, ia ona gaosi mai ai lea o isi mau oloa e tele, e sili atu la ona tele le tupe e maua ai, e mafai ai ona gaosi mai ai le tatou margarine po o le paka foi lele e fai mai i le popo. O ituaiga mea la faapena, e pule lava tatou i le tau. O le ala la lena o lea a mataitu atunuu o le lalolagi, e lilifa i oloa tulaga muamua, e le tutusa le televave o le latou atinae ma le televave o atinae ia e lilifa i oloa i le tulaga lua e pei o Iapani, omai Iapani avatu le uamea i i le i Ausetalia, ia ona fai mai ai lea o uati ma le anoano o mea, e aumai i fafo ua tele. O le tulaga la lena o lea e agai i ai tatou, tatou agai e faatu la le Faalapotopotoga Suesue lea e agai ai tatou o lea faatoa amata, amatamata. O le tele o atunuu ua leva, a o tatou o lea e tuputupu ae. Pei foi ona ou fai atu, o lea e i i i le SROS le lumanai manuia o Samoa, i le tulaga o lea ua uma ona fai a latou suesuega, lea ua gaosi le falaoamata, lea ua maua le tatou kiso, ia o lea foi ua i ai le tatou suauu e kuka ai meaai mai le avoka, ia ma nisi lava mea i le agai atu i ai. O lea foi sa ou vaai ua amata fai a latou test i mea o le margarine po o le paka e fai mai i le suauu, ia ma agai atu i ai i isi mea. A o mea la nei, e fai ona faamatuu atu lea i tua. Ae sei matau mai e leaga o le sui usufono o lo o saunoa nei, pei e agai i le mea foi lele na ona lote lava o le tualuga ae le agai i le muliaa. O le ala la lena o lea e avatu ai le faamatalaga lea mo le malamalama o le Maota, e le o se isi itu. O lona uiga e tele le lumanai, e tele le lumanai e pei foi ona avatu le upu anaeila i le tulaga o isi oloa ia ua tatou fausia ma amata ai ona tatou sailiili. Sa ou fai atu, e i ai faiga faavae pei ona faamatuu ai ia kamupani a le Malo i tua, ona so o se fale gaosi oloa po o so o se pisinisi e aafia ai le Malo e gau, ona o uiga lava foi ia o mea faitele. O lea la e faamatuu atu i tua, ae o lea la e nofonofo le Malo, ua ou faalogo o lea e i ai le kamupani e tasi lea ua talosaga i le tulaga lava lea i oloa ua maea nei ona fausia ma faatalitali. Sa ou fai atu lea, a fai fai fai ae le gafatia e le tatou Private Sector ona o le laitiiti, o i la e ono toe talepe ai lava e le Malo lona faavae, e i ai le upu foi lele, 'o le mea o le uta e fetalai', o le uta lena a le poto, a o le uta a le vale o le taofiofi mamau.' A vaai atu loa le Malo i le mea e tataua ona fai, ia ona talatala loa lea o faiga faavae e amata loa ona agai e amatamea ma faamaite mea i se mea, afai o lou iloa la, ua alu televave pei foi ona i ai le tatou faletalimalo lea na fau i le tausaga e 1972 ia le Tusitala, ana le fausia e lo tatou Malo lena mea, e leai lava se faletalimalo e faia i i i lea mea. Ia ua alu alu alu, ona tatou liliu atu loa toe faamatuu i tua, faamatuu i tua ma isi mea, o le tulaga la lena o lea e noatia ai le Malo i le taimi lenei. Ua ou vave tau atua lea mea, ina ne i te i ua loloto tele le sese o le mea lea e agai i ai le sui usufono, a o lea e tau faatonutonu atu i le amataga.

FOFOGA FETALAI: Ia tulai mai le sui usufono.

Tofa LEALAILEPULE RIMONI AIAFI: Faafetai lava i le Afioga i le Palemia i le fesoasoani mai i lau lauga, aua ua ou fiu e tau mafaufau po o fea tonu le mea lea e faasao, aua o le mea tonu lava lea o le a oo atu i ai lau lauga lea e saunoa i ai, o le mea tonu lea, aua o lea e saunoa.....

FOFOGA FETALAI: Ia tulai mai le Afioga i le Palemia.

Susuga Hon Tuilaepa Fatialofa Lupesoliai Aiono Neiote Sailele Malielegaioi: Afai e le o malamalama le sui usufono... Lau Afioga i le Fofoga Fetalai o se mea e fia faasao. O le mea lea e saunoa mai ai le sui usufono, fai mai o le mea lea e tupu nei, lea na ona taoto, a, vaai e leai lava se mea e le fuafua muamua ae tamoe. A o le mea lea e tulai mai ai le sui usufono, ai e manao na ona fanau mai loa le pepe tamoe loa, a? E leai se pepe i lenei lalolagi e fanau mai loa tamoe, e fanau muamua mai taoto, a uma ona taoto taoto totolo, a uma ona totolo totolo totolo, tu loa i luga laalaa, a uma loa ona laalaa, tamoe loa. A o le mea lea e manao i ai le sui usufono, na ona faapau mai lava o le pepe, tamoe loa.

Lau Afioga i le Fofoga Fetalai, o le faalavelave o lea e te manao foi lele e te i luga i le parataiso. O le mea lea le sui usufono, o lea lava e te i le lalolagi.

FOFOGA FETALAI: E sosoo lava le momoe ma le fue. Tulai mai le sui usufono mamalu.

Tofa LEALAILLEPULE RIMONI AIAFI: Faafetai lava i lau Afioga. O le mea lea ua ou faanoanoa ai i le saunoaga a le Afioga i le Palemia, e le o toe pepe le SROS, ia a pepe o Saientisi la e faia le SROS? O le uiga o lau faamatalaga, e sao le....aua ua le faa-tasi, ua faalua pe faatolu, pe faatolu pe sili atu foi ona tatou asiiasi i tua ma tatou aai ai i le manaia o sikoni, o pani mai le falaoamata o le ulu, ia tatou o ifo tatou matamata i le gao o le avoka, ia faapena le kiso ma mea uma faapena. A o lea la tatou te faatalitali aua e moni e leai se isi o le Private Sector i le taimi nei e lototele e fai nei mea. Ae manatua foi.....

FOFOGA FETALAI: Malie le sui usufono, o lea sei tulai atu le Afioga i le Minisita.

Tofa Hon Faamoetaulao Lealaiauloto Ulaitino Faale Tumaalii: Lau Afioga i le Fofoga Fetalai faafetai mo le avanoa. Sa ou nofonofo totoa lava ma ou faalogologo atu po o fea lea e agai i ai ia le saunoaga a le sui usufono mamalu, ma e atonu foi o lea ua toatolu lava sui usufono o lea ua saunoa lava ona o le tulaga foi lele po o fea o agai i ai ia faaiuga o suesuega a le Faalapotopotoga lea e i ai nei – ma e ou te iloa ana lavapapale le....ae alu pea lana saunoaga ae sei mulimuli ou tali atu, ia ona faamalamalama uma lea o mea uma ia. A o lea o le a....ou te iloa ua tatau loa ona ou tali atu i le....aua ua toatolu sui usufono ia na....

FOFOGA FETALAI: Saunoa lau Afioga i le Minisita.

Tofa Hon Faamoetaulao Lealaiauloto Ulaitino Faale Tumaalii: O le mea muamua lava, o lea na pa'ia i le saunoaga a le Palemia le tulaga foi lele, o le SROS o le Research Organization, o latou e amatamea ma suesue ma develop le technology ona ave lea i tua i le Private Sector, o le mea la lena o lea e i ai nei. Ma i le tulaga o le falaoamata, ia o lea ua uma ona develop formulations o le falaoamata, la ua faatau e le Vailima le Brewery e fai ai ia le beer, o lea na tatala talu ai nei i le tulaga ia le mea, e fai e le SROS ia le falaoamata ae faatau e le Vailima, lea na gaosia ai le latou beer lea po o le masina lea na tea atu nei lea na i ai. O lo o i ai foi ia le kamupani lea e omai

mai Niu Sila lea ua galulue nei ma le SROS e taumafai e market le gluten_free falaoamata lea i fafo, ma e o lo o i ai foi le interest mai le isi kamupani a Farani. O lo o ua amata nei ona fai ia le tulaga lea ma le manatu, e fai loa aveatu i tua. I le tulaga la o le avocado oil, o lea po o le masina fou e saina ai le feagaiga i le tulaga o le faatau atu o le technology lea i le kamupani lea ua i ai nei – ma o lo o fai negotiations nei ona ave loa lea o le purchase agreement e work ai le AG Office ona faatau motu lea e latou o le technology lea e gaosi ai le avocado oil, ae fesoasoani i ai le SROS i le gaosiga ma le faatonutonuina o mea. O le tulaga lena o lea ua i ai le tulaga o le avoka. O le mea lea e i ai nei, aua e pei e lua lava ituaiga avoka lea ua uma ona identify e le SROS e aupito sili atu ona lelei atoatoa le oil e maua mai ai, its a very high quality, o le hass ma le suerte. O le toalua lea o lea ua aumai, ma o lea la ua galulue faatasi nei ma le Matagaluega o Faatoaga, e taumafai e aumai ni seedlings o le avoka lea e toto iinei i Samoa. O developments uma lea ua alu i totonu o le Faalapotopotoga.

E le gata foi i lea, o le bio-diesel oil lea ua i ai nei, o lea ua faaoga e taavale le tulaga o bio-diesel lea e feoai ai taavale ua leva po ua lua ea pe tolu tausaga o feoai ai taavale a le SROS, o lea foi e feoai ai taavale a le SPREP. O le tulaga lava lea e i ai, ina ia lava le sapalai e gaosia ai le bio-diesel lea. O lea foi la ua galulue le Faalapotopotoga i le tulaga lea e taumafai e develop le virgin cooking oil mai le suauu popo, i le tulaga foi lea e leai se odour o le copra e present i le final product ae aumai e kilia lava pei o le vai ma ua uma foi ona prepare samples na o lea ua ready. Ma o lea e galulue nei le SROS ma isi foi saienitisi i le develop ina o le formulation o le margarine. O le ituaiga margarine lea e fai, aua ia manatua o le suauu popo, it's a hard oil e le mafai ona fai ai se margarine na o le suauu popo, aua e toa i le tulaga pe a low le temperature. A o le mea lea e manao i ai, e pei la o le oil o le avoka lea e i ai, it's a soft oil, o le mea la lena o lea e faaoga ai le base lea e taumafai ia sue le paleni lena ina ia maua ai le consistency lea e manao i ai le spreadability o le margarine pe a faapea e faapata ai le bread e spread e le Malo. E takes time to develop le expertise lea. O lea la e taumafai saienitisi i le SROS e sue po o le a tonu le ituaiga oil eseese faatasi ai ma le avocado oil ina ia maua le consistency lea i mea nei, aua o products nei, it has to be marketable. E lelei foi le quality mo export. A le lelei la, e leai se aoga e fai ai, e le taulia. Ae afai foi e avatu foi e taste foi lele, e lagona lava e tagata latou te faia ia suesuega, e le mananao foi la i ai. O le mea foi la lena, it takes time e pei lava ona saunoa i ai le Afioga i le Palemia, e le faapea e fai atu nei loa maua, e leai. O le tele foi o scientific research, most of them e fail lava i le initial period, ae pei o le tulaga lena e suesue ma mafaufau, aua e le soona suesue le SROS i so o se mea e le o i ai i totonu o le mandate a le SROS. E pei la o le Tulafono Tau Faaofi lea na fai mai nei i le taeao, e limataitaiina auaunaga a le SROS i luga o le mandate o lea na spell atu e le Malo o i ina tou te o ai, ae le faapea a loto lava lea e fia fai lana research just because o la e interest i ai ona alu lea fai. No, it has to be done i le mea lea e aoga i le tamaoiga. E pei o le tulaga lea.

Ona ou oo atu lea i le tulaga lea i Taelefaga. O lea foi ua fesoasoani mai ua manaomia mai e le EPC le SROS latou te galulue faatasi i Taelefaga, i le mea lea o le hydro. Ma o lo o taumafai foi la i se tulaga e develop se methodology e taumafai ai e faamama ia aua nei alu i le discharge lea i tai i le sami, o lea e

maua ai o lea e afaina ai le environment ma afaina ai le marine life o lea e depend i ai tagata nei, aemaise lava o le odour. E pei la o tulaga ia.

I tulaga o le narcotic, lea na asiasi foi i ai le Afioga i le sui usufono mamalu mo Faasaleleaga Nu.2, ia, o le tulaga lena. O lea foi ua alu atu i ai le SROS e fai suesuega ia. Ma o le taimi nei, o le marijuana lea ua suesueina uma i o, o lea e avatu lava e leoleo samples mo moliaga. E o atu lava leoleo e molitu atu samples faatoa handover i le au saienitisi ona suesue lea e latou aumai sao e latou le tulaga ma le faamaoniga foi o le tulaga o le narcotic le mea lea in possession o se tagata e maua ai. E pei la o le mea lea e fesoasoani mai ai le SROS i le tulaga i totonu o le Faamasinoga.

E pei o le tali atu lena i le tulaga o le mea. E le faapea la o nofonofo le SROS i le tulaga na o le research le organization lea e i ai ona tuu atu lea i tua i le private sector. O lea na saunoa le Afioga i le Palemia, o le tuai o le respond mai a le private sector aua o le tele lava o le private sector e omai e show le interest ae a fai atu loa la ae faapea mai, e leai se tupe seiloga tou te fesoasoani mai po o le a le tulaga e i ai. O lea la ua amata ona galue le source lea i fafo, aua e manaomia foi e le Faalapotopotoga ni tupe e faatino ai ana auaunaga. Ma lou faaaloalo lava.

FOFOGA FETALAI: Malo. E manatu ua malamalama le faamalamalama a lau Afioga i le Minisita, a o le itu taua lea leaga o lea e faasolo atu finagalo o sui usufono mamalu. O lea ua matua tali manino lau Afioga leaga sa aafia i nisi o finagalo e lua pe tolu, o lea ua tolu i le sui usufono mo Faleata Sisifo ma o lea ua faamalamalama lea mataupu, leaga o lea e faasolosolo pea tuleiga ma saunoaga nei tei ua toe tu foi se isi sui usufono a o lea ua uma ona tali. O le aoga lena e fai ma tuu atu i lau Afioga i le Minisita e tali ma puupuu ai le tatou galuega.

Tulai mai lau Afioga i le sui usufono mo Faleata Sisifo e faaauau le saunoaga.

Tofa LEALAILEPULE RIMONI AIAFI: Faafetai i lau Afioga i le Fofoga Fetalai. Faafetai i le Afioga i le Minisita ua matua matagofie lau faamalamalama i vaega uma. O le faaiuga lava o lau saunoaga na e faapea mai ai, ua augata le private sector e omai. O le mea la lea na amata atu ai lau faamatalaga. Aua a augata e omai, e o tatou e aumai. Fai i ai le fesoasoani ma ave i ai le technical e fesoasoani i ai, ae faafetai o lea ua maua, aua o le mea lea na ou fia oo i ai i le mea lea ua faasalalau mai e le Vailima i le latou pia lea ua fai, a o lea ua fai le tou paaga. Ia o mea lelei la na, leaga o lea e pei ua expand, o le tatou Tulafono Tau Faaofi lea mai lau Afioga, o lea ua expand lau services ae pei o le core lava lea i le amataga lea e tau tuliloa atu e matou ma lou nei tagata. Ae manatua foi o le isi mea lea e promote e outou, o lea ua outou promote mai ai, o le public private sector partnership, aua o le isi foi mea e tilotilo i oloa nei e fufou mai e outou pe feasible pe i ai se maketi, po o le a le tau, pe taugofie atu i lo mea ia e fai i fafo. O mea faapena. Ae faafetai o lea ua e saunoa manino i vaega ia ua oo i ai suesuega ma tou paaga ia sa saili, o le mea lea sa fia faalogo i ai lou nei sui usufono ma nisi o lenei vaega lea ua e saunoa i ai.

O le Tulafono la lea ua tuu mai, o lea ua faaopoopo ai isi auaunaga ia ua faatino i lau Matagaluega, o le mea lea ou te fia fesili ai i lau Afioga, o le mea lea o le EIA. Aua o lena foi e i lalo o lau Matagaluega le PUMA, aua e pei o

latou ia o lea e nafa ma mea ia. Po o le a la le eseesega o le EIA lea e fai i le PUMA ma le EIA lea e fai i lau Matagaluega, pe leai sona feteenaiga i ina. Po o EIA lea e faatino e lau Matagaluega e faapitoa lava i mea o lo o suesue ma tulaga faapena. Aua o le tele foi o EIA a nai tagata ia e o atu e fai, e o atu ae faapea mai le PUMA e o e fai EIA. A o le tau o nei mea e le taugofie, e le iloa foi e tagata po o fea e o e sue ai ni tagata e faia nei mea. Ae afai e maua i i se fesoasoani faamamaavega as a template foi lea, e fesoasoani i tagata nei aua o isi tagata na o le tasi lava le fale e fai o le fale e lua potumoe, ae moomia ai lava le faiga o mea nei. Sa ou vaai foi i le pepa i le Aso Sa, o lea ua faasalalau mai ai fale o tagata o lea e fuafua e fai. E fou lea mea ma ou te talitonu e taugata tele i lau Matagaluega. Ou te le iloa foi po ua i ai se faatagaga a tagata nei e faasalalau ai o latou fale o lo o fai, e tau mai ai latou igoa ma fale o le a fau, pe i ai nisi e faalavelave. Ia, e lua fale ia na sau i le Aso Sa. O lona uiga afai e faapea le faasalalaua mai, ia tafefe i se tupe e alu ai ma se taimi, aua o mea ia o lea ou te talitonu e fai i atunuu i fafo, e fai faacassette foi lele e aumai lava tai tolu masina ma aumai na o faamatalaga ae le sau atoa mea nei. Sei toe tagai ifo i ai lau Afioga i lea vaega ua tumu ai le pepa atoa ae na o le lua fale lea e faasalalau mai e fai, mea o EIA. Ae afai o lea la ua faasalalau mai, o lea ua aumai i le Tulafono Tau Faaofi, o lea ua i ai foi i lalo o lau Matagaluega le avanoa e faatino ai nei mea o EIA, sei tagai ane la i ai. Po o i ai la se tou fesoataiga ma le lab a le falemai aua e tasi ia vaega o lea e ave foi a latou suesuega i fafo. Afai lava ua fesoasoani i ai e faalautele, aua o le tuai lea o le faiga o togafitiga o isi tagata, ona o lea fai mai o lea e ave i fafo. A o lea la ua suesue nei mea nei o narcotics. O lea foi na saunoa lau afioga i le mea lea o le forensic e sao o lea ua mafai ona faatino i inei, aua o lea ou te tau maua e le i mafai ona faia nisi o suesuega i inei, ona e leai se potu faapitoa e faatino ai. Ae afai ua mafai ona faatino i inei, e avatu lau faafetai ma lau faamalo pe afai e moni ua mafai ona suesue i inei mea nei aua o mea nei o fingerprints ma mea ia o crime scene ma tagata foi nei ua maliliu ma tagata faapena, o lona uiga o le a faalautele i ai le suesuega a le Matagaluega.

O le autu na faatu ai le Matagaluega o le a ou toe foi i ai i le amataga, e lelei tele. O se vaega taua, mai le taimi na tatala ai le fale sa ou i ai, o le taumafai lea e fai ni oloa e substitute ai imports i le tele o mea ia e aumai fafo i le faaaogaina o fua o faaeleeleaga lea ua tele i Samoa. Ia o lau fautuaga i lau Afioga, o i e tataua ona ave pea i ai le faamamafa ma le faamuamua e fesoasoani ai o lea ua matua tele le talo, tele meataumafa i le Afioga i le Minisita mo Faatoaga, ta te alu atu lava o galue mai Nuu ma alu i tua i itumalo e asi. Ae a fai atu la ma le pitolaau lea a tatou i isi vaega ia o le Malo e galulue faatasi ina ia faaoga le tele o... ua tele lea faamamaavega mo tatou. Aua o lea ua ou faalogo atu nei o saunoa lau Afioga i ituaiga avoka foi nei e aoga a ua leva ona toto avoka tagata. Ina nei tei foi ua toto toto ae avatu foi ae le aoga. Aua o lea e pei o le avoka lea o le hash lea e laitiiti lanu uliuli, e pei o le avoka lea e saunoa i ai lau Afioga, e le o malamalama i ai le toatele, aua o le tele o le avoka lea e toto o le avoka meamata uumi foi nei. Ia tasi la lea mea ua tataua ona promote ma silafia e tagata ma le aufaifaatoaga, o mea tonu e ave i ai le malosi e maua ai le tupe ma maua ai le mea aoga e ono ave i fafo.

Ia, ma le faaloalo lava lau Afioga i le Fofoga Fetalai. Faafetai mo le avanoa.

FOFOGA FETALAI: Malo. Ia sa tuu atu lava sei saausi lau fefoifoiai, ae le afaina o lea ua tali manino le Malo o lea e faatino le tatou galuega, ae malo le onosai. Faafetai le fautua mo le Matagaluega. O le a tuu atu le avanoa i se tasi o sui usufono mo Salega, Afioga Afualo Wood Utī Salele ona sosoo ai lea ma le sui usufono mo Aana Alofi Nu.3.

Sa fia tulai mai lau Afioga i le Minisita pe sei maea fesili ia ona... Ia faafetai.

Tulai mai se tasi o sui usufono mo Salega, Afioga Afualo Wood Utī Salele.

Afioga AFUALO WOOD UTI SALELE: E toe faafetai atu foi i lau Afioga i le Fofoga Fetalai. E faamalo atu foi i lou uso a Minisita ona o le taua tele o lenei Tulafono Tau Faaofi. E moni lava o lea ua maioio mai vaega ia e tolu, ae ona o i o se molimau ola lea o lea e faasolosolo pea i luma galuega. E pei ona saunua le Palemia, o mea nei o suesuega o le fatu lea o so o se atunuu i ana galuega faatino. O se tala faatusatusa, o le taimi nei toe lava o Amerika le Malo lea e tau nei o le super power, a o le fatu lea e ala ai ona super power Amerika ona o le malosī o ana suesuega. E moni lava la o lalo i isi vaega ia o laasaga i lalo o aoga o le tausaga muamua, o le tikeri ma le isi, a o luga i le tauluga, e taulai uma ia le vaavaai a le lalolagi ia Amerika, o i foi e alu i ai le tele o tupe a le Malo e oo lava i le fitafita Amerika, o le taugata ia, e latou te totogiina ia Saienitisi mai Saina ma isi atunuu e omai e aoga e sue latou fomai, ia a o nei suesuega uma, e uma ona tuu laia e Amerika ia suesuega ma nonofo ai lava le toatele o i latou nei, ia ma atili malosī ai lava ia le tulai mai a Amerika. E faafetai la, ona o le agaga lea na ala ai ona fausia ia le SROS. Ae o lau au ia toe vaavaai e toe soso atu ai i lau Afioga ona o lea ua faaopopo i ai vaega ia e tolu, o lea ua e tali manino lava ua malamalama foi, ae ua ou toe tilotilo lava, na o sina fautuaga lava i lau Afioga pe le o silasila, ona o lea e foliga mai o lea lava e felogonai ma fafo ina ia mautinoa ua faatumauina ia le talitonuina o le tatou suesuega lea i fafo, a, le International Certification foi lea, ona o la e galulue ai. Ae pe a...na o sina fautuaga ona o la e afio mai foi le Afioga i le Minisita mo Aoga, Taaloga ma Aganuu, ae manaia ae aumai i lalo le galuega lea i lalo o le SQA, a, mo se faataitaiga ona maua ai lea o le Samoa Qualification and Research Authority, aumai o i latou ia e nafa o le gafatausi lea, ina ia mautinoa ua maua uma ia le faamaoniga lea agai i fafo o suesuega, aua e moni lava o lea e faatino lava e le SROS agai i fafo, ae pei e manaia foi ona sa mafaufau pea i ai. Ae na ona tuutuu atu i a oulua Afioga, ae aumai i lalo o le Faamalu, a faapea loa e tasi i lalo o le Samoa Qualification and Research Authority, o le matuai malosī lava, ona faigofie lelei lea i le tele o galuega lea e faatino mai. Ae o le tulaga lava ia i le galueaiina o suesuega ma mea uma lava, faafetai lava, e moni lava e le faigofie aua a uma ona tapena ia ona taoto lea mo se taimi a i ai lava nisi e fia faafaigaluega a latou tupe mai le galueaiina le tele o le tomai lea ua uma ona taatia, ae sei silasila po o...ina ia mautinoa ua faamau faailogaina faale-Tulafono Faava o Malo, Berton faamolemole, a, ia le tele o suesuega ia e fai e tatou, aua ou te talitonu o lea ua matua le tama, ua tele foi suesuega ia ua uma ona fai, ae ona o le tele o isi soifuaga o tatou e uma ona fai iinei e tatou ae lei faamau faailogaina lea, ona uma laia, ia ua fai mai e isi atunuu, aua e aoga e taua e le gata o le meatotino a Samoa, ae maua ai foi ma se tupe a le tatou atunuu pe a faapea e faaoga ia le tulaga lea, aua pei ona ou fai atu, o le agaga

atoa ia o le SROS, ina ia mautinoa o lea ua i ai se vaega e tua i ai ia le tatou atunuu, ona aumai loa lea i lalo ina ia faigofie, o lea ua foi ua toatele alo ma fanau o le tatou atunuu, ia ma faaoga mai foi le tomai o isi atunuu aua e faapea, pei ona ou fai atu o le Malo Tele o Amerika, o se atunuu e fau mai tagata eseese e fefaasoaai lo latou tamaoiga e fua agai i le tofa manino ma le poto salalau la e i ai, ia ma saga malosi ai lava ma aveia pea i latou o se Malo sili ona malosi ona o le tulaga lea, aua ana le faapea e le vaivai mea nei o suesuega, ua leva lava ona i luga le tele o isi malo lea e i ai. O lau soso atu lea o sau fautuaga lea i lau Afioga, faafetai lava.

FOFOGA FETALAI: Malo faafetai, faafetai saunoa. Ia le sui usufono mo Aana Alofi Nu. 3.

Afioga TOEOLUSULU CEDRIC POSE SALESA SCHUSTER: Faafetai i lau Afioga i le Fofoga Fetalai mo le avanoa, faafetai atu foi i le Afioga i le Minisita mo le Tulafono ua faataaiaina i le mamalu i lenei itula afiafi. E i ai nai vaega ia lau Afioga i le Fofoga Fetalai e fia avatu ai foi se tuualalo i ni motugaafa foi mo le atinaeina o lenei vaega taua o le tatou Malo.

Muamua lau Afioga ou te fia afea le tulaga lea pei ona saunoa le Afioga i le Minisita i le amata mai o le Faalapotopotoga i ona vaega taua sa faapea ona taumafai e faatino pei ona saunoa i ai, pei o le vaega lea o le renewable energy ma ou te tau matau atu pei o le value added lea o tatou faatoaga foi po o fua o faatoaga ma atinae e mafai ona maua ai se tau lelei e faatau atu ina ia mafai ona faaogaina le tele o tatou fua o faatoaga foi i totonu o le tatou atunuu.

Lau Afioga i le Fofoga Fetalai i le tulaga lea i le renewable energy, atonu e mafai ona maua se malamalamaaga mai le Afioga i le Minisita, ona pau lava le vaega lea ou te tau maitau e au ia, e ui ina faaigoa o le renewable energy, ae pei o lea na o le bio-diesel lava le vaega lea e alu i ai le faamamafa, po o ua i ai ni a tatou suesuega po o ni faaiuga foi e maua mai i isi vaega o le renewable energy, po o fea tonu le vaega e aupito i talafeagai, po o le a tonu le taimi aupito i lelei, po o a foi ituaiga panels e aupito sili ona....mo le vaega lea o le solar energy.

Ia ona see mai lea i isi vaega o tatou renewable energy tatou geothermal po o le a po o ua faatinoina ni suesuega, po o fea ni vaega, ae po o le a foi le taua, pe mafai ona faatino, ona o lea e tele ia...e manaomia foi po o lava i totonu o le tatou atunuu, po o ua faatino lea vaega?

Ona ou see mai lea i le vaega lea o le bio-diesel pei ona taua e le Afioga i le Minisita. Atonu foi e tele ituaiga laau ia e mafai ona faatino ai le bio-diesel, ae tau maitau atu pe na o le tasi lava le laau lea o lo o faatino ai suesuega ma maua mai ai foi nai mea ia o lo o faaogaina o le tritoupher, ia e tele foi aafiaga toatuga o lenei laau i le siosiomaga, ae le gata foi i lea o le puipuia o native plant o le tatou atunuu. Ae po o ua i ai ni a tatou suesuega i totonu lava o Samoa i isi foi o laau e mafai ona faaogaina mo le renewable energy, tai pei o le oil-palm, o lea foi e maua pei o le suauu o le niu coconut oil lea e pei ona faaogaina, a o le tele foi o faamaumauga ma suesuega o le tasi lea suauu aupito i taugata le faaliliuina, as a...mai le economic stand point, e tele atu le tatou tupe e mafai ona maua mai i le faaogaina o le suauu o le niu i isi vaega nai lo bio-diesel. Ae po o le a se suesuega foi a le tatou Pulega?

O isi vaega o le renewable energy ia le protect, e talitonu e tele foi ni suesuega sa faapea ona taumafai i ai le Pulega o le Siosiomaga po o le Matagaluega i tausaga ua tuanai, po o le a se faaopoopoga a le tatou Ofisa o le SROS e iloa ai po o fea vaega tonu o le tatou atunuu e mafai ona develop ai le Abject aemaise foi o lea e maitauina e le Pulega o le EPC, o lea foi latou te faatinoina ia suesuega o le Wind Energy, po o le a se soosootauau po o se auunaga po o se research e tusa o le faatinoina o lenei Faalapotopotoga e mafai ona latou faatinoina mai ia vaega ia mafai ona ata mai ai se vaega ua mafai ona tatou faatinoina, pei o le auga autu na amata ai lenei Pulega. O le a ou le oo tele i vaega ia o le value added lau Afioga, ona ou te talitonu ua lava faailo foi e le tele o nisi o sui usufono ia le taua o lenei vaega, e talitonu lou au sui usufono, vagana ia le avoka ma le ulu, lea e pei e tau ata mai ua i ai value added mo le valu tausaga, ou te talitonu, o le tele ia o tatou faatoaga ma atinae ae le o maua se tala pe ua faatino i nisi i isi vaega o le fiu, i nisi o atinae ma faatoaga e mafai ona ata mai ai se auunaga ma se lumanai e mafai ona tatou maua mai i lenei Ofisa o le SROS.

Lau Afioga ona ou oo mai ai laia i le vaega lona lua se vaivaiga foi o lenei sui usufono. O au ina ua ou faalogo i le tausaga ua tuanai po o le vaitaimi na amata ai ona faatalatalanoa lenei Pulega, o au o se tagata aupito sili ona fiafia, aisea? Ua loa foi tausaga o ou taumafai e puipuia o traditional knowledge ma intellectual property rights o le tatou atunuu, e tele foi tausaga o finauina ma fesoasoani mai ai foi, ina ia mafai ona puipuia ia tomai o i latou o le tatou atunuu sa faasoa ma latou faasoina ma maua mai foi le tele o vailaau e auala mai i laau, aemaise o le tele o le oa o le tatou siosiomaga o lo o i ai. Sa ou faapea o le faatauina e le vaega lea, ona o lau Afioga, o isi uma atunuu e faamoemoe i o latou siosiomaga biodiversity, o Samoa pe silia ma le 800 native plants silia ma le 900 ia corals pieces ma fish pieces, sili atu i le tele lea e le mafai ona faamauina. O le taimi nei ua tele atu ia le collection o tatou laau o la e faamau i Iunivesite ma herbariums i fafo, ae leai se mea o tuu i totonu o le tatou....O lou naunauga lea faapea ia ao ona tatou ave i ai le faamuamua a lea vaega, muamua i a tatou document ina, po o a uma laau i totonu o Samoa, lua, ia o a aoga o laau. E le gata i le faaogaina e i latou o taulasea, ae e i ai foi laau e aoga i nisi vaega.

O vaega ia ou te talitonu lau Afioga, e tele le oa, e le o mafai ona suesueina e isi atunuu, ae afai tatou te tulimatau ma tatou taumafai e faatau lo tatou siosiomaga ma vaega o le tatou atunuu, e talitonu e tele atu le tatou tupe i lo i le tatou o e taumafai e fai le suauu o le avoka, lau Afioga, o le suauu ua mafai ona maua mai ai i totonu o le...po o le fetau....

FOFOGA FETALAI: Malie le sui usufono o lo o saunoa, sei tulai mai le Minisita.

Tofa Hon Faamoetauloa Lealaiauloto Ulaitino Faale Tumaalii: Lau Afioga i le Fofoga Fetalai, sei tau faasaosao atu lava le sui usufono lea e sese mamao lava le mea la e sau ai. O le tulaga o laau eseese lava o lea ua i ai le biodiversity, o lenei ua uma ona na tausia e le Ministry of Natural Resources and Environment, ma e o le tulaga foi lea e pei ona e saunoa o le tri-trouper faapea e invasive, e le invasive, na omai Saientisi faapitoa lava i fafo mai le IUCA-International Union e protect ina le environment ma omai fai le study na aumai e le SROS, o le iuga o le latou lipoti afai e te fia silasila i le lipoti, ia

ona e alu atu lea i lou ofisa ou te avatua ia oe le lipoti, o le iuga o le lipoti, e le invasive, o le uiga la po o se internet lea na e faitau ai lena e te aumaia ai le ituaiga malamalamaaga lena e te saunoa mai ai, but o tulaga lava ia ua uma ona leoleo ma puipui le.....

O le tulaga i le wind power mo le mea lea o le renewable energy, o le mea lena o lea e galulue faatasi ai nei le EPC ma le SROS, lea ua uma ona sainia le feagaiga a le Grant lea e USD\$5miliona mai le United.....lea na lele faapitoa mai ai lava le saini a le Afioga i le Minisita o Tupe le Grant lea, aumai fua e maua fua mai le tusiga o le polokeki lea, aua o le mea lea ua taumafai atu i ai ia le Faalapotopotoga faatasi ai foi le Energy Sector, o lea e vaavaai uma lava i mea o possible sources, aua e le faapea e last ia mea ia o fossil oils o lea e predicted e le au Saienitisi o le lalolagi e within that needs 50 years ua exhauste ua uma, ua leai se.....o le mea foi lena e silafia, o le Faalapotopotoga lea Faava o Malo o le IRENA, o le latou export number one lea o le fossil fuel, a o lea ua sit ai ia le head quarter o le renewable energy developments. Aisea? Aua o la ua latou realize ina, pau lava lea o le tali i le agai i luma. Ma o lea la ua agai lo tatou Malo i le tulaga o suesuega foi i totonu o le solar, ma e o lea foi ua uma ona galulue le vaega ia a le EPC i mea o solar power harvest foi lea, a o le wind o lea e fou nei, o lea faatoa amata ia tulaga ia o trials ia o le matagi.

O le tulaga i le mea lea o le geothermal ea lea na mention mai, o le geothermal, out e fai atu, as long as I am in the Chair o le Minisita a le Matagaluega lena o le Environment, ou te le taitai lava ou ioe i ai i ni developments faapena, e oo foi i le mea o le tulaga foi lea o le mine ina o le seabed. Ia te au ia, e tele lava le risk e take e tatou i le tulaga o le environment. O tatou le atunuu aupito i sili ona laititi le EEZ. Ma afai o le tulaga lea tatou te faia ituaiga development faapea, ou te iloaina o le a matua afaina lava le environment agai i luma. As a Minister of the Environment, ou te le allow ina na ituaiga mea. O lea e nofo ia te au tulaga... sei vagana ai lava mea fai faatasi e maua mai ai se tupe ae fai i isi atunuu. Aua e i ai poloketi na e fai faatasi, ae faatino e isi atunuu ae le faatinoina i totonu o le environment o Samoa. Ia e pei o le tulaga lena i le tali atu.

O le bio-diesel e taua tele, aua its about over 40% o le imported of fuel, lea e alu i le transport. O le tele ia o le tupe lea e alu i le transport. O lea foi la e vaavaai i isi sources ia, o lea foi la e vaavaai i le bio-diesel, o lea foi e vaavaai i le bio-asnal. Le sui usufono mo Aana Alofi Nu.3, o la e valavalaau ifo le vaega lena (*faasino i sui usufono o le Itu Agai*), tusi ifo a latou fesili na e aveifo ia oe o la e fesoasoani mai i le tulaga o le transport. Ia, o le mea la lea o lea e avatu ai faapena.

O le tulaga i suesuega i isi laau e pei ona oo i ai le tulaga o le saunoaga a le sui usufono mamalu, e economic dictate le mea lena. A faapea lava e vaavaai atu i a ii lea suesuega e le economical le viability o lena mea, e le alu i ai le sources o suesuega. O lea ua i ai lava le mandate a le SROS e follow a ii ana galuega ma limataitaiina ai. Ae faamanatu atu foi i le sui usufono mamalu, e lei fausia Roma i se aso e tasi, ioe. Ma o suesuega lava faasaienisi ou te iloaina o le tagata lava e iloa le science o lea latou te malamalama i ai, ae o le toatele lava e le o malamalama i ai, atonu o lea e faapea mai loa e fai nei lava maua nei. Ma le faaloalo lava.

FOFOGA FETALAI: Malie lau Afioga i le Taitai o le Itu Agai sei sau le tali faaopoopo, sei fesoasoani mai le Minisita mo Fesoootaiga ma Faamatalaga Tekonolosi.

Tulai mail au Afioga i le Minisita.

Afioga Hon Tuisugaletaua Sofara Aveau (Minisita mo Fesoootaiga ma Faamatalaga Tekonolosi): Faafetai i lau afioga mo le avanoa. E leai, ona pau lava lea o le mea na ou tulai atu ai, ona o lea sa saunoa le sui usufono mamalu i laau ia o le avoka ma le niu. E i ai mafuaaga na ala ai ona faataoto le faavae o le Faalapotopotoga lea i laau ia, aua e lei faia se miti faafuasei. Na fuafua lelei lava laau ia e tolu, o le avoka, o le niu ma le ulu. O le fesili, aisea? O laau ia na faavae ai le Faalapotopotoga lea. Aisea? O le mea muamua, e fau ma soloi i le tatou atunuu ae le o faaaogaina. A tagai i le avoka, tagai i le niu, tagai i le ulu, ona pau lava ia o laau e maua uma lava i aiga uma. E mafai ona toto e le tagata Samoa laau ia i se tulaga vave, faigofie ae malamalama ai. O le mea lena na ala ai ona piki le tolu lea mai le amataga e faavae ai le Faalapotopotoga lea a o lea ua faaleaga mai ma aumai le finagalo e le lelei ia laau.

FOFOGA FETALAI: Ia, o le a sei avatu le avanoa, sei tulai mai le Taitai o le Itu Agai. O fea e agai i ai lau faauilavea?

Afioga Hon Palusalua Faapo II: Lau Afioga i le Fofoga Fetalai, leaga o le saunoaga a le Afioga i le Minisita i saienisi aemaise lipoti ia mai expert i fafo, aua ua faalagolago tele i ai lau Afioga i le Minisita, a o lea e i ai le expert o mea ia, e tatau ona faafogafoga lelei ma faaoga fautuaga mai le expert i mea tau environment.

Ma le isi mea lau Afioga....

Tofa Hon Faamoetaulua Lealaiauloto Ulaitino Faale Tumaalii: E te le iloa foi po o i ai se expert i o e tusa o le expert lea e i le Itu lea e iinei.

FOFOGA FETALAI: E le gata ina saienitisi, ae toe polofesa. O le mea lena o lea e tau faamanatu atu. Ia tulai maia le sui usufono mo Aana Alofi Nu.3, na ona ou te faamanatu atu, ina nei tiutalaloa atu tatou lauga faalauaitele ona tosotoso atu lea o le a felefele le tatou mataupu. Na o le lua lava vaega o le Tulafono Tau Faaofi lea na toe teuteu na o mea tau narcotic, o le faamaninoina po o se aisa lea na kuka po o ni marijuana ia na maua. O le mea lena lea na faamamafa atu i le tatou Tulafono Tau Faaofi. Ae tulai mai e faaauau mai le saunoaga.

Afioga TOEOLESULUSULU CEDRIC POSE SALESA SCHUSTER: Faafetai i lau Afioga i le Fofoga Fetalai mo le avanoa. Ia, e moni lau saunoaga lau Afioga i le Fofoga Fetalai, a o se tuualalo foi po o nai motugaafa ona o le saunoaga i le faamalamalamaina o le Tulafono Tau Faaofi e le Afioga i le Minisita. O lea e avatu ai nai motugaafa. Sei vaeane foi le Afioga i le Minisita ma lena Itu aemaise o le afifio o le Palemia ma le Kapeneta, e le o se isi itu, e leai. O le naunautaiga o le motugaafa po o se vaivaiga o lenei foi Itu e avatu e fesoasoani e tapena ai lo tatou sa, leaga i lou talitonuga o le tatou sa e fai faatasi lau Afioga i le Fofoga Fetalai. O vaega foi

ia o lea e avatu ai, ona o lea ua faaalua, e leai e taua lo tatou faaalua o manatu i totonu o le Maota Fono, atonu e maua ai foi ni manatu e tapenapena ai mo le lumanai. Ae na o nai faasaoga lau Afioga i le Fofoga Fetalai, ona o lea ua saunoa le Afioga i le Minisita i le Faalapotopotoga lea o le IUCN. O le faasaoga o le igoa o le Faalapotopotoga, o le International Union for the Conservation of Nature. Na suiina i le tausaga 1994 i le World Conservation Union. Ma o le vaega foi lea o lo o i ai le base i Fiti, o au lenei lea out e tautala atu lau Afioga i le Fofoga Fetalai na matou i a ii le aumaiga o le lipoti lea e talanoa mai ai le Minisita.

FOFOGA FETALAI: O lea ua maua le clarification sao o le....

Tofa Hon Faamoetaulua Lealaiauloto Ulaitino Faale Tumaalii: O lena ua uma ona tau atu le IUCN.

FOFOGA FETALAI: Malo faafetai. Oi, e lei uma lau lauga?

Afioga TOEOLESULUSULU CEDRIC POSE SALESA SCHUSTER: Lau Afioga i le Fofoga Fetalai, e faamalie atu i le Afioga i le Minisita mo le Communication, e moni. E leai e le o se agaga ese na... ona o le faailo atu foi o vaega ma laau o lo o faaogaina o lo o taumomoli atu i tua le taua ia te au o laau Samoa.

Lau Afioga i le Fofoga Fetalai, o le laau lea o le tava po o le kava, po o le scientific name o le pometia pinata, o le fua o le laau lea, e ai faalele e le tele o le Pasefika. Aisea ua le suesueina e Samoa? E mafai ona faatinoina, e maua ai se lumanai. E pei ona outou taua le ola solo o laau ia o le avoka ma le niu, a o le laau lea o le tava, o le laau foi lea o le fetau lea e tumu i o tatou gataifale, e tele atu le suauu e maua mai ai i lo laau toto ma isi vaega. O le naunautaiga lea e ia te au, ia faataua laau i totonu. E tele laau lea e pei ona saunoa le Afioga i le Minisita, o le biodiversity o lo o i ai le cater, leaga sa ou galue ai foi i le faamaumauina o laau ma aoga sa fesiligia foi i latou o taulasea ma i latou o lo o feagai na o latou taliga le faatinoina o le aganuu ma le taua o laau i totonu o Samoa. O lou lea talitonuga, tatou toe foi e fesili ia i latou, e uma atu latou ia ua le mafai ona tatou toe iloa le taua o laua a le tatou atunuu. A ia ave se tatou faataua i laau nei o le atunuu. E misi atu loa i le taimi lenei, afai lava tatou te faagasolo pea i fafo, lau Afioga i le Fofoga Fetalai, ua atili ai lava ona faigofie ona ta le vaomatua, tatou te le iloa o le atone ma nisi o laau Samoa e taua. Na pau lea o se soso atu lau Afioga i le Fofoga Fetalai i le taua o lea vaega, ma e taua foi ia te au o le tele o tatou laau ia ou te talitonu e le gata i le faamauina ma document fai se tatou herbarium, atonu e mafai ona tatou galulue faatasi ai le SROS ma le NUS ma le MNRE, e mafai ona taulai mai ai. O se e fai sana suesuega i se laau e pei o le matalafi, o le laau lea e aupito species i totonu o Samoa, ma e pei ona uma outou silafia e tele mai e mafai ona fofo ai. E 21 species o le matalafi po o le psycutria ae le o mafai ona suesueina e tatou pe aoga uma nei vaega. Atonu o le \$50miliona e mafai ona maua mai e tatou e fesoasoani i le atinae o le atunuu pe a tatou faataua laau o le tatou atunuu. O se vaega lea lau Afioga....

Ona ou see mai ai lea lau Afioga i le Tulafono Tau Faaofi. E tasi lava si vaega e fia faamamafa i lau talatalanoa i lenei itula afiafi.

FOFOGA FETALAI: Faifaimalie o lea e... Ia, fai sau koma sei tulai atu le Minisita mo Fesootaiga ma Faamatalaga Tekonolosi. Ua fai ma e tau sela ma ii le tau faamalamalama o species ia e te saunoa i ai. Tulai mai lau Afioga i le Minisita.

Afioga Hon Tuisugaletaua Sofara Aveau: Ioe, fai ma malolo i tei ua gasegase se isi. O lea ua saunoa le Afioga i le sui usufono mamalu ii si vaega ia pei o le herbarium ma isi mea ia na te tau maia, ae i ai le herbarium i Alafua, sa fai i le 1967, se taimi faapena. O la e la e mafai ae o le faalavelave ua aveese isi mea. O le mea lena e te saunoa i ai, ua uma ona document uma lava laau na e te saunoa i ai. O le Bishop Museum i Hawaii, o le largest collection lena o laau uma lava ia o le Pasefika, Polenisia ma Maikoronesia. E leai la se galuega tele e toe faia i le mea lena, ona o la e ua uma ona faataatia uma lava ia. A tatou fia fesili foi la ma fia malamalama i ai, o lena e i ai uma lava i le Bishop Museum, a o lea ua uma ona fai le tatou museum, e manaia foi le faaopoopo i ai o se avanoa e faaopoopo i ai le malamalama tuai lea tausimai ma mea faapena. A o le taua o le mea, e amata i le laa e tasi, lea na fai ai le laa muamua e fai i le avoka, fai i le laau lea, aua o le laau lea e maua ia tatou ma faigofie ae toe tele le tau pe a maua mai le suauu. Faafetai i lau Afioga.

Tofa Levaopolo Talatonu: Lau Afioga i le Fofoga Fetalai...

FOFOGA FETALAI: O le a lua lauga pe sei faaauau le lauga a le sui usufono mo Aana Alofi Nu.3 ona avatu lea o le avanoa?

Tofa Levaopolo Talatonu: E leai na o sina mea lava e fia faasao lau Afioga i le Fofoga Fetalai.

FOFOGA FETALAI: E faasao ia ai? O le Minisita mo...

Tofa Levaopolo Talatonu: Faasao uma lava le toalua lea. Lau Afioga, ua alu anapo o faamalamalama mai eleni ma susu, o le po lenei, o lea e tau faamalamalama atu e le polofesa mea tau laau ia malamalama lelei mai le la Itu. Ae a pe a tuu mai sina avanoa sei faamalamalama atu e le polofesa o lenei Itu.

FOFOGA FETALAI: O lea ua ou maua le taumafai mai a le tou polofesa, ae taatia mai pea o lea ou te fuafua atua ma avatu le avanoa e taua le finagalo o le Afioga i le sui usufono mamalu.

Tulai mai le sui usufono mo Faleata Sisifo.

Tofa Lealailepule Rimoni Aiafi: Leai na o se fesoasoani atu i le tatou Maota, leaga o au sa ma galulue ma le Afioga i le sui usufono mo Aana Alofi Nu.3. O le igoa sa faaigoa ai le sui usufono i aso ia vaeane le Afioga i le sui usufono, o le pea. E moni o ia sa alu e taamilo i Samoa atoa e faitau pea, faitau laau nei. O lea la ou te fautua atu i lau Afioga, a uma laau tetele o le vao ona faasolo mai lea i moegalo ma tipolo ma mea faapena sei tatou faalogologo foi i lenei afiafi i le taumafaiga a le uso. Ma le faaaloalo lava.

FOFOGA FETALAI: O le pea le la ae fee oe le sui usufono mo Faleata Sisifo?

Ia, tulai mai le sui usufono mo Aana Alofi Nu.3, faaiu mai le saunoaga, e manatu ua manino ma malamalama lau folasaga. E le o taufaatauvaaina i le faalogologo atu a le Minisita e a ia le Tulafono Tau Faaofi aemaise foi o le talifuaitau. Silasila foi, e le tau laeia le Minisita mo Fesootaiga, o le tasi lenei expert i mea tau agriculture lea tout e silafia. A o fautuaga ma mea uma ua tuuina mai, out e fautuaina, agai i se taimi e te lua talatalanoa lelei ma le Minisita o le SROS ma faasoa ma faamaumau lea o atugaluga lea e te agai i ai. Ae ua manino ma malamalama ae agai tonu loa i le tatou Tulafono Tau Faaofi le sui usufono mo Aana Alofi Nu.3. Ia, sei fai lau fautuaga pe faapei.

Afioga Hon Palusalua Faapo II: Lau Afioga i le Fofoga Fetalai, o lau fautuaga i le Afioga i le expert, faifaimalie, taofiofi malie, sei oo i le taimi e te tulai mai a ii le Minisita o le Environment ona faaali uma lea o mea ia. Nei tei ua popoto ai le auvaega lea...

FOFOGA FETALAI: Le sui usufono mo Aana Alofi Nu.3, pei lava o upu a le Maota na faalogo i ai e le i mamao atu, o le uta a le potu e fetalai. Ia nei e faalogo i le fautuaga a le Aoao Fesoasoani ona e sese tele ai lea, ae tulai maia e faaaauu le saunoaga.

Afioga TOEOLESULUSULU CEDRIC POSE SALESA SCHUSTER: Faafetai lau Afioga i le Fofoga Fetalai. E toe tasi lava si vaega lea ae out e lei oo atu e pei ona taua e le Afioga i le Minisita mo le Siosiomaga le seabed mining. E faamalie atu atonu ua o eseese le finagalo o le Minisita ma le uiga o le O-tech lea ou te talanoa atu ai. O le ocean technology i le faaaogaina lea o galu.

Tofa Hon Faamoetaulua Lealaiauloto Ulaitino Faale Tumaalii: Lau Afioga i le Fofoga Fetalai, o le mea e fia faasao. Ou te le i fai atu o le O-tech e tutusa ma le seabed. O lea ou te fai atu o le geothermal, o mea ia e lua o lea ou te taofia e le mafai ona faia i lou taimi aua e afaina ai le siosiomaga. O lau upu lena na avatu, faamolemole o upu na o lea e avatu. A sue mai nei o lea e maua, ae e le faapea ua ou fai atu e tutusa le upu lena e te tauina mai o le O-tech ea po o le a ma le sea bed. O le tulaga la lena o lea ou te tulai atu ai e faasao a o le i folau pea lou sa.

Afioga TOEOLESULUSULU CEDRIC POSE SALESA SCHUSTER: E faafetai atu i lau Afioga i le Fofoga Fetalai mo le avanoa, ma e faafetai atu foi i le faamalamalama a le Afioga i le Minisita.

Faafetai o lea ua maua atu i le Afioga i le Minisita e talitonu as long as e i ai o ia i totonu, e le faia le geothermal i Samoa, ae ou te tau tomanatu i se taimi e le i mamao atu nei sa faapea ona propose e le Minisita o Finance le faia o le geothermal ina ia taumafai e suesue ma faaleleia ia atinae.

O lona lua, o totonu o Niu Sila o le tasi lea.....

FOFOGA FETALAI: Toeolesulusulu, ia o lea o le a oo le misa i Toga. O lea ou te taumafai e tosotoso mai ona o lea o le a lavea fua Foaga e le i fai misa.

Se i tulai mai le Minisita o Tupe.

Afioga Hon Faumuina Tiatia Faaolatane Liuga: Faafetai i lau Afioga i le Fofoga Fetalai. Ona ua taua fua lou igoa, o le mea lea ua ou tulai atu ai.

O sources ia o geothermal sa vaavaai pe tilotilo i ai, o se possibility pe a faapea e le afaina ai lo tatou atunuu. A vili le geothermal, e maua le geothermal i le lua kilomita i le alu i lalo, a o lona afaina e ono erupt ai se volcano. O lona uiga e afaina lo tatou atunuu laititi. O le mafuaaga lea o lea e taofi ai le Polofesa o le Siosiomaga i lea tulaga e le tataua ona faia ia mea ona e afaina ai tatou.

Ma lou faaaloalo lava.

Afioga TOEOLESULUSULU CEDRIC POSE SALESA SCHUSTER: Lau Afioga i le Fofoga Fetalai, e faamalo atu. O le taua lea o le SROS i lou lea iloa, ae faafetai ona o lea e matau atu e eseese Matagaluega. Atonu la lau Afioga i le Fofoga Fetalai o se taimi o i luma o le a mafai ona faaoo suesuega nei i le SROS ona tapena mai lea ona o lea e sauni i lana mandate o le renewable energy.

Ona ou see mai lea i le vaega mulimuli o lau tuualalo lau Afioga i le Fofoga Fetalai i le vaega lea e pei ona taua e mafai ai ona faatino se faatagaga po o se aiaiga i totonu o le Tulafono e faatinoina ai e le Pulega lenei a le SROS suesuega tau le siosiomaga po o environmental impact assessment.

Lau Afioga i le Fofoga Fetalai, e lagona le faanoanoa ona o lou talitonuga ou te lagolagoina le aveese o le faaupuga lea mai totonu o le Tulafono ona o mau nei lau Afioga i le Fofoga Fetalai. Muamua, o le faatinoina o suesuega faa-siosiomaga nei o galuega o lea ua taoto atu i le private sector. O le taimi nei ua saunoa foi le tama o le atunuu ma faaalua faanaunautaiga o le Malo ma tapenaga e amatamea le Malo, ona tuu lea i le private sector latou te faatinoina galuega. O le taimi nei ua leva ona faatino e le private sector lea galuega. O le toatele foi o i latou ua i ai tomai faapitoe e faatinoina ai. Afai e totogi e i latou le faatinoina o ia galuega, afai ae pasia lenei Tulafono Tau Faaofi o lona uiga ua faatauva se Faalapotopotoga a le Malo ma i latou faipisinisi. O a ona aafiaga? O tax payers, o lea e ave a tatou seleni mai le tatou budget e faatino ai le tele o galuega a le SROS, a o lea ua tatou toe fai atu e faataga ona outou o e compete ma le private sector. O a aafiaga? E mafai ona faalaititi le tau a i latou ia o le SROS i lo tau a le private sector, ona uma ane lea ua afaina le atinae ma lo tatou taumafai atu foi e tuu ia galuega i tua i le private sector.

O lea e matau atu o le tele foi o Matagaluega a le Malo lea o lo o taumafai e tuuina atu i tua, ae aisea ua tatou toe naunau ai i lenei Tulafono? O le a toe tago atu foi e toe aumai tupe ia a o lea e tau atiae ai le tatou private sector?

O lona lua lau Afioga i le Fofoga Fetalai, o lou talitonuga i Faalapotopotoga faapea i totonu o le PUMA, e pei lava o lea e i ai se isi ma o le fautuaga i le review ina o suesuega e le private sector e ave i le Ofisa o le PUMA. O le taua lea o le Ofisa o le SROS, e ave i ai e le Ofisa o le PUMA e review e outou pe sao pe sese vaega ia. Aua afai ae compete nei aua e tele foi atinae e pei ona taua pe afai e fai le bio-diesel ma le tele o atinae ia e pei o le faiga o

le suauu o le avoka, e manaomia EIA, a o lea o le a faataga e toe fau e i latou a latou EIA.

Lau Afioga i le Fofoga Fetalai, e talosagaina lo tatou Maota nei ina ia mafai ona aveese lea vaega ae taoto pea le rule a le SROS e fautuaina as a scientific body e le gata o le PUMA, a o isi vaega e pei o le Ofisa o Faatoaga ma isi vaega o lo tatou Malo e pei foi ona oo mai i le Ofisa o Leoleo, aua o i latou tatou te faalagolago i ai aua e oo foi i le private sector, e faalagolago i ai e faia suesuega ona aumai lea faaoga e latou.

FOFOGA FETALAI: Le sui usufono, o lea ua matua faafogafoga ma le totoa le Afioga i le Minisita, ae onosai le sui usufono mamalu. Ou te talitonu o lea ua saunoa manino le Minisita i fuafuaga faataatitia a le Malo, e le o faataetaealugaina o lea e faasolo polokalame. E pei foi ona saunoa le Minisita, e le fai atu loa tatou maua se tali i se taimi faafuasei ma se tali lelei, time makes the wine. E umi le taimi o tatou faatalitali ma faataamilomilo, ae lafo atu ia i lau Afioga i le Minisita e fai mai lau saunoaga faaiu ona ua iu foi saunoaga o lenei mataupu.

Afioga Hon Palusalua Faapo II: Lau Afioga i le Fofoga Fetalai.....

FOFOGA FETALAI: Oi, e te fia saunoa le Taitai o le Itu Agai?

Afioga Hon Palusalua Faapo II: Ioe, e laitiiti lava se vaega lea.

FOFOGA FETALAI: Ia malie la se i tali le Minisita aua na ou faapea lava au ua e lafo uma le faaaloalo i lau Polofesa na folafola nei.

Malie lau Afioga i le Minisita se i fofola atu le mataupu a le Taitai o le Itu Agai ona tali mai ai lea mulimuli lau Afioga.

Afioga Hon PALUSALUA FAAPO II: E taua tele le mataupu lea na saunoa i ai le Minisita Agai mo le Siosiomaga. O le mea lea o le feteenai po o le conflict of interest, o le ala lea o lou tulai atu ina ia silasila totoa i ai ona e feteenai ai faiga faavae a le Malo ma faiga paaga ma le private sector ina ia silasila i ai le Malo.

O le isi mea lau Afioga i le Fofoga Fetalai, o le a le mafuaaga e ala ai ona le tauavea e le private sector faaiuga ma mea ia ua maua i suesuega a le SROS? O le a le mafuaaga? O le mafuaaga o le leai o ni tupe, e le lava seleni. Ua fia ola le private sector, a o lea foi o le a aveese lea mea ma le private sector.

O le isi mea se i silasila lau Afioga i le Minisita ona e pei ona saunoa i ai le sui usufono o lenei Itu i le variable o mea ia. Ia suesue lelei po o le a le tau. O le tasi lea mea o lea e faatalitali i ai le private sector po o le a le tau, pe uma ifo ua matua taugata lava le falaoa mata. E tasi lea mea aua e le mafai ona omai le private sector o pogisa i ai i totonu aua e uma ifo ua taugofie ai falaoa mata ia e aumai i fafo.

FOFOGA FETALAI: O lea ua maua le finagalo o le sui usufono. O lea ua maua tonu lava.

Afioga Hon PALUSALUA FAAPO II: E le i uma lau lauga a o lea ua tali mai.

FOFOGA FETALAI: A lea ua ou maua lau fesili, ae se i tali muamua mea ia e lua lea na e maua mai ua faaosofia ona o le lauga a le Polofesa o Toeolesulusulu. O lea na e toe saunoa nei i mea maioio ia na e faaupu ua tuai ai ona faatino suesuega.

Tulai mai lau Afioga i le Minisita.

Tofa Hon Faamoetaulao Lealaiauloto Ulaitino Faale Tumaalii: Lau Afioga i le Fofoga Fetalai, faafetai mo le avanoa ma e faafetai foi i le lavapapale o lau Afioga i le Fofoga Fetalai i le taitaiga o la tatou Fonotaga.

O le mea muamua lava, e i ai laau ia na saunoa i ai le sui usufono mamalu ia Toeolesulusulu, o laau foi ia e i ai o latou health claims i le togafitia o gasegase. O lo o i ai le poloketi lea e galulue ai nei le SROS e tau o le Meditonal Herbs i laau ia. O lo o fund mai foi la e le isi kamupani mai Iapani le tulaga lea ona o se tasi o tamalii o le atunuu sa sue lana Phd i le Iunivesite i Iapani, lea ua sau ma ua maua ai le fesootaiga lea ma Research Organisations i fafo e fund ai le suesuega lea.

E le o nofonono ai le Faalapotopotoga i le vaai i le itu lea e pei ona taua e le sui usufono mamalu. Ua ala ona ou avatua i le taimi nei e faailoa atu ai i le mamalu o le atunuu o le tasi lea o suesuega o lo o fai. E tele suesuega o lo o fai, a o le tulaga lava ia i lau vaavaai i le SROS ma le galue a le tamalii o lo o Pule Sili i le Faalapotopotoga, e vaai atu loa latou e le economical le tulaga i suesuega faapea tuu loa. E le faapea o le a faamaumauina ai pea tupe ae vaai atu e le manuia. O le tulaga la i le falaoa mata, e leai ua uma ona cost out uma lava. Ua fai uma lava cost benefits o mea ia e i ai. A faapea la i le Taitai o le Itu Agai e te fia silasila i ai, o le a maua se taimi ona momoli atu lea i lou Ofisa e te vaai i ai. E le faapea e i ai ni poloketi foi ia e faatino e le Faalapotopotoga e aunoa ma le costing o mea nei, ma ua uma ona cost le bio-diesel, le falaoa mata faapea foi le avocado oil. O lea e alaala mai i inei le Pule Sili o le SROS, e mafai lava ona fai i ai e aumai loa figures ia mo lou silafia pe afai e te fia silafia, e sefe ai foi lo tatou taimi mai le toe talanoaina.

Lau Afioga i le Fofoga Fetalai, ona ou oo mai ai lea.....

Afioga Hon PALUSALUE FAAPO II: Lau Afioga i le Fofoga Fetalai, o lea ua agai mai a o lea e le i uma lau lauga faamolemole

Tofa Hon Faamoetaulao Lealaiauloto Ulaitino Faale Tumaalii: Se patience, lavapapale mai. E lelei mea ia e aoga ai lau Afioga ona o lea e avatu mea e te aoga ai.

O le tulaga i le mea lea o le EIA po o le Environment Impact Assessment. E le mafai ona faia e le PUMA le EIA, e review. It's a conflict of interest pe a fai e le Matagaluga a o latou foi ia e administer ina le Tulafono. O le mea la lena, it has to be done by a third party. Ou te iloa atugaluga o le sui usufono mamalu mo Aana Alofi Nu.3 aua o ia lava lea e faia mai EIA, ma o le tetele foi ia o fees la e i ai ma o le taugata foi la lena, a o lea ua outou fai mai i le cost o le soifuaga. O le mea lena, ua le iloa nei la po o le a le sao i le Itu Agai ma le tulaga lea aua o le SROS lea e i ai le atamai. O le tulaga lea e popole i ai ina ne i t e i ua taugata ana pili ae taugofie le SROS, ae tatou galulue faatasi.

Afioga Toeolesulusulu Cedric Pose Salesa Schuster: E faafetai atu i le Afioga i le Minisita ona o lea ua taua e taugata au pili. E pei lava ona masani ai, o galuega a tatou e fai i le alofa. E tele foi galuega ua faatino e le totogia aua o le naunautai na avatu ai se manatu ona e le na o au lau Afioga i le Minisita, ae maua le toasefulu o i matou o lo o faatinoina lea galuega, ae a toe faaopoopo mai i ai ma le SROS, o le maketi lea sa taumafai e atiae mo tatou o le a ave uma e le SROS, faafetai.

FOFOGA FETALAI: O lea sa le maua e te aafia ai i le mea lea le sui usufono mo Aana Alofi Nu.3. Tulai mai lau Afioga i le Minisita o Tupe.

Afioga Hon Faumuina Tiatia Faaolatane Liuga: Lau Afioga i le Fofoga Fetalai, e leai na o se mea e fia faasao. O tauofoga uma lava a Toeolesulusulu, e leai ma se tauofoga e avatu e leai se tau, a o la e fai mai e fai fua isi galuega, a o mea uma lava e avatu ai ana tauofoga, e i ai lava le tau. A o la foi o lo o i ai ana tauofoga o lo o avatu, ma e fesiligia foi e le Board pe taga sui usufono ona fai galuega a o lea o Taitai o le atunuu. Ma lou faaloalo.

FOFOGA FETALAI: Masalo ua malamalama lea mataupu. Faaiu maia le saunoaga le Taitai o le Itu Agai.

Afioga Hon PALUSALUE FAAPO II: E le o toe umi foi. O le mea lea e taumafai atu ai le Itu Agai, leaga o lea e faalogologo mai le private sector, o la e faalogologo mai Samoa. O lea foi o le a toe aveese lea pau falaoa e fesoasoani ia latou pisinisi, ae o le SROS lea e fesoasoani i ai le Malo, totogi e le Malo le aufaigaluega. O le mea lea o lea e taumafai atu ai.

Ua ou oo mai i le saunoaga a le Minisita i le tau o le falaoamata, leai ou te le fia iloa.

FOFOGA FETALAI: Malie le sui usufono leaga o lea ua e taua le mataupu lea e aafia ai foi le soifua maloloina.

Sei tulai mai lau Afioga i le Minisita mo le Soifua Maloloina.

Afioga Hon Tuitama Talalelei Tuitama: E pei lava o lea ou te maitau atu o lea tatou te faatasi pea ma le Afioga i le Taitai o le Itu Agai, a o lea lava ou te faatalitali po o le a se taimi e te saunoa mai ai e fai atu le lipoti o le vaaiga o le Afioga i le Taitai o le Itu Agai. A e finagalo i ai o le a fai atu nei, o le a avatu le lipoti aua o le faaiuga o le vaaiga o le Taitai o le Itu Agai, ua le tataua ona Fono i le tatou Fonotaga, ua tataua ona alu e malolo, a o lea ua at risk uma tatou ona o lona mafuta i i. E lei taitai ona tea le mai, o la e i ai. Lau Afioga i le Fofoga Fetalai, ae faia lau faaiuga.

FOFOGA FETALAI: O le a faia le faaiuga pe a tatou toe foi mai i le tatou malologa masani.

Tulai maia lau Afioga i le Taitai o le Itu Agai e faaiu mai lau saunoaga.

Afioga Hon PALUSALUE FAAPO II: Faafetai lava. O le a ou le faaogaina le saunoaga a le Minisita ma lou faaloalo lava, a o le mea anoa lea e tulai mai, o le galulue faipaaga ma le private sector lea ou te fai atu ai. E

le faapea o ou naunau atu e aumai le tau o le falaoamata, e leai. O la e faafogafoga mai le private sector, o e e ono invest i le mea lea. O le a le mea e tau mai ai i i? E le mo au ae o le faafogafoga mai a le private sector. O le mea lea lau Afioga, o mea ia e tatau ona silasila i ai, o lea foi ua toto avoka e pei ona saunoa nisi. Ia, ou te fai atu lava lau tala i tatou suauu, na ou i ai i le tatalaina ma le launch ina, e ese le tumu. E aumai le suauu, ua palu faatasi ituaiga avoka, e vaia isi avoka. E leai o le upu moni lava. O le mea la lena e tatau ona silasila totoa i ai aua e afaina ai le manao o le private sector e fai le mea lea.

FOFOGA FETALAI: Malie le Taitai o le Itu Agai sei tulai atu le Minisita mo Punaoa Faanatura ma le Siosiomaga.

Tofa Hon Faamoetauloa Lealaiauloto Ulaitino Faale Tumaalii: Lau Afioga i le Fofoga Fetalai, sei faasao atu le tulaga lea. A faapea lava o i ai ni investors e manao e invest i le falaoamata pei ona e taua, e tatau la ona faafesootai le SROS i le tulaga aua o la e faatalitali mai le SROS. E pei lava ona ou fai atu, o kamupani mai fafo lea ua... seia vagana ai la le Vailima Breweries lea ua faatauina le flour lea o le ulu. E le faapea la o le a faalauiloa atu fua i luga o le... o lea e manao e sue, o tagata e interest e invest i ai, o tagata na e tatau ona ave i ai tulaga o galuega ia na fai ma e le faapea sa alu ai foi le afu o le Faalapotopotoga ia e galueaiina mea ia. E i ai le mea e tau o le commercial confidentiality atonu e te le o iloa lena tulaga, a o le mea lena e faigata tele i totonu o mea nei o faiga pisinisi, e tatau ona amanaia lelei tulaga ia.

O le tulaga faapea o le faatauva, o lena ua uma ona ou fai atu, o le Tulafono Tau Faaofi lava ia ua aumai e teuteu ma e pei lava ona saunoa foi le Palemia faapea foi ma nisi ma le Afioga i le Fofoga Fetalai, o mea o lea ua tuu i totonu e limataitaiina ai le auaunaga a le Faalapotopotoga i le agai i luma. Ma lou faaaloalo lava.

FOFOGA FETALAI: Malo. E i ai nisi mea le Taitai o le Itu Agai? Malie e agai i ni mea fou o lea ua ou mautinoa ua manino mea ia ua faamalamalama e le Afioga i le Minisita.

Afioga Hon PALUSALUE FAAPO II: Ia o lea o le a faauma atu. O mea fou la mea ia o lea o le a ou oo i le Tulafono Tau Faaofi i lona teuteuina, ina ia suesueina ai e le SROS le narcotic ma le marijuana. Ou te talitonu o se mea lelei, ua tatau ona tapena le Malo i ia tulaga. Aisea? Ua tele le solitulafono lea. Ae ua mafua aisea solitulafono? (*Upu na faatonuina e le Fofoga Fetalai e aveese mai le saunoaga a le Taitai o le Itu Agai*). A o fea a tua i ai nai tagata? Ioe. O fea a tua i ai le solitulafono ua matitiva tagata? O le mea la lea o lea ou te faafetai ai, o lea o le a i ai se vaega.....

FOFOGA FETALAI: Malie lau Afioga i le Taitai o le Itu Agai, o le a tauau ina sese tele le tatou mataupu. E le tatau ona faatauina i se saunoaga e avatu i totonu o le Maota le tulaga lea tau laau faasaina. Ma e le tatau foi ona tatou encourage ina le mea lea po o fea le mea e tua i ai le atunuu, ae faaoga mea nei faasolitulafono e tapa i ai tagata. Na ona ou faapena atu le Taitai o le

Itu Agai, e tatau ona faasaosao tulaga ia leaga e le tatau. Se i fai atu le upu, alaala i lalo!

E le tatau ona tatou faaaogaina le mea lea, o la e faalogologo uma mai le criminal side lea e ala ai ona ou fai atu. Tuu ia nisi mea, a o lea ua outou tagatagai mai i le galuega fita lea e feagai ma le Matagaluega o Leoleo, e matuia tele. Ae a fai atu la upu faapenei i le Palemene e tausolomua atu i Taitai o le atunuu, ona ou lagona lea o le faanoanoa. E tatau ona faasaosao itu ia ona e le tatau ona tautalagia e tatou pe tatou te faamalosia i latou o lo o solia le tulafono ona tapa pea e pei e leai se mea e tua i ai. E le talafeagai lea ma e tatau ona ou faatonuina faamaumauga o le saunoaga lea ia aveese ma faamaumauga a le Palemene ona e tatau ona tatou tautalagia ma tatou tausisia tulaga mamalu ma mea e agai i ai fautuaga. O i inei e avatu ai le manuia ma le malaia o le atunuu.

Afai o faafogafoga mai, aua ne i faaaogaina upu ia e avatu tou te tua i mea ia e faaoga e fai ai a outou atinae ma mea mo le lumanai. O le faatonuga lena a le Fofoga Fetalai.

Afioga Hon PALUSALUE FAAPO II: Lau Afioga, o le mea e fia faasao. E leai ma se tala na fai atu au e o e fai mea ia. Na pau lava le mea o lou faafetai i le Matagaluega o lea o le a lava tapena e suesue mea ia.

FOFOGA FETALAI: O lea ua fai lau faaiuga, ma o lea foi ua manino ma malamalama le mataupu i le mea lea na ou fai atu ai. E fai a tatou taaloga polokiki, ae seu le manu ma tagai i le galu leaga o la e faafogoga le atunuu, e tatau ona tatou mataitu ma tatou tilotilo. Ua uma le mataupu lea, e le toe tautalagia o lea ua uma ona tali le Minisita.

Na faamaonia le lafo ma faitauina le Tulafono Tau Faaofi o Teuteuga o le Tulafono o le Faalapotopotoga o Suesuega Faasaaienisi a Samoa 2014 i lona faitauga faalua.

FOFOGA FETALAI: E tusa ai ma le Tulafono Tumau o le a tuuina atu le Tulafono Tau Faaofi i le Komiti o Mataupu Tau Aoga, Saienisi, Fesootaiga ma Faamatalaga Faatekonolosi mo le iloilo ina ma toe lipoti mai i le Fono Aoao i se Fonotaga o lumanai.

TULAFONO TAU FAAOFI O LE FASIMATEINA O MANU MA LE FAASOA ATU O AANO O MANUFASI 2014 – faitauga faalua

FOFOGA FETALAI: Mo le silafia e le Palemene, o le Tulafono Tau Faaofi lenei sa faia lona faitauga muamua i le Aso Fono 24 Ianuari 2014.

Tulai mai lau Afioga i le Minisita mo Faatoaga ma Faigafaiva.

Afioga Hon LE MAMEA ROPATI (Minisita mo Faatoaga ma Faigafaiva): Lau Afioga i le Fofoga Fetalai, tatou faafetaia le alofa o le Alii ua tatou toe aulia mai foi lenei itula o le afiafi a o malupuipua pea lo outou soifua ma lo tatou ola aua le feagai ai foi ma tiute ma tofi ua valaauina ai lau Afioga ma i tatou.

Ae ua ou tulai atu i le ava ma le faaaloalo tele e faatu le lafo, Ina ia faitauina nei le Tulafono Tau Faaofi o le Fasimateina o Manu ma le Faasoa atu o Aano o Manufasi 2014 i lona faitauga faalua ma ou te fia tautala faamalamalama i ai.

Faalua e le Minisita o Tupe, Minisita mo Fesootaiga ma Faamatalaga Tekonolosi ma le Minisita mo Tina ma Tamaitai, Atinae o Nuu ma Afioaga ma Agafesootai.

FOFOGA FETALAI: Tulai mai lau Afioaga e saunoa faamalamalama i le mataupu.

Afioaga Hon LE MAMEA ROPATI: Lau Afioaga ma le paia o le Maota, o le sini autu lava o lenei Tulafono Tau Faaofi, o le uunaia lea o le alamanuia tau faatoaga i totonu o Samoa e ala i se faiga lelei, atoatoa ma talafeagai i le fasimateina o manu, asiasiga o aano o manufasi ma le faasoa atu o aano o manufasi.

I le tulaga saogalemu ma le atoatoa o oloa gaosi mai aano o manufasi i totonu o le atunuu i le amanaia ai o taiala faavae nei. Muamua, o aiataa a le tagata o lo o faaogaina auunaga e faatau mai ai aano o manufasi ua maea ona asiasia lelei.

Lua, o le matafaioi a le aufai lafumanu ma tagata o lo o gaosia aano o manufasi i le tuuina atu lea o oloa e saogalemu ma atoatoa lelei po o le hygienic aua le soifua maloloina o le atunuu.

Tolu, ina ia faapea ona faatino i se faiga lelei ma le saogalemu le fasimateina o manu.

Fa, ina ia faapea ona tuuina atu e le Malo se faiga tau faafoega ma faaletulafono e tali atu ai i taunuuga lelei, le faaituau i taimi talafeagai i le amanaia ai e faapea, o so o se taimi e mafai ona faatino ai. E taua tele le uunaiina o lenei faamoemoe i le Tulafono Tau Faaofi, aemaise ai e ala i faiga e le o faatonutonuina faaletulafono, e pei o le galulue faatasi o fesootaiga, aoga ma faiga faapaaga.

O le faamoemoe maualuga lava o lenei Tulafono Tau Faaofi, ia matua siitia le saunia ma le tapenaina lelei o aano o manufasi i se tulaga mo le saogalemu, aua le soifua maloloina po o le food safety mo le fofoga taumafa o le atunuu. O le Tulafono Tau Faaofi foi, o lo o tulaia tonu lava i manu o lo o fasimateina ma tapenaina i totonu o le tatou atunuu e le o aofia ai aano o manufasi o lo o auina mai fafo.

O le itu o lo o ave i ai le faamamafa i le Tulafono Tau Faaofi i lenei vaitaimi, o aano o manufasi po o povi o lo o fuaina ma faatau atu i totonu o faleoloa i totonu o le atunuu. O lona uiga, i le agai atu i le lumanai, o le a le toe mafai ona talia se aano o manufasi e faatauina atu i so o se faleoloa i le atunuu pe a leai se pepa e faamaonia ai po o se certificate mai le fale fasimanu. O le a puipuia ai foi ma aano o manufasi o lo o maua mai i faalavelave faaleatunuu ona toe talia le fuaina pe faatau atu i faleoloa mo le faatauina atu i le lautele o le atunuu. Ua i ai foi aulape o lo o i lenei Tulafono Tau Faaofi e molia ai so o se faleoloa o le a mauaina e le usitaia ma mulimulitaia aiaiga o lenei Tulafono Tau Faaofi. O le a amatamea le faatinoina o lenei Tulafono Tau Faaofi i le aumaia lea o fale fasimanu feaveai po o mobile units e lua a o faagasolo ai le fausiaina o se fale fasimanu tumau

i Upolu nei. O lo o tatala foi le avanoa i nisi o le mamalu o le atunuu o lo o fia faatinoina a latou fale fasimanu laiti po o slaughter units ae ao lava ona i ai le aufaigaluega a le Matagaluega o Faatoaga, i latou ia ua i ai le pota faapitoa po o Meat Inspectors ma Vets mo le siakiina o aano o manu ua maea ona fasimateina.

O lenei foi fuafuaga ua faatulai mai i lau Afioga ma le paia o le Maota, o le tasi lenei o vaega o le fesoasoani e faatupeina mai e le World Bank ma o lea ua i ai seleni a ua ofoina mai foi mo fuafuaga nei a le Matagaluega, o lo o faatalitali mai foi i ai le pasiaina o le tatou Tulafono Tau Faaofi lenei. Ua i ai foi i le Tulafono Tau Faaofi lenei se Komiti Faufautua e aofia uma ai sui uma mai le aufai atinae lafumanu i le atunuu e i ai a latou manupapalagi, o meaituaolo, o mamoe, o moa, o sui mai faleoloa, faletalimalo, faleaiga, aemaise nisi o Matagaluega a le Malo e aafia i le faatinoina o fale fasimanu.

Ia, o le faapuupuuga lena po o le ootooina atu lena o le faamoemoe o lenei Tulafono Tau Faaofi lau Afioga i le Fofoga Fetalai, o lena foi ua outou silasila i ai e le o se Tulafono Tau Faaofi e tele ni ona pepa e faitauina, ma o lo o malamalama lelei foi. Ia o le a fiafia lava e tali atu foi i ai pe a i ai se faafesili mai.

O le faamalamalama lea ma le faaaloalo lava.

FOFOGA FETALAI: Malo faafetai saunoa malamalama i lau Afioga i le Minisita ma le tulai mai o lenei Tulafono Tau Faaofi taua i totonu o le tatou atunuu ua leva ona tatou faatalitali ma taliga, ona o se Tulafono Tau Faaofi taua aua le atiaaina o tulaga o aano o manifasi i totonu o le atunuu.

Ua avanoa le tatou Maota mo se sui usufono e fia saunoa. Ia, tulai maia lau Afioga i le Sui Taitai o le Itu Agai, le sui usufono mo Falealupo.

Afioga Hon AEAU PENIAMINA LEAVAISEETA: Lau Afioga i le Fofoga Fetalai, faafetai tele mo le avanoa. Ua faafofoga foi le pau o le Maotaga ne ii le saunoaga malamalama a lau Afioga i le Minisita mo Faatoaga ma Faigafaiva e tusa ma lenei mataupu. Ou te talitonu lau Afioga i se vaitau po o le sefulu i le luasefulu tausaga talu ai i totonu o le Palemene nei sa taumafai e aumai le mataupu lenei. Ou te le iloa, e leai e le o le le iloa, o le tapenapena lelei. E le lava le tatou tapenapenaga po o le sauniuniga i lena vaitau, ae ua leva tele lava ona tau aumai le mataupu lenei, le atinae lenei, o se atinae taua. E ala ona taua, aemaise lava lenei vaitau ua tele lafumanu a le mamalu o le atunuu. O le atinae ua vaaia le tuputupu i luga. A o le faatinoga la i le faamateina po o le sauniuniga mo le fofoga taumafa, ua leva ona tatou tapenapena i ai. O le mea la ua ou tulai atu ai, o le agaga faafetai, leaga e le faigofie, aua ou te iloa lelei lava le tapenaga o le mea lea na aumai toe ave i tua toe tau aumai i le le lava atoatoa, leaga sa manaomia se tomai mai fafo e matua tapenaina lenei mea. O lea la ua alu alu lea ua tatou taunuu i le taeao sa moemiti i ai, e le gata i le atunuu aua e taugofie ai nei mea toe lelei ai le taumafa i manifasi.

Ia o le agaga faafetai lea i lau Afioga i le Minisita ona ua outou taunuu i ai, e faafaigofie ai foi i le mamalu o le atunuu o lo o tele a latou manu ona faafaigofie ona maua a latou tau, leaga o lea ua faafaigofie e le gata i le fofoga taumafa o le atunuu i totonu iinei, ae talitonu foi o le a mafai ona avatu pe a talafeagai aemaise o tatou uso i Tutuila. O lou la tulai o le agaga faafetai, ma o le aumaiga o lenei Tulafono Tau Faaofi, ua matua tapue uma

ona itu uma, out e talitonu e faigofie ona ioe uma, ae out e talitonu foi ua lagolagoina e lenei Itu, faafetai.

FOFOGA FETALAI: Malo. Ia, o lea ua saunoa le Afioga i le Sui Taitai ae o le a tuu atu pea le avanoa. Tulai mai le sui usufono mo Faleata Sasae.

Tofa AVEAU TUALA LEPALE NIKO PALAMO (Faleata Sasae): Faafetai lava i lau Afioga i le Fofoga Fetalai. Ia, e leai e muamua ona momoli le faamalo ma le faafetai i le Matagaluega ma le Afioga i le Minisita mo lenei Tulafono Tau Faaofi. Atonu o se Tulafono Tau Faaofi ua leva ona tatau ona faataatia, aua o le Tulafono Tau Faaofi lenei e aafia ai e le gata i le lelei ma tapena lelei o mea tau aano o manu, ae oo foi i le faatinoina o le faiga o lafumanu. E momoli ail au faafetai, ona o le Tulafono Tau Faaofi lenei e le o se Tulafono e faigofie. O se Tulafono Tau Faaofi out e iloa e umi se taimi o faataatia le Tulafono Tau Faaofi lenei. O le mafuaaga, i totonu o le Tulafono Tau Faaofi lenei, o le tele ia o aiaiga o le a aiaia ai le tagata o lo o fai lana lafupovi, e amata mai lava i le tusitusiga i lalo o a mea o lo o taumafa ai po o lo o aai ai foi povi, o le a le faatinoina o le vaega lea e tatau ona tusi i lalo o le Tulafono Tau Faaofi lenei. O le uiga lena o lou manatu, e tele se galuega e le gata ina aoao ai e o lo o taumafai e fai lenei vaega o le tamaoaiga aemaise ai la o le faatinoina o le galuega. O lea ua saunoa le Afioga i le Minisita e tasi le fale fasimanu, lua fale feaveai o lea o le a sauni mai, masalo o le tatou polokalame foi lea e faagasolo nei. Masalo o se tulaga matagofie lea vaega, aua o lo o i ai lou manatu foi lele e pei ona saunoa le Afioga i le Minisita i mea nei o faalavelave. Sei faasao mai au lau Afioga, e pei lava e le aafia ai le vaega lea. Ae i ai lou manatu, afai lava o le a faamate se manu i mea tau taumafa, aua po o le faalavelave po o fea e ave i ai, e iu lava o le taumafa. Afai ua fai se Tulafono Tau Faaofi e aafia ai meataumafa, e tatau ona aafia uma ai lava ituaiga manu eseese, po o le manuj fai faalavelave po o le manu e ave e faatau i le faleoloa po o le manu e faaoga e le aiga. O lau fesili la lea e fia fai i ai, pe faapefea la ona faatino le... Atonu e ono saunoa le Afioga i le Minisita ona o lea o le a i ai vaega ia e lua. Afai la ua i ai se manatu o se tasi faipisinisi o le a fai sana fale fasimanu i lalo o le vaega lea o le a faatino le vaega lea, e fai foi sina tele o aiaiga. Ou te iloa le Tulafono Tau Faaofi lea o lea o lo o fai fuafua agai i Tulafono i fafo i vaega i fafo, ae tatau foi ona tagatagai le Matagaluega i le faatinoina o lafumanu i totonu o le tatou atunuu. Aua e pei ona silafia o le toatele lava o i latou o lo o fai lafumanu e le o i ai se faamoemoe foi lele e matua fai, a tele lava e 30, 20, 10 pe 4. A o le vaega la lea ua aumai i i e fuafua i ai le vaega lea ina ia mafai ai ona pasia lau lafumanu i lalo o le Tulafono Tau Faaofi lea pe a e manao e ave e faatau, e fai lava sina tele o vaega e tatau ona mafai ona e ausia e faatino ai lea vaega. Na o sau fautuaga atonu e...

E pei lava ona ou fai atu i lau Afioga i le Minisita ma le Matagaluega, o se Tulafono Tau Faaofi lelei. Out e iloa o se Tulafono Tau Faaofi ua leva ona faataatia, ae atonu foi o le amataga lea o se tatou industry povi e faatau atu i atunuu i fafo, aua o lea o le a faatino le vaega lea e mulimulitai i ai le aufaifaatoaga lea e faia lafumanu. Ae po o lava la a tatou manu e faatino ai lea vaega pe a faapea o lea o le a tatou o e fai le vaega lea.

E fautua atu ai la i lau Afioga i le Minisita, sei tagai ane, aua o lou manatu, e le tatau ona faatopetopeina le Tulafono Tau Faaofi lenei, e tatau ona tapena

muamua le aufai lafumanu, ia aoao uma le aufai lafumanu i vaega uma o le Tulafono Tau Faaofi lenei, o a latou galuega e tatau ona fai ina ia mafai ai ona talia a latou manupapalagi po o isi vaega o manifasi i lalo o le Tulafono Tau Faaofi lenei pe a faapea e manao e faatau atu mo le fofoga taumafa o le atunuu. E pei o nai manatu ia lau Afioga i le Fofoga Fetalai.

FOFOGA FETALAI: Malo faafetai mo le finagalo faaalua o lea ua faamauiina e le Afioga i le Minisita.

Ia, e maitau atu ua leai nisi sui usufono... Ona o lea ua tatou taunuu i le tatou taimi malolo, o le a tuuina atu le avanoa i le sui usufono mo Faleata Sisifo ma se tasi o sui usufono mo Salega, Afioga Afualo Wood Utu Salele pe a tatou taliu mai i le tatou malologa masani o le afiafi.

Ou te faasilasila atu ua faataatia ese Tualumaga a le Fono Aoao mo lana malologa masani o le afiafi.

Na faataatia ese Tualumaga a le Fono Aoao mo lana malologa masani i le itula e 8:43 i le po ma toe faaauau i le itula e 9:20 i le po.

FOFOGA FETALAI: Ou te faasilasila atu ua toe amatalia nei Tualumaga a le Fono Aoao Faitulafono.

Out e talitonu ua faafoisia le malosai i le tino aua le palega auau o le taliga o le sua i le paia o le tatou Maota i lenei vaega o le afiafi. E manatu foi o lea ua maua le faatiliga malosai aua le faaauauina o le tatou galuega, ae momoli atu ai le agaga faafetai tele i le paia ma le mamalu o le tatou usugafono, e talitonu o lea ua tatou taunuu i le vaeluaga o le tatou galuega. O lea o le a tatou alu i le vaega mulimuli o le tatou Fonotaga seia tatou taunuu i le itula e 11. Malo le onosai malo le faapalepale, malo foi le usufono i le paia ma le mamalu o le tatou Maota.

E fautua atu i le Satini o le Maota e tuutuu ifo laitiiti i lalo le malulu o le ea ina ia mafai ona gafataulimaina e le paia ma le mamalu o le tatou Maota ua fai si malulu o le po. E fai le tatou malologa ua amata ona tulei saunoa le paia ma le mamalu o le tatou Maota i le Tulafono Tau Faaofi o le Fasimateina o Manu ma le Faasoia atu o Manifasi 2014.

Tulai mai le sui usufono mo Faleata Sisifo, o lea na tolopo a tatou Tualumaga a o lo o tulai mai e fia saunoa i le Tulafono Tau Faaofi.

Tofa LEALAILEPULE RIMONI AIAFI: Faafetai i lau Afioga i le Fofoga Fetalai. Faamalo foi le onosai i le paia o le Palemene i lenei itula o le po, faafetai foi mo le tausiga. E ui lava ina fesuisuia, ae malo lava, manaia foi le supo o anapo, toe supo nei toe supo foi taeao ona matagofie lea o le vaiaso. Ia leaga o le Tulafono Tau Faaofi o Manifasi, o lea la ua amata ona tatou tofaina aano o manifasi eseese e faasupoina a o tatou talanoaina lenei Tulafono Tau Faaofi.

Muamua, e momoli le faafetai i lau Afioga i le Minisita ma le Matagaluega i le tuuina mai o lenei Tulafono Tau Faaofi. E le fou i le Maota le lagalaga pea e sui usufono o se fale fasimanu mai le tele o tausaga. O lau faafetai o lea ua mafai ona faatinoina i lou taimi ma le Matagaluega.

Na pau lava le mea o le saunoaga a lau Afioga e faapea o le World Bank pei se initiative a le World Bank, ae ou te talitonu e leai o le initiative lava a le Matagaluega ma outou. E pei o le World Bank lea e sue ai le funding, a o mea lava ua leva ona fuafua e le Matagaluega ma tatou, aua e le faatonua mai e latou a tatou mea e fai. Ae faafetai o lea ua...

FOFOGA FETALAI: Malie le sui usufono o lo o saunoa sei tulai mai le Minisita mo Faatoaga ma Faigafaiva.

Tulai mail au Afioga i le Minisita.

Afioga Hon Le Mamea Ropati: E faamalulu atu lava i lau Afioga i le sui usufono mo Faleata Sisifo, e leai o le uiga o lau tala o se initiative a le World Bank, o le World Bank lea e maua mai ai tupe e faatino ai le tatou faamoemoe. A o nei fuafuaga, masalo ua sili atu i le 10 tausaga talu ona fuafua ae fai lava ma le faataunuuna. Ai ona o le leai o ni tupe, a o lea la ua maua mai le tupe i le World Bank, lena e silafia i le taimi lenei lena e i ai le SASEB foi lea le poloketi lea, o lena e lavea uma ai lava ma le vaega lea, a o le initiative lava a tatou ma fuafuaga ua leva ona tataua ona faataatia a o lea faatoa faatino talu ai o lea ua maua tupe mai le World Bank. O lau fesoasoani atu lea i lau Afioga.

FOFOGA FETALAI: Malo. Tulai mai le sui usufono mamalu mo Faleata Sisifo.

Tofa LEALAILEPULE RIMONI AIAFI: Faafetai i lau Afioga mo le faamalamalamaina o le vaega lea.

Ia, e momoli atu le faamalo, faafetai o lea ua oo mai le Tulafono Tau Faaofi ma ua tatou vaavaai i ai, o le a faatinoina. O lea la ua foufou out e le mailloa pe ua taunuu mai tatou mobile units ia e feaveai. Afai ua taunuu mai, faafetai.

O le tulaga i le capacity po o le gafatia e le Matagaluega o le tauaveina o tiute nei, o le vaega lea e ao ona faamuamua aemaise lava i vaega o fomainu manu aua pei o latou ia e patino i ai le faatinoina ma le tauaveina o lenei matafaioi. O se tasi lenei o vaega sa lagalaga pea e sui usufono i le taimi ua tuanai ona o le lava o tatou fomainu manu, po o le foi mai toe malaga ese atu ona o le lelei po o totogi, po o nisi mafuaaga, ae afai ua i ai se fuafuaga a le Matagaluega i nisi ua i ai ma nisi o aoga i le taimi nei, o le vaega taua lea aua e faamoemoe tele i ai lenei vaega.

O le isi vaega, ona o lea e muamua lava i le Tulafono Tau Faaofi e faapea e le o fuafuaina mo manu foi nei e ave i fafo mo le export. Atonu o le a faatinoina i le lumanai, a o se mea e taua tele le vave tagai o lau Afioga i le Minisita i ai pe afai e faataunuuna lenei vaega, aua e le i mamao atu ni tausaga ua tuanai atu, sa ave a tatou povi se i tulou i Toga. A o le i faia foi le Tulafono a Amerika Samoa, sa ave foi i Amerika Samoa ma isi atunuu lata mai, ae pei o le ala lea na taofia ai ona o le leai o se fale fasi manu faapitoa e mataituina ai le lelei atoatoa ona faatinoina o lea vaega. O lea foi ua maua e le aofia ai povi mo faalavelave, pe o le sao lea aemaise o manu fata. Pe o le sao lea pe le aafia ai i lea mea aua o le fuainumera lea e aumai, e tele atu povi ia e faaoga i faalavelave i lo povi ia e faaoga i le fofoga taumafa lea e aumai e faatau. Tasi lea vaega e talitonu e tataua ona tagai i ai lau Afioga ma le Matagaluega

Afioga Hon Le Mamea Ropati: Lau Afioga i le Fofoga Fetalai.....

FOFOGA FETALAI: Tulai mai lau Afioga i le Minisita

Afioga Hon Le Mamea Ropati: O au ou te le mana'o e faalavelave soo a o saunoa se sui usufono, ae leaga o isi taimi e pau ai ia te au mea ia e saunoa mai ai, ae mana'ia le taimi lenei a o lea foi e le i saunoa isi. Aua atonu e aoga foi le faamalalalama atu o lea mataupu atonu e silafia lelei ai foi e nisi o sui mamalu.

O le fuafuaga lea e i ai, o le faamoemoe lava o manu fasi ia e ave mo faleoloa o nisi o steak na, e ave i faleoloa ona faatau atu lea e faleoloa i tua i le lautele o le atunuu. E pei o le amataga lena o le tatou faamoemoe lea e i ai. E manumanu tele le Matagaluega i le soifua maloloina lelei o le tatou atunuu aua e le o toe po se lilo, o le tele ia o le mau faamai ia tatou te faafofoga ma tatou faalogo i ai i fafo, e le gata i manu fasi ia o manu papalagi e pei o le mea lea o le foot and mouth disease la e tupu soo mai o i Europa, aemaise foi o isi aano o manu fasi i Saina ma isi atunuu o Asia o lo o tele faamai o lo o tutupu mai ai. Ou te iloa ua alagataua lava le taimi nei ina ia puipuia lo tatou atunuu mai faamai e ono tutupu mai i aano o manu fasi.

O le mea lea e i ai isi atunuu, ua mafai lava ona pepesi sao mai lava le faamai mai le taumafaina o aano o manu fasi i le transfer i le tagata e pei o le TB ma isi faamai faapena. Atonu ua alagataua le taimi lenei ina ia malupuipuia ai lo tatou atunuu. O lea faatoa maea atu po o le amataga o le tausaga nei po o le faaiuga o le tausaga lea na pasia ai le Health Care fou foi lea. O le Tulafono la na e lua o lena ma lea e galulue faatasi i le tulaga lenei e pei la o le tulaga lena, e muamua ona faalelei muamua le tatou lotoifale ona ave ai foi lea i fafo aua o lea foi sa lau a tatou manu i Tutuila, ae tasi lea mea sa faasa mai e le FFA ona e le o ni manu inspected pe fasi i totonu o ni slaughterhouses po o ni fale fasi manu. Atonu o le tulaga ua tulai mai nei, o le a lelei lea mo le agai i luma.

A silasila foi i le vaega 37 o le Tulafono Tau Faaofi lea e faatu atu, o lena e tusi mai ai le transitional period aua o le fuafuaga lea e amata muamua i manu ia e faatau i faleoloa ona faasolosolo atu lea i tua i isi fuafuaga ia e i ai. O le naunautaiaga lava ua tatau ona lavea ai ma manu papalagi ia e fai ai faalavelave a le tatou atunuu, a o le tulaga faigata o lo o i ai o lena ua outou silafia lea e ala ai ona tuu ai le vaega lena o le Tulafono ina ia tatou agai malie atu i ai ma eventually o le mea lena e tatau ona fai.

O lea foi e tatala le avanoa i nai o tatou tagata i tua e mafai ai ona latou mafai ona fai le mea lea pe a faatino e i latou, ae galulue faatasi lava ma le Matagaluega e pei ona maea ona ou tolaulauina atu. O lea foi ua i ai le aufaigaluega i le taimi nei ua mafai ona amata ai le tatou fuafuaga lenei mo meat inspectors ma vets. Ae sao foi lau saunoaga, e faamoemoe foi i le totoi tulaga o mea faapenei. A o lea ua fuafua lava foi le Matagaluega i se vaitaimi e tatau ona oo atu ia Aokuso po o Setema, o se vaitaimi faapena ua gaoioi a tatou mobile units nei, e tasi mo Savaii tasi mo Upolu.

O lau soso atu lea i le mataupu lea, a o lea foi e lavea atu ai ma nisi mataupu sa laga mai e le sui usufono mo Faleata Sasae i le tulaga lea e pei ona saunoa i ai le sui usufono mamalu. Atonu e lelei foi le tau atu o nai mea ia, ne i te i foi ua toe laga mai e nisi o le paia o le Maota, ae taumafai atu lava e tali atu

pea i ai nisi mea e fia faafesili mai ai, ae ou te talitonu lava e matua manino lelei lava le tatou Tulafono.

FOFOGA FETALAI: Malo faafetai saunoa i lau Afioga i le Minisita. Tulai mai le sui usufono mo Faleata Sisifo e faaauau le saunoaga.

Tofa LEALAILEPULE RIMONI AIAFI: Faafetai i lau Afioga mo le fesoasoani mai i lenei vaega. E aoga foi lou tulai mai e alu ese mai ai isi vaega ia, leaga a talanoa loa i faamai, leaga o lena e le o afio mai i ina le Afioga i le fomai o lana matafaioi lea, ae a talanoa loa i le paluina o vai e inu ai le au mamai, e toatasi lava le tagata iinei i Samoa e mafaia mea nei na o oe, na o oe foi na e faapaina le pomu i le Kolisi i le taimi a o e aoga ai. E le o se tamai tagata la, o lea la ua e oo mai iinei, e pei ua e fia expert i le faiga o le fale fasi manu, ia malo. O atugaluga la ia ou te vaai atu i ai i le tatou Tulafono e tuu atu se i tagai i ai lau Afioga.

Muamua, e le o se atugaluga a o se manatu ona e pei o Tulafono ia e tuuina mai i le Maota, o le tele lava o mea ia o Advisory Committees, o Komiti Faufautua e tofia e le Minisita, a o lea la ua aumai le Tulafono Tau Faaofi lea e tofi e le CEO. E leai se afaina ae na o se faamatalaga e avatu ona o la e pei e atagia ai se inconsistent i Tulafono. Aua o Advisory Committee e tele ina aumai tutusa lava le...ae afai o le tulaga lea ua i ai e le afaina, pau lava le mea pe e le i toe tagai lau Afioga ma le Matagaluega i sui o le Komiti aua e luasefulu ma ona tupu sui o le Komiti. Atonu foi o le finagalo o le Matagaluega ia aofia uma tagata o lo o i ai i totonu o lea atinae, ae manaia foi le toe tagai i ai o lau Afioga i le fetuutuunaiga o le Komiti lenei agai i luma, aua o le mea o lea faatoa amata.

O lona lua pe afai e sao lau faitau, o lea e fautuaina e tasi le fale fasi manu i Upolu ona fai lea o se asiasiga, e foliga mai o lo o i ai se fuafuaga a le Matagaluega e tuu i tua e privatise le vaega lea, tailo i ai i lau Afioga ma le Matagaluega ona o le mea o lea faatoa amata. Sa i ai se manatu e amata i le Matagaluega se i faatino lelei ona privatise foi lea e pei o le mea e masani ai. Afai la o le finagalo lea e fai se fale fasi manu se tasi, aisea la ua tasi ai? E le tataua ona lua pe tolu aua ua toatele le aufaipisinisi ua gafatia ma e i ai foi a latou resources e faatino ai lea faiga? E faigofie lau Afioga aua e i ai foi se tasi o lo o mafuta sa taumafai i lenei taumafaiga taua e le gata ina aumai meaai mo manu, fai le fale mo meaai a manu, fai le fale puaa, moa ma mea faapena ma le fuafuaga e fai foi ma le fale fasi manu, a o le mea ua tupu ua uma tupe ae e le i oo i le vaega mulimuli o le miti o le fale fasi manu ona e le faigofie, ae faafetai foi i le Matagaluega aua sa tuu mai le latou tauau i le faaogaina o facilities ia i Vailima e fesoasoani i ai ona o se vaega aoga lea, e taua tele le sao lea.

O nai vaega ia e toe tagai i ai lau Afioga, a o le a foi la le tau i tagata e ona manu e fasi ai pe afai o lea o le a fai e le private sector aua e le taugofie aisa ma mea faapena. Pe e le tataua ona fai se lua pe tolu ina ia compete pe faaauau e le Matagaluega i le amataga ona tuu ai lea i tua.

Afioga Hon Le Mamea Ropati: Lau Afioga i le Fofoga Fetalai....

FOFOGA FETALAI: Tulai mai lau Afioga i le Minisita.

Afioga Hon Le Mamea Ropati: E faamalulu atu i le faauilavea a o e saunoa. O le fuafuaga lea e pei ua maea ona ou tuuina atu, e lua a tatou mobile units. E ala ona faaaoga mobile units ina ia mafai ona fealuai nai lo o le sau o le tagata e aumai lana manu i le mea mamao o i ai le fale fasi manu. O lona uiga e tasi Savaii tasi foi Upolu nei, ae i ai ma le fale tele lea iinei lea o le a fuafua e fai i uta i Nu'u i le mea o lo o i ai le Ofisa o Faatoaga. O le fale mautu tele lena e tasi, a o lea e i ai a tatou mobile units ia e lua e tasi mo Upolu tasi mo Savaii, e fealualuai e fesoasoani mo i latou e fia fasi a latou manu ma faatau i faleoloa ina ia maua ai aano o manu fasi e faatau atu i tua i le atunuu.

O lo o i ai foi le avanoa e tatala atu i tua ia i latou e pei ona e maua mai i lau saunoaga, sa i ai foi nisi sa fuafua le faamoemoe lena i nisi o tausaga ua tuana'i, ma e le o taofia lava, a o lea e tatala le avanoa, ae mafai lava ona fai se latou slaughterhouse ae ia i lalo pea o le supervision a le Matagaluega. O le tulaga tonu lena o lo o i ai, ae a alu alu foi ua tuu saoloto i tua i le private sector, o se mea lelei foi lea mo le tatou atunuu. O le faamalamalamaina lea o lea mataupu e pei ona saunoa le sui usufono.

FOFOGA FETALAI: Tulai mai le sui usufono mamalu e faaauau le saunoaga.

Tofa LEALAI PULE RIMONI AIAFI: Faafetai mo lea fuafuaga aua o le agaga lava lea ia tele ni fale faapea i le agai i luma mo manu ia. O lona uiga la i le tele o manu ia e fasi i tua i faalavelave, aua e i ai foi isi manu a uma ua aumai e faatau. O lona uiga a pasia le Tulafono Tau Faaofi lena, o lona uiga e le mafai ona toe talia i fale e faatau ai aano o manu fasi pe afai e leai se certificate lea sa fasi ai i totonu o se fale faapitoa po o totonu o mobile units nei. E aoga foi i aiga ia e fai faalavelave e mafai ona faaaoga i ai mea nei ina ia mafai ona faaaoga foi manu fasi nei i le faatauina.

O le isi mea e pei o lea e tele le tatou manatu i povi ma puua, a o lea e lavea ai foi ma manu eseese e i ai mamoe. Ou te le iloa po o i ai ma moa ma isi manu fetolofi uma ma manu vaefa, pe lavea uma ai iinei. Ona pau lava le fesili lau Afioga o le vaega lea e 25 o le Tulafono Tau Faaofi o lo o faapea mai, "Ia fasimateina lelei ma le saogalemu ia manu." A faapalagi o le humane way, ona pau lava ia o faaupuga o lo o aumai ai, ae e le o faamatalaina mai po o a ituaiga fasimateina e talia e le Matagaluega. Ona pau lava le mea lea e fai mai o le slaughtered in a humane manner, ae manatua o meaola ia tatou te talanoa i ai. Sa tatau ona faapea slaughter in animal manner, a o lea na ona faapea mai.....

Afioga Hon Le Mamea Ropati: Lau Afioga i le Fofoga Fetalai....

FOFOGA FETALAI: Malie lava lau Afioga i le Minisita se i fai atu le fautuaga lea i le sui usufono mamalu.

Ua outou silafia o a tatou lauga ia e fai o lauga faalauaitete. O lea o le a tatou agai i mea taitasi ae faamalulu atu ne i te i ua alu le tatou taimi. Se o le fasimate lava o le mea lava e tasi, tatou te le tau tulitulia le eseese o le faa-Samoa ma le faapalagi. O le mea taua ia fasi ae ia fasi lelei, ae leaga o lea o le a tatou agai i mea taitasi a o lea e maua outou avanoa faalua.

Malie le Minisita ina ne i alu le tatou taimi a o lea e faagasolo a tatou galuega. O lea ua manino ma malamalama le Tulafono, e le o se atugaluga tele i le faauiga atu e le Fofoga Fetalai. Tulai mai le sui mamalu.

Afioga Hon Le Mamea Ropati: Lau Afioga i le Fofoga Fetalai, e i ai le isi mea lea out e fia talanoa atu ai foi e uiga i mea ia o manu ia o faalavelave lea na ala ai ona ou tulai atu nei. Ia silafia foi o autu o mea nei o taigasua lea e faaaoaga i ai manupapalagi ma puua vaecane foi lava le... e le faapea a avatu se sua ona faapea lea e te alu e ave e faatau. E leai, ou te talitonu o faaaloaloga a nai o tatou aiga, o la e fai ia te oe ona e alu lea tufatufa i si ou aiga ma e latalata ifo ia oe. Ae le faapea e ala ona fai ona e alu lea e ave lau povi lea na maua mai i lau sua e ave e faatau. E le o le agaga lena i lou lea talitonuga, atonu e eseese ma lou finagalo. E le o lavea ai la manu ia o lo o e saunoa nei i ai i le tulaga lea faapea e faasa ona ave foi lele e faatau. O le mea lea e i ai, e faasa ona ave au manu ia e faatau pe afai e lei fasia i totonu o fale fasimanu ia a tatou po o slaughter houses, e ave i ai le tusipasi foi lea o le certificate ua uma ona inspect o la e saogalemu mo le fofoga taumafa o le atunuu. A o manupapalagi lava ia o lea e faaaoaga i tatou.... O le mea lena mo oe lava ia. Atonu la o lea e i ai foi le transitional period lea a alu alu mo le agai i luma sei faamasani foi nai o tatou tagata i le tulaga lea ona lavea atu ai lea i le taimi pe a uma le tolu tausaga lea e i ai le transitional period.

O le upu lea o le humane, e le faapea o le humane, e ese lava le humane, ese le humane, Ia manatua foi isi tagata a fasi le manu, e faalogo atu lava o la e faataitaio mai i le tiga, a o le mea la lena e tau e le humane, le fasiga o le manu lena. O le humane, na o le pa lava palasi loa uma e le tau oi mai i se tiga po o se mea faapena. O le soso atu lea i le mataupu e pei ona e saunoa i ai.

FOFOGA FETALAI: Ia, tulai mai le sui usufono mamalu mo Faleata Sisifo.

Tofa LEALAILEPULE RIMONI AIAFI: Faafetai i lau Afioga i le Minisita, o le a le faia se ta Igilisi foi lele i i ae o le a taatia ia faapea lea vaega. Na pau lava le mea lau Afioga, a aumai a tatou sua foi nei aua o au ia e leai se sua i le povi, e le faapea e aumai ma folafola mai, lau sua lea lau Afioga i le Taitai o le Itu Agai a avatu ona aua lea le faatauina ae tufa i le au tautua. E leai, e aumai lava le sua ia ona pule lea o le tagata ia e ona le sua pe taumafa, pe tufa pe faatau. O le mea la lena o lea e tau ina laga leaga o le mea o lea e tupu. O nai faleoloa nei, na o le aumai lava o le sua faatau atu.

Lau Afioga, ona faaiu atu lea o sou manatu i le tatou fale fasimanu lea e i Vailima po o le a se fuafuaga a lau Afioga ma le Matagaluega i ai, aua sa tau maua o lo o aumai se vaegatupe i le World Bank e upgrade ai, a o lea foi e maua i isi faamatalaga o lo o fuafua e faamatuu vaega eleele nei mo Amepasa o ofisa mai fafo aua o se nofoaga lelei tele foi mo lea vaega. Po o le a le fuafuaga a le Matagaluega, aua e le tele tele foi se fanua o i ai. Ua tuai foi le tele o mea o i ai, pe lei i ai se avanoa lelei i se isi vaega lelei e sii i ai aua e taua tele le auaunaga lea.

FOFOGA FETALAI: Malie le sui usufono mo Faleata Sisifo sei tuu atu le avanoa, e augofie lava le Minisita e tali au fesili.

Afioga Hon Le Mamea Ropati: Faafetai. O le tulaga lea ua oo i ai le saunoaga a le sui usufono, e le o i lea e fuafua e fai ai le tatou fale lea ua fuafua mo le fale fasimanu o Nuu. Ae leaga la o lea ua e saunoa mai i le mea lena, ia atonu e aoga foi lou fesoasoani atu, o lea ua i ai le faamoemoe ua uma ona pasia o lea o le a see ese le tatou fale tuai lava lea vaeane foi lava le paia o le Maota, pei se fale taavale, la e i ai le Ofisa ma mea uma na i uta i Vailima. Masalo o le fale lena o lea e te saunoa mai ai, o lea o le a see i o i le mea lea e i ai le fanua tele o le Matagaluega i Nuu, o i ina lea o le a fau ai le fale fou mo le ofisa, ofisa uma o le livestock. O lea foi ua maua mai le tupe i le Malo o Saina, o latou lea o le a faatinoina le fausia o le tatou fale fou lea. Ma o le lelei o le tulaga lea o le a sifi i ai, ona o le tele o le fanua, aua e sili atu i le 100 eka le tele o le fanua, e mafai lava ona... a leai foi ua faatataa ai nisi o tatou manupapalagi, o mamoe ma isi mea tau livestock i le vaega lea e te saunoa i ai, ae le o i ina lea e faamoemoe e fai ai le tatou fale, o i i le mea lea e i ai le fanua tele o le tatou Malo i nuu. E faigofie e tuufaatasi uma ai lea i ina ma le vaega lea o lo o i ai nei.

O lau tali atu lea ma le faaloalo.

FOFOGA FETALAI: Malo faafetai. Tulai mai le sui usufono mamalu e faaii mai le saunoaga.

Tofa LEALAILEPULE RIMONI AIAFI: Faafetai tele. O mea lelei uma mea e avatu i le itumalo o Faleata e faatino ai e saogalemu toe lelei tagata e fesoasoani i lau Matagaluega. Faafetai i lea fuafuaga taua.

Ia e avatu ai le faamalo i lau Afioga i lenei Tulafono Tau Faaofi. E aoga foi le tatou talatalanoa i sua ma manupapalagi, o lea e faafofoga mai Afioga i Minisita o lea o le a tatou o e tatala o tatou auala ma faleaoga taeao ma falemai e fai fuafua foi i ai, ina ia certify lelei nai manu ae lei taia mai a tatou sua. Ia manuia tele le tatou po. Faafetai.

FOFOGA FETALAI: Malo faafetai saunoa. Ia, o le a lafo i le isi Itu o le Maota. Tulai mai se tasi o sui usufono mo Falealili, Tofa Tusa Misi Tupuola.

Tofa TUSA MISI TUPUOLA (Falealili): Faafetai i lau Afioga i le Fofoga Fetalai ua maua foi se avanoa e tulai atu ai lenei itumalo e fai sona sao i le Tulafono Tau Faaofi o le Fasimateina o Manu ma le Faasoa atu o Aano o Manufasi 2014, aemaise foi lona saogalemu mo le taumafa a le atunuu.

Lau Afioga e leai ni manatu se tele o lou tulai atu, ae ua ou tulai atu ona o le isi lenei itumalo e tele lafumanu, o Falealili. A o lea out e vaai atu i le Tulafono Tau Faaofi i le tulaga o le faatinoga, e pei o lea faatoa uma ona saunoa le tasi sui usufono, pei na o le tasi le fale fasimanu, faatasi ai ma le tulaga lea o taavale feaveai e ave ai tino o manufasi. O lea sei silasila ane lau Afioga ma le mamalu o le Matagaluega, po o le a se faiga lelei e fua i ai le aufaifaatoaga fai lafumanu i afioaga ia e i ai Falealili ma isi itumalo i tua, ina ia aua nei vave ona faaleagaina aano o manufasi mo faamoemoe ma fuafuaga uma pei ona i ai, ae lagolagoina uma vaega o le Tulafono Tau Faaofi. Ua maea foi ona talanoa talu ai i le workshop sa faia ma le Palemene, sa lagona lava foi le fiafia ina ua faamatala le aufaigaluega i le tulaga o le saogalemu o

lenei foi Tulafono Tau Faaofi ma lona taumafai ina ia maua ai pea le tulaga lelei o taumafa a le atunuu.

Ae na o le lua lava nai au fesili lau Afioga i le Minisita ou te fia maua i ai sina faamalamalamaga, ona o lo o i ai i totonu o le Tulafono Tau Faaofi le vaega lea faapea a oo i Aso Sa ma aso malolo e le tatalaina le vaega lea o ofisa latou te siakiina le tulaga lelei o manu. Ae silafia foi e lau Afioga ma le mamalu o le Pulega, o Samoa, e tele ona faalavelave e fai i Aso Sa, e tele foi faalavelave e fai i aso malolo. O lona uiga a faapea o le tulaga lea o le a tulai ai pe a oo ina faatino le Tulafono Tau Faaofi, o lona uiga la e i ai foi ni feeseeseaiga i le va o afioaga ma le Matagaluega i le tulaga o nei foi faafitauli, ona o Samoa lava ia e tele ana mea e fai i aso faapea e pei o maliu, o faaipoipoga ma nisi o mea faapena, e moomia ai lava la le fesoasoani a le Matagaluega i aso malolo ma Aso Sa.

O le isi tulaga ou te fia fesili atu ai i lau Afioga, ona o le tulaga lea i le aano o manifasi i Samoa. Ou te iloa o le tele o isi atunuu o le Pasefika e pei o Vanuatu le isi atunuu e ese le malu o le aano o le manifasi, a o tatou lava lea e pei ona iloa po o le a lava le ituaiga manu e laitiiti ae a fasi lava ma taumafa i ai le atunuu e fefeu lava le fasipovi. Po o le a le mafuaaga, po o le mea o sao le vao o aai ai povi po o le mea e le o lelei ona faatinoina e le aufai lafumanu le tulaga o le tausiga lelei o povi ina ia malu ai o latou aano pe a oo i le taimi... aemaise foi o le tele lava o a outou Afioga ma le mamalu o lenei Palemene, pei ua fiafia lava i le mea lenei o le steak. A o foi i faleaiga, e pei o mea na e masani ona... e fiafia i le steak foi lele e le matua vela lelei ae a taumafa atu i ai pei ua sau le toto o le manu, ae o le mea lena e aumai e fefeu. E faapena la le tulaga o i ai se manatu, po o i ai se fuafuaga a le Matagaluega i se auala po o ni mea e tatau ona foia ai le aano o manifasi mai lona taumafaina e le mamalu o le atunuu.

A o le tulaga lautele ma le aoatetele lau Afioga i le Fofoga Fetalai ma le Maota Fono, e lagolagoina e lenei itumalo o Falealili le tatou Tulafono Tau Faaofi fou. Na pau lava le mea taua ia tatou tatalo i le Alii ia fesoasoani mai i lau Afioga i le Minisita ma le Matagaluega, i le Ofisa Sili o Pulega ma le Matagaluega ina ia faataunuuna le tatou faamoemoe pei ona fuafuaina i lenei Tulafono Tau Faaofi. Ia manuia le tatou Fono. Faafetai.

FOFOGA FETALAI: Malo faafetai saunoa.

Afioga Hon Le Mamea Ropati: Ia, lau Afioga o lea o le a ou tali atu ia. O le tali atu la i le... Oi, sei uma lea ona e toe saunoa mai lea. Ia, saunoa ia lau Afioga.

FOFOGA FETALAI: Ia, pei e sili lena e tasi ai lau tali mulimuli lau Afioga i le Minisita, a o lea o le a tuu atu le avanoa mulimuli lea i se tasi o sui usufono mo Salega, Afioga Afualo Wood Uti Salele.

Tulai mai le sui usufono e saunoa.

Afioga AFUALO WOOD UTI SALELE: Faafetai mo le avanoa. E momoli atu foi le faafetai i le Afioga i le Minisita i le Tulafono Tau Faaofi ua maea ona tapena. O le upu moni lava ia, o le lagolago e avatu aua ua leva ona tatau ona faatino, a o lea ua tino mai. E na o le tolu lava nai vaega ona o lea ua tele ina afea uma e lauga atugaluga ma se tuualalo i lau Afioga.

O le vaega muamua, po ua i ai ni tomai faapitoa foi nei, aua o lea ou te iloa e le o aoaoina i uta i le USP i Alafua vaega nei o le Meat Inspection po o le NUS. Sei silasila i ai aua na o Niu Sila ma Ausetalia lea e maua ai tomai faapitoa ia. E taua tele ona o lea ua faatu lenei auaunaga taua, ae ia mafai ona e i ai ni totino o aoga ia, aemaise o lea ua i ai i totonu o tatou lala taua nei o suesuega ina ia mautinoa lelei ua autovaa i ai alo ma fanau.

O le isi vaega lona lua, ona o lea la ua tulai mai nei, o lea ua faatino lenei faamoemoega taua tele, ua mafai ai ona faamaufaailogaina ma tau mai ia i tatou aemaise o tatou o le au faaaoga oloa, o lea ua saogalemu le faaaogaina o le aano o le manifasi.

O lau fesili i lau Afioga i le Minisita, o le a sou finagalo i ai, ona o le taimi nei, o le tele ia o faletalimalo lea e i ai, ae faafetai lava mo le Tulafono Tau Faaofi. O le tele o faletalimalo lea latou te faaaogaina aano o manifasi lea e aumai mai Niu Sila. Pe le o le avanoa lenei e amata ai loa ona faaaoga aano o manifasi lea ua tapena nei, aua o lea ua taoto tonu mai lava i le tulaga e tatau ona i ai, ina ia faaaoga tonu le malosi o le aufai lafumanu, ona o lea ua sau le maketi ia tatou, o lea ua sau le tagata tafao. E tatau la ona taumafa i manifasi lea e mafai ona tatou tausi i inei i Samoa. Ae ou te talitonu foi o le aano o povi ma meaituaolo uma lava, e ese le lelei o lona aano. E moni lava pei ona saunoa se tasi o sui usufono mo Falealili, Tofa Tusa Misi Tupuola e fai sina malo o aano o povi. Ae ona o lea ua e saunoa i le ala e faigofie e faafilemu ai ona faalalo manupapalagi ia po o meaituaolo foi, aua o le isi lea auala e ala ai ona pei e aumai e malo le aano o le manifasi ona e tatau ona silasila, aua masalo o mea uma ia o lea o le a tapena e lau Matagaluega ina ia mautinoa lelei ona o lea ua e saunoa mai o Nuu lea o le a fau ai... O lou popolega la i ai, aua e i ai aiga foi nei e mananao e tasi se latou manupapalagi e faalalo ae ave e faatau. A faapea o tua i Falealili po o Aleipata, o le a sau ai lava le loli, ae manatua foi e tatau ona i lalo o le Tulafono Tau Faaofi e tatau ona i ai le taavale e feaveai ai manupapalagi. O lona uiga la, o se auaunaga e tatau ona silasila i ai lau Afioga, e tatau ona i ai loli faapitoa nei e tuu lelei ai i totonu manupapalagi. A faapea lava la o le aiga e tasi pe lua manupapalagi, ona vave logo mai lea ae taamilo atu le auala e aumai ai pei o le auaunaga i le taimi lea.

Afioga Hon Le Mamea Ropati: Malo. Ia finagalo malie foi lau Afioga ua ta faalavelave atu i le mea lea. O le uiga lea o le mea lea o le mobile unit. A mobile, o lona uiga e le o se mea e tumau ae feaveai ma fealuai. A faapea la o tua i Falealili, e alu lava i ai le mobile unit lea ona aumai ai lea e le mobile unit i le aisa ma aumai faatau po o fea le mea la e mananao le aiga e ave e faatau ai le latou manu papalagi lea ua uma ona fasi ma inspect lelei e Meat Inspectors a le Matagaluega, ae meamanu o lea ua ou tulai e tali atu nisi mea ua e saunoa mai ai.

E leai e le o le malo le sao o le upu, a o le fefeu o le aano o le manu. E sao, o le fefeu ia o aano o a tatou manu. Ia manatua foi o mea ia o steak, o maso. O le povi e pei lava o le tagata toleni, a toleni tele le tagata ua fulafula mai maso o le tino. E faapena foi manu papalagi latou. A faapea e faafilemu lava lau manu papalagi ma fafaga i vao lelei, a oo foi i le taimi e fasi mate ai, e malu foi lona steak. A faapea e pei o le manu foi lea e faalogogata ma sesegi ma fiu e tuli, o tama tonu lava na e matua fefeu lava.

Na faatoa ou foi mai nei lava o lea ua outou faafofoga mai o lea ou te tale i le malulu o le mea sa ou i ai. Na faatoa ou foi mai ai nei i le po a o le aso na

sosoo ai le tatou fonon. Na faatoa ou foi mai i le atunuu lea o Mongolia. Ua ou molimauina lea atunuu, o le matua tele o le povi, tele le mamoe, tele le oti ma solofanua, tulou lava le faafofoga a le Maota, a o le fefeu ia o aano o a latou manu. Aua foi o manu e taaloo solo aua tasi lea atunuu e matautia le tele ai o manu papalagi, a o le fefeu ia. E lua la mea taua, o le faafilemu o le manu ia aua le faaulavaleina foi lea. Ma lona lua, ia select lelei le vao e ai ai le povi.

O lea e faafofoga mai le matou Matagaluega, o latou foi e tatau ona faia semina ma workshops e uiga i le mea lea ma fautua tagata ia e tele a latou lafumanu ina ia faafilemu. Aua o le isi mea lena ua o ta vaai foi i ai i Isaraelu i mea ia aua ua o ta alu atu nei i mea e i ai lafu povi, ta te le i vaai ai i ni vao po o se togavao e lanu green mai. E feoai lava povi i luga i le palapala, ae lau atu meaai e fafaga ai, ae aumai e le gata o manu e tatau ai le susu, ae faapena foi a latou manu ia e maua mai ai fasi povi, o le malu ia toe manaia le susu aua e lau lava i ai le vao ma e le tele foi se mea e ono tafafao solo ai povi. E tuu lava i lalo o le fale, a ta mai foi se logo savali atu i o, po o ni povi tau susu e muamua aveane i ai le suavai e fui ato ai povi, ta mai le isi logo e vaai atu ua savalivali lava povi latou e le taitaiina e se isi pe a tatau ai foi le susu. E faapena, e ese le aoaoina lelei o povi i lea mea sa o ta vaai i ai. A o a tatou povi la, e fiu e alu e tietie i le solofanua e tuli solo povi la e tataa ifo i o i lea pupu latana ma lea pupu latana.

E pei o le tulaga lena e ala ai ona tau fefeu aano o a tatou manu papalagi. O lea la ua tau maua mai foi i Vanuatu le isi tulaga lelei o lafu manu aua o Vanuatu le isi tamai atunuu o le Pasefika lea latou te export ina le povi ona o le tulaga lena, e matua fai faalelei a latou polokalame mo le fafagaina ma le leoleoina o a latou lafumanu.

Se i faauma atu pea la ma le isi mea lea sa e saunoa i ai aua ou te le iloa pe sao ae ou te le iloa. O a tatou Meat Inspectors ia ma Vets mai fafo i Ausetalia ma Niu Sila. Ou te iloa e le i aoaoina i inei aua ou te mautinoa o le NUS e le o aoaoina ai aua e le o se Iunivesite faa-Faatoaga, ae e le iloa la i le USP pe i ai ni a latou courses. A o lea o le a agai tatou i le mea lea ma e ao ai foi ona se i silasila ma talatalanoa i ai pe i ai se vaega o le latou polokalame e mafai ona aoaoina ai nai a tatou Meat Inspectors, a o lenei taimi o lea ua omai mai fafo alo ma fanau a le atunuu.

O lau tali atu lea ma le faaaloalo, faafetai.

FOFOGA FETALAI: Tulai mai se tasi o sui usufono mo Saleaga, Afioga Afualo Wood Uti Salele e saunoa.

Afioga AFUALO WOOD UTI SALELE: Faafetai, ona o lea ua saunoa maeaea foi le Afioga i le Minisita, e le o toe tele foi la se manatu ae e pei na o le pau ia o nai manatu e fia avatu, ae faamalo lava mo lenei Tulafono Tau Faaofi taua.

O lea ua musumusu mai si ou uso lea ona sa faapea lava ai o lau Afioga foi e tele le silafia i le suiina o mea nei o vailaau, pe e le mafai ona sui ane se vailaau ina ia malu ai le aano o a tatou povi ma aua ai ne i ulavale tele a tatou manu.

Ma le faaaloalo lava, faafetai.

FOFOGA FETALAI: E leai o lea tatou te talatalanoa ma o le fesoasoani a le Fofoga Fetalai. Se i malie lava le Minisita.

O le mea lenei o le meat o le matafaioi lena a le chef. E uma ona aumai le meat i fafo ona marinade lelei lea ma agai ai e kuka le ituaiga meaai e mana'o i ai ma o le tulaga lena. So o se ituaiga meat lava e fefeu, o lona uiga e le qualify le chef o lo o kukaina. Ia manatua foi a e alu atu ona e fesili lea pe rare pe well done po o tulaga uma na. E eseese foi ituaiga kuka ma e sao le saunoaga a le Afioga i le Minisita i le tulaga lea, ma o le isi lena mafuaaga e ala ai ona fefeu aano o manu fasi, a o le faatinoina ia o le taumafataga, o le chef e faatinoina le tulaga ina ia tender le fasi povi po o le aano o le manu fasi mo le taumafaina e le mamalu o le atunuu.

O le fesoasoani atu lena ina ne i t e i ua palu ni vailaau ae ona ai se isi.

Tulai mai lau Afioga i le Minisita mo Fesootaiga ma Faamatalaga Tekonolosi.

Afioga Hon Tuisugaletaua Sofara Aveau: Faafetai lava. E leai na ona fesoasoani atu e faaopoopo i lau saunoaga, a o lena ua manaia lava i le mea lea e faamalu ai le aano o le manu fasi.

O le tasi lea aoga tonu lava o le fale fasi manu aua o i ina faatoa lelei ai le tino o le manu aua o le fale fasi manu, e aumai le povi ona faamalolo lea i le po atoa, ona faatoa fai lea o le galuega e fasi i le isi aso ina ia toa lelei lona tino. O le mea muamua la lena. E le mafai la ona fai i tua i mea la e nonofo ai o tatou tagata, ae faaoga le fale fasi manu lea ona faigofie lea ona fai ma faatino lelei ai le fasiga.

O le vaega lona lua, o le tele lava o aano o manu e i le va o le tasi ma le afa tausaga i le tolu tausaga, o le taimi e aupito sili lena ona lelei. A o a tatou manu e tausi ai lava mo le fia tausaga ona faatoa faaoga lea. E aumai la ua le fetai ona o a tatou manu sa tausi mo faalavelave, ae e le o faia foi lea ina ia ave i le maketi, ae a fai la le fale fasi manu, o le aano o le manu e aupito sili ona lelei o le tasi ma le afa tausaga agai i le tolu tausaga. O le taimi lena faatoa aano lelei ai le manu ma talafeagai ai mo le taumafa ma e le fefeu.

Ma le faaogaina la e pei o le vaega lea na saunoa i ai le Fofoga Fetalai, a o le amataga lava ia e eseese tino o manu aua e eseese breeds o manu. E i ai foi la le sao o le mea lena i povi fefeu ma povi e le fefeu, ona e ese le dault master ma e eseese uma lava ituaiga, ona aumai lea o mea na faatasi ma meaai a manu ona tuu faatasi lea ona maua ai lea o povi eseese.

O le fesoasoani atu lea i le mataupu.

FOFOGA FETALAI: Malo faafetai. E manatu ua manino lea mataupu ona o lea sa tautalagia e sui usufono ma o le taua lena ona o lea ua manino ma malamalama le folasaga a le Afioga i le Minisita mo Fesootaiga ma Faamatalaga Tekonolosi.

Tulai mai se tasi o sui o le Au Palota Taitoatasi, Afioga Maualaivao Pat Ah Him.

Afioga MAUALAIVAO PAT AH HIM (Palota Taitoatasi): Faafetai lava i lau Afioga i le Fofoga o le Fono. Ua faamalo foi le onosai i lenei itula o le afiafi.

E talitonu o lenei Tulafono Tau Faaofi e le tele sau upu i ai. O le agaga moni o lou tulai atu o le fia faafetaia o le Afioga i le Minisita e tusa ai ma le Tulafono Tau Faaofi ona o le aano moni lava o le Tulafono Tau Faaofi, e talitonu le manatu o lo o i ai le puipuiga, o lo o i ai le upu lea o le prevention.

O le puipuiga mai faamai e pepesi ona o le auala e faamate ai manu nei ua masani ai lo tatou atunuu. A o le auala fou lea o le a faatinoina ai i mea mama ma mea lelei ua tapena lelei e pei o atunuu i fafo, ma talitonu ai foi tagata o lo o latou faatauina nei aano o manu fasi i le mama o le saunia o nei aano o manu fasi. E taua tele lo tatou matamata i ai pe a tatou agai i faalavelave ma mea faapena, pe tatou te o foi i faleoloa e faatau mai. O le agaga moni lena ma lou talitonuga, o le taua lea ia te au ma ou te talitonu o le a mama le faamateina o ia manu, ae e le mamafa ia te au le faapea tatou o e tai mai ni a tatou sua ina ia mama mai mea nei, e leai, e taua le soifua maloloina ina ia aua ne i pepesi se faamai. Atonu o i ina foi lea o le a toafimalie ai nisi o faamai o lo o aliali mai i uiga o lo o faatinoina e lo tatou atunuu i le fasi mateina o nei manu papalagi.

Ou te fautua atu e pei ona vevesi nei i le fefeu o le aano o le manu po o le malo o le aano o le manu. Ou te masalo e tolu lava mea e mafua ai ona le lelei le aano o le manu i le taumafa. Muamua, o le sese o le mea e fasi ai le manu. E tuli, tuli le povi ua le maua, e maua ane ua matua gase atoa e pei ona saunoa le Afioga i le Minisita. O auala na e fasi ai manu, e faamalolo lelei ma talisua i le po seia oo i le ao ona faatino loa lea.

O lona lua, o le sese o le vaega o le povi e te alu e faatau mai. Ona e te alu atu e fesili i le stew meat, a o le steak le mea e te manao ai, ona aumai lea a o la e fefeu.

O lona tolu, o le sese o le faleaiga e te alu e te taumafa ai. Vaai faleaiga lelei ia e i le taulaga e te saogalemu ai ma maua ai le soifua maloloina ma maua ai ma le tender steak. O mea uma ia e te silasila i ai. A e faatauina le steak e \$5 ma le \$20 e te le faitio. A e taumafa i le \$20 ia matua tender lelei, a o le a faapefea ona e maua se steak lelei pe a faapea e te alu atu totogi le \$5 ona e alu lea. E leai, o le mea lena e maua.

O le Tulafono Tau Faaofi lena, faafetai i lau Afioga i le Minisita, faamalo. Ona pau lava lau fautuaga, le taavale lea e fealuai i nuu i tua, ua tatau foi ona i ai se aisa malulu aua le feaveaiina o aano o manu fasi. Ma le isi mea e aofia ai i ina, e faapefea ona feaveai manu nei pe a uma ona fasi aua ua mama le mea e fasi ai? O lau fautuaga, e tatau foi ona malu lelei le tino o le manu mo le feaveaiga i le aumai mai Savaii, pe aumai mai tua i Apia, ia mautinoa o lo o i ai pepa iila vaetu le Maota e faatino ai, ona iloa lea ua atoatoa le auaunaga ma le Tulafono ma malu puipuia ai foi ma saogalemu le soifua maloloina.

Ma le faaaloalo tele.

FOFOGA FETALAI: Malo faafetai fesoasoani mai i le mataupu. O le a avatu le avanoa mulimuli i le sui usufono mo le Vaa o Fonoti ona tali ai loa lea o le Minisita.

Afioga TIALAVAEA FEA TIONISIO SEIGAFOLAVA (Vaa o Fonoti): Faafetai i lau Afioga i le Fofoga Fetalai mo le avanoa.

E momoli atu le faafetai i lau Afioga i le Minisita i lena fale fasi manu ona e talitonu o se faiga lena e faigofie ai ona lelei le saunia o manu fasi, aemaise mo le fofoga taumafa o le atunuu o le a mafai ai ona siaki po o i ai ni mai o maua ai povi nei. Ou te talitonu e oo mai lava i le taimi lena ou te le o malamalama po o i ai se isi o gasegase i le taumafaina o aano o manu fasi. Ou

te masalo afai e i ai nisi o gasegase ai, e le iloa po o le vaega lea e faapea mai e rare le meat ona latou te manaomia le rare meat.

O le fefeu o le povi ou te talitonu ona ou te fai atu ona o la e fai le matou fale aiga. E i ai lava local steak e tender ma o lea la ua ou malamalama nei ona o lea ua saunoa le Afioga i le Minisita mo Fesootaiga ma Faamatalaga Tekonolosi, o le taua o le aano o le povi o le tasi ma le afa tausaga. A o le tele lava o povi ou te masalo o le ala fefeu lea ona o le lapopoa o pulu ia e faaaoga.

O le kukaina lava ia o le steak, na i ai le afiafi na matou avatua ai le local meat ma kuka e le alii lea na te kukaina le steak i o i le hotel. Na matou test ina lea po o le a se ituaiga kuka e kuka ai faatasi le steak overseas ma le steak lea a tatou. E u ii lea ae na aumai lava e fefeu le tatou steak. O le matou hotel o la lava e faaaoga le overseas steak ona e malu toe tender i le taumafa, a o la lava e faaaoga ma le povi Samoa i isi kuka.

Ou te talitonu o le fale fasi manu lenei o le a faigofie ma tutusa ai le aano o le manu lea e maua ia tatou ma aano o manu mai fafo. Ou te piitia ai foi le finagalo o se tasi o sui usufono mo Salega, atonu o i ina e faalaitiiti ai le tatou import mai o manu mai fafo mo le faaaoga i le fofoga taumafa aua o lea o le a fai le tatou fale fasi manu. E momoli atu ai le faafetai i le Afioga i le Minisita, ae a outou manaomia ni povi mama toe lelei, e maua i Fagaloa. O matou povi ia e tataa tataa i lalo o mauga ia tataa i luga o le sami, taele ai toe o i uta, o lona uiga e matua mama lelei povi nei aua o la e maua le masina o le sami e faasusu ai, aua o le tele lava i tua, a oo i le afiafi ua o povi i tai i le sami, a oo i le po ona toe o ane foi lea i uta. Ia a outou manaomia la ni povi aano lelei, ia o lea e maua i lou itumalo. Manuia le Fono.

FOFOGA FETALAI: E maua fua le sui usufono mo Vaa o Fonoti, pe faatau?

Afioga Tialavea Fea Tionisio Seigafolava: E double le price, o lona uiga ona o le mamao.

FOFOGA FETALAI: Ia malo. Tulai maia lau Afioga i le Minisita, e manatu ua faaiu ai i i saunoga a sui usufono i tali faaiu ona tuu atu lea o le tatou fesili.

Afioga Hon LE MAMEA ROPATI: Faamalo faafetai, faafetai lava i le paia o Afioga i sui usufono sa saunoa i lenei Tulafono Tau Faaofi, ma ou te maua atu o le tele lava o saunoaga o le agaga faafetai ma o le mea tatau aua le puipui lelei o le soifua maloloina o le tatou atunuu, ma faasaoina mai i ni faamai e ono feaveai e mea nei o manupapalagi aemaise foi ituaiga manu o lo o faaaogaina aua le fofoga taumafa a le atunuu.

Ou te talitonu, ua maea foi ona ou tali atu i le tele o mea ia sa faafesili mai ai sui usufono, ma e momoli atu foi le faafetai i le fesoasoani mai. O le tele foi o nisi sui usufono ua faafetai mai i le Tulafono ma aumai foi nai a latou fautuaga i mea e tatau ona fai. O lea foi e faafofoga mai le matou Matagaluega, ia e faapea lava o le tatou vaa e fautele, ae talia ma le faafetai ia fautuaga lelei uma ua tuuina mai, ae tatou te fai silasila i le agai pea i luma o faamoemoe pei ona tuuina mai ai lenei Tulafono aua se puipuia lelei o le tatou atunuu mai nisi o pagatia e ono oo i ai i tulaga lava ia o faamai feaveai.

Ia manuia lau Afioga i le Fofoga Fetalai, manuia foi le usugafono taitasi i paia lasilasi o lenei Maota, aemaise foi o le faafofogaaga i le tapuaiga a lo tatou atunuu o lo o faafofoga mai.

E faapea foi Faauluuluga o Matagaluega ma officials o lo o mafai ona tatou usufono faatasi i lenei afaifi, ia manuia foi le toe taliu atu i aiga o lo o faamuli mai, ia malupuipua lo outou soifua ma lo tatou ola i aao alofa o le Atua, faafetai.

FOFOGA FETALAI: Malo faafetai saunoa i lau Afioga i le Minisita.

Na faamaonia le lafo ma faitauina le Tulafono Tau Faaofi o le Fasimateina o Manu ma le Faasoa Atu o Aano o Manufasi 2014 i lona faitauga faalua.

FOFOGA FETALAI: E tusa ai ma Tulafono Tumau o le a tuuina atu le Tulafono Tau Faaofi i le Komiti o le Soifua Maloloina, Galuega tau le Va Fealoai, Mataupu tau Lotoifale ma Atinae o Afioaga ma Agafesootai mo le iloiloaina ma toe lipoti mai i le Fono Aao i se Fonotaga o lumanai.

TULAFONO TAU FAAOFI O MAVAEGA TAUSI 2014 – faitauga faalua

FOFOGA FETALAI: Talu ai ua ou taulimaina le Tusi Faamaonia o le Tulaga Faanatinati ua maea ona sainia e Lana Afioga Mamalu i Le Ao o le Malo e uiga i le Tulafono Tau Faaofi lenei, o lea o le a alo atu loa le Fono Aao mo le faitauga faalua.

Tulai mai lau Afioga i le Minisita o Tupe.

Afioga Hon FAUMUINA TIATIA FAAOLATANE LIUGA: Lau Afioga i le Fofoga Fetalai ou te faatu le lafo, *Ina ia faitauina nei le Tulafono Tau Faaofi o Mavaega Tausi 2014 i lona faitauga faalua ma ou te fia tautala faamalamalama i ai.*

Faaluaina e le Minisita mo Fesootaiga ma Faamatalaga Tekonolosi, ma le Minisita mo Tina ma Tamaitai, Atinae o Nuu ma Afioaga ma Agafesootai.

FOFOGA FETALAI: Tulai mai lau Afioga i le Minisita o Tupe e saunoa faamalamalama.

Afioga Hon FAUMUINA TIATIA FAAOLATANE LIUGA: Lau Afioga i le Fofoga Fetalai ma le mamalu o lenei Maota, o le Tulafono lenei o se tasi foi lea o laasaga fou po o sauniuniga a le tatou Pulega o le SIFA, ina ia faateleina foi ma faaopopo se isi auala e saili ai ni manuia mo si o tatou atunuu. O lenei la Tulafono o se Tulafono e fou i ituaiga Tulafono nei, e ui lava o lea e i ai a tatou Tulafono o lo o i ai nei, ia a o le Tulafono lea i le tulaga ua matua atoatoa ona i ai ia manaoga faapitoa ina ia mafai ai ona faamalieina, e le gata o i latou e i totonu o le tatou atunuu, ae faapena foi ia i latou o le a finagalo e aumai a latou seleni e teuina i Mavaega Tausi faapenei Faava o Malo.

O lenei la Tulafono Tau Faaofi lau Afioga i le Fofoga Fetalai, o le a suia ai ia Tulafono 1975 ma le 1988 i le tulaga lea o le Mavaega Tausi po o Tausi Mavaega 1975 ma le Mavaega Faava o Malo 1998. E le o aafia i le Tulafono lea ia le Public Trust Office Act 1975, e tumau pea ia le Tulafono lena ae pei o Tulafono ia e lua e pei ona ou taua o le a faapena ona soloia pe afai o le a pasia lenei Tulafono. O le Tulafono fou lenei, ina ia mafai ona tele nisi o i latou e faaaogaina pe e omai foi e aumai a latou tupe e teu i Samoa i ituaiga pisinisi ia, e mafai ona faaliliuina po o le a tausia i gagana eseese, ina ia mafai ai e lenei Tulafono ona tuuina atu ni faatosina i mea nei o maketi faava o Malo, aemaise lava i vaega ia o lo o faia nei i Hong Kong ma Singapore, pei o vaega na o lea e fai lava i totonu o latou a latou fefaatauaiga ae o lo o i ai foi tagata ua fia saili nisi maketi e tuu i ai a latou seleni e teu ai i mea nei o pisinisi faa-Tausi Mavaega. I le tulaga lea e i ai le tatou Tulafono lea, o lo o taulai lava le faavaega o lenei Tulafono ina ia tatou manuia i le tulaga ua i ai nei ia Europa ma le Vasa Atalani, ona ua mafuli ina o ese mai ia le tele o i latou sa teu foi i ai a latou seleni po o tuu ai a latou seleni i tulaga faapisinisi i le auala lea o Mavaega Tausi. I le tulaga la ma le faamoemoe o le tatou Tulafono lea, o lo o taumafai ina ia tatou vaavaai i maketi i Saina, o Taiwan ia ma Singapore ma Hong Kong pei ona ou taua o South Africa, ia e faapena lo tatou vaavaai atu ia atoa ai foi ma le sasae tutotonu. O le mafuaaga lena o lea pei ua tusia ai lenei Tulafono, ina ia mafai e lenei Tulafono ona faaoga uma ia ituaiga gagana ia mafai ai ona tatou maua le maketi i tua atu o Asia ma isi Regions tai pei o le Sasae Totonu, o le itu i Saute o Amerika ma faapea foi ma nisi o tatou pisinisi, o le a finagalo e teu faatasia a latou tupe i mavaega tausii faapenei. Pei lava o le faamoemoe lena ina ia mafai ona tosina mai i latou o lo o tele a latou oa ma i latou e maumea i le lalolagi, ina ia mafai i pisinisi tau tupe e faaoga i ai ia auunaga tau tupe Faava o Malo e mafai e Samoa ona ofo atu, e auala i le auunaga po o le tatou SIFA, le Pulega o tatou Tupe Faava o Malo.

Lau Afioga i le Fofoga Fetalai, o le faamoemoe lena o lenei Tulafono ina ia mafai ona offer atu e Samoa pe a faapea e mafai ona tatou avatua nisi faatosina e sili atu i lo i mea o lo o faia e isi Financial Centres ona faapena foi lea ona agaigai mai ia tagata mauoa po o i latou e tele mea, e faaoga ai foi lenei faamoemoe ina ia tele ai ni a tatou tupe ma maua ai foi galuega mo tatou tagata. O le faamoemoe lava o lenei Tulafono, ia mafai ai ona aumai nisi kamupani e fai ni a latou ofisa i Samoa nei, e le gata o le a aumai ai foi i latou e fai ma tausii mavaega, ia po o i latou foi o le a faaaogaina le au mauoa lea e faatinoina ai le latou faamoemoe, e faapena foi ona maua ai galuega mo tatou tagata. E le gata la o le a mafai ai foi ona faaopoopo ai ia tupe i lo tatou atunuu, ae o le a avea foi ma auala e maua ai galuega mo le fanau o lo o tausaili ia ni galuega, o le tasi lena vaega taua. O le fesili e ono tulai mai, pe o i ai ni puipuiga mo auala o lo o faaaogaina e nisi o le aufaipisinisi faasolitulafono? Lau Afioga i le Fofoga Fetalai, ia ua i ai a tatou Tulafono, o lea foi o lo o i ai ia le Tulafono i le Counter Terrorism Act lea e...ou te iloa foi e oo i ai i se taimi o lenei foi Fonotaga ia le faasologa, ae o lo o i ai lava a tatou Tulafono e mafai ona puipuia ai ia le tulaga faasolitulafono e ono faaaogaina e nisi, ma e o le fiafiaga lena o lea e i ai le faamoemoe o lo o tumau pea Samoa i le tulaga lelei i ana faiga pisinisi o auala nei o le tuuina mai o Pisinisi Faava o Malo, e le gata e manuia ai lo tatou atunuu i galuega, ae faapena foi ona faamalositia ai ia le galulue faatasi o le Malo e ala i le SIFA

ia ma le vaega o le Private Sector. Pei o le faamoemoe, ina ia faaogaina so o se vaega o tatou auaunaga e auala atu i Faalapotopotoga a lo tatou Malo ina ia manuia lo tatou atunuu ma ia faatupulaia ai pea galuega mo tatou tagata.

Lau Afioga i le Fofoga Fetalai, o le faamoemoe lena o lenei Tulafono, ma lou faaaloalo lava.

FOFOGA FETALAI: Malo, faafetai saunoa faamalamalama i lau Afioga i le Minisita o Tupe e a ia lenei Tulafono taua. Ma e manatu foi o lea ua tatala atu le avanoa, o lenei Tulafono sa faia i ai le debriefing a le tatou Palemene nei – ma e manatu ua taua foi le faamalamalama i lea aso na afio mai ai le faauluuluga o le Matagaluega ma tolaulau lelei ia aiaiga ma mea uma na mafua ai ona faufau lenei Tulafono. Ia o le taimi la lenei, o lea o le a tatala le ie o auafa, tulai mai sui usufono mamalu e faailo o outou finagalo, i nisi foi o mea ua fia faamanatu ma faataua ma tuuina atu loa i le tulaga aloaia aua le fautuaina o le faamautuina o lenei Tulafono. Tulai mai se tasi o sui usufono mo Salega, Afioga Afualo Wood Utu Salele.

Afioga AFUALO WOOD UTU SALELE: Faafetai i lau Afioga i le Fofoga Fetalai, e momoli atu le faafetai tele lava i le Afioga i le Minisita, ua faitau ma le totoa i le Tulafono, o lea ua maioio lelei o lea e taumafai le Tulafono e tapue mai ia le tele o isi faamanuiaga ia e le o mafai ona maua i le taimi lenei ona e le o i ai se Tulafono faapea, ae o se laasaga lelei lea ona o le atinae ona o le tatou Faletupe lea o lo o tele le tamaoaiga lea e fesoasoani mai ai i le atunuu, ae ua aoga foi le Tulafono lea ina ia mautinoa lelei ai, ua malupuipua ia aseta aemaise lava i latou nei o lo o faafaigaluega ia o latou tamaoaiga iinei i le tatou Faletupe, ona o le tulaga lea sa i ai e lei malu lelei, ae o lea la ua aoga le Tulafono lea – ma o le a avea foi lenei Tulafono o se vaega e faatosina mai ai ia le tele o nisi aufaipisinisi ia po o i latou foi o lo o lava le tamaoaiga ina ia faafaigaluega lo latou tamaoaiga iinei i Samoa. O se vaega lelei, ae o le fautuaga i lau Afioga i le Minisita, ona o lea lava ua agai le ofisa aemaise foi o le Ofisa o le Loia Sili ina ia mautinoa ma le Faletupe Tutotonu, ua tapena uma isi vaega o Tulafono ia malupuipua pea le igoa o le tatou atunuu, ona e moni lava o la e i ai faitioga o la e faitio mai, a o lea ou te talitonu lava au ia o lea e malupuipua i lalo o le Tulafono a tatou, ona e i ai le tiute fai a tatou ma le nafa tausī, ona o meatotino a i latou foi o lea ua aumai le faatuatuaga e faafailele ia lo latou tamaoaiga iinei i Samoa.

O le agaga faafetai lea ae ua malamalama i le Tulafono mo le taoto mai ai i lenei vaiata aemaise foi o le tapenaina o le tamaoaiga o le tatou atunuu. Faafetai.

FOFOGA FETALAI: Malo, faafetai saunoa i sui usufono mamalu. Tulai mai le sui usufono mo Faleata Sisifo.

Tofa LEALAILEPULE RIMONI AIAFI: Faafetai i lau Afioga mo le avanoa o lenei foi po i le tuneva o le po.

O le Tulafono Tau Faaofi e 91 ona vaega, a o le tele o vaega o le Tulafono e ta te le malamalama ai, ona o le Tulafono e very pei e technical foi lele i mea tau.....ae faafetai lava o lea ua faitau faitau, ia o lea ua manino, o le Tulafono e faapitoa ia i latou o fia teu mai a latou mavaega tausī aemaise lava i le au milionea foi ia i atunuu i fafo e faaoga ai le tatou SIFA, ia ma nisi foi o tatou

ua ausia lea tulaga, aua sa i ai le fenumiaiga foi lele ma le tatou Tausi Mavaega i inei, ae faafetai la o lea e manino lava, o le faa-Samoa o le vaega lea mai fafo, Mavaega Tausi, a o tatou i inei, o le Tausi Mavaega, lea tatou te tau agai i ai e fai a tatou uili ia ma uili a tatou aitalafu a nai a tatou fanau, ina ne i ua feola ane sosola ae le tologia. Ae o le mea la lea, o le faatosinaina mai o vaega ia mai fafo. E le o po se lilo i le sao o le SIFA i le tamaoaiga o Samoa, e le gata i le Tala o le Tupe a le Malo, ia o taaloga le tatou au o le Manu Samoa, ma le anoanoai o nisi o atinae o lo o fesoasoani malosi ai le SIFA. E le o po foi se lilo i le tele o le taumafaiga a mai fafo aemaise lava i atunuu ia i Amerika, Peretania lea ua soso atu ai ma Ausetalia, le taumafai e close down taumafai e tapuni ia Financial Centres laiti ia aemaise lava i atunuu laiti ia e i ai tatou le Karepiane ma.....a o vaega nei, o lea ua tele ina fesoasoani tele i le tamaoaiga o atunuu nei. O le pau lava le mea lea e moomia e i latou nei, ia saogalemu a latou mavaega tausii ma a latou investments. A o le tatou matafaioi ia tatou mautinoa, e le o sao mai ai i i ma ni tupe foi ia palapala money laundering, e ala i a tatou tulafono e i ai. O lea lava e tatou te faitau i pepa i le tele o aso, o lea ua amata ona liki mai i tua igoa o nai tagata ia lea e faaaogaina foi ia auaunaga. Ia o taumafaiga na a isi atunuu tetele ia ina ia faailoa mai, e le saogalemu ma le lē lelei ia ia ituaiga faletupe foi ia ia ituaiga vaega e tausii ai a latou tupe. Ae o lea tatou te iloa ma mautinoa e tele le sao o vaega ia, ma o mea o lo o faia foi i le tele o atunuu ma e tatau foi ona tatou puipui i ai. I lau la faamatalaga, afai o lenei Tulafono o le a faaopoopoina ai ni tupe maua ma ni tagata e invest mai i totonu o Samoa ma teuina a latou tupe ma tulaga faapena e faaoga ai le SIFA, ia e ave foi le lagolago a lenei sui usufono, o se mea aoga tele, aua o lea e tele ina tele foi le sao o lenei Matagaluega i le tele o a tatou galuega fai. Ma le faaloalo lava faafetai.

FOFOGA FETALAI: Malo faafetai i le tatou Tulafono. Tulai mai le sui usufono mo Faleata Sasae.

Tofa AVEAU TUALA LEPALE NIKO PALAMO: Faafetai lava i lau Afioga, e momoli atu foi le faamalo i le paia ma le mamalu o le Palemene, aemaise foi i Minisita, aemaise foi le tapuai a Faauluuluga o Matagaluega.

E pei ona saunoa le sui usufono ua tuanai atu nei, o le tasi lenei Tulafono Tau Faaofi tele, a faitau atu i le faa-Samoa ua atili ai ona le malamalama, a faitau atu i le faa-Peretania i faaupuga. Ae i lou malamalamaaga i le Tulafono lenei, o au e ese lou taliaina o le Tulafono Tau Faaofi lenei, ona pei lava ona saunoa le Afioga i le Minisita, e tasi lenei alamanuia o le a manuia ai lo tatou atunuu, pau lava le mea ia fai fuafua pei ona saunoa ia le sui usufono lea ua tuanai nei i mea foi ia o tupe palapala. E ala ona ou fiafia i le ituaiga nei foi polokalame ma le Tulafono lenei, e i ai atunuu foi ia i fafo, e leai ma se tamaoaiga e leai ni a latou export foi ia e ave, e pau lava lea o le mea e ola ai, o polokalame faapenei. E leai foi se mea tatou te popole ai fua i atunuu tetele o lo o faapeapea mai ia tatou o tatou lea e a, o Tulafono nei, e leai se mea e tatou te popole ai. Pau lava le mea e tatou te tilotilo i ai o lau fautuaga i le SIFA ma le vaega lea, ia lelei le background check o tagata nei, ae ia matua aumai, matua aumai, aua o i e foia ai foi le faafitauli lea o le leai o ni tagata tafafao maimoa mai i totonu o le tatou atunuu, tasi lenei vaega o le a foia ai lenei vaega. Masalo a tagai i kamupani na lesitala e le SIFA i se vaitaimi atu i

tua te i ua sese lau maitau, toetiiti oo i le 2,000, ia a o atunuu nei e i ai Cook Island lea e tele, toetiiti lava 4,000 ia kamupani ia e lesitala i lalo o mea faapenei. E faapena o Switzerland ia o lea ua tatou iloa, e amata mai lava i le au Isaraelu na o tuu i ai a latou tupe e oo mai nei lava e i ai lava mea faapenei la e mauoa ai foi na atunuu. O lea la ou te tatalo atu ai i lau Afioga i le Minisita, faavavevave le Tulafono lenei, e faapena foi i le SIFA ma le mamalu o le tatou Matagaluega, ia tailo i ai, e i ai lava ia afaina e pei ona saunoa le Afioga i le sui usufono lea ua tea atu nei le sui usufono mo Faleata Sisifo, o mea lava ia e faapea mai ai atunuu ia i fafo, o le money laundering o tupe foi ia palapala foi ia e aumai i inei, ae ou te iloa o lo o i ai le tomai i totonu o le tatou Matagaluega, ua leva foi ona...aia e le fou foi le SIFA, e tele foi le sao o le SIFA ua i ai i totonu o le tatou atunuu, e le gata i taaloga e pei ona saunoa ai ia a o le atinae, a tagai foi i le Tala o le Tupe, e tasi foi lea Faalapotopotoga ua tele lona sao i totonu o le tamaoaiga o le tatou atunuu. O lea ou te faafetaia ai le Matagaluga i le aumaia o lenei Tulafono Tau Faaofi, ia ma o lau fautuaga, faavavevave le tatou Tulafono. ‘Aua foi tatou te manatu fua i le tele o faitioga a atunuu tetele e faafefefefe mai ia tatou, aua a tele loa a tatou tupe maua i i le vaega lea, manuia le tatou atunuu, manuia le tele o atinae a lo tatou atunuu i totonu o nei vaega, ona ua tele atunuu laiti o le lalolagi ua manuia i lenei foi Tulafono faapenei. O lou manatu lea ma le faaaloalo lava i lau Afioga i le Fofoga Fetalai.

FOFOGA FETALAI: Malo faafetai fesoasoani i le tatou Tulafono. Ia e manatu ua matua malamalama uma sui usufono.

Afioga Hon Palusalua Faapo II: Lau Afioga i le Fofoga Fetalai....

FOFOGA FETALAI: Ia e tuu atu le avanoa mulimuli i le Afioga i le Taitai o le Itu Agai, tulai mai le Taitai o le Itu Agai.

Afioga Hon PALUSALUA FAAPO II: E puupuu lava foi se manatu, atonu e tasi lenei Faalapotopotoga a le Malo o lea ua sausaunoa lenei itu, e tele o lona sao i le tamaoaiga, o le ala lea o lou tulai atu, o le SIFA pei foi ona taumafai atu le Taitaifono o le Komiti o Tupe Maua, ina ia pei o le SIFA isi faalapotopotoga ia a lo tatou Malo, lea na o tupe alu, alu, alu, a o le SIFA, o le matua tele o le sao. E pau lava lea lau Afioga i le Fofoga Fetalai, pei o le Tusi Paia le mafiafia o le Tulafono. O lea ua sausaunoa lenei itu i le popolega ina ne i i ai ni tupe lē lelei e sao mai ai, a o le fesili lau Afioga i le Fofoga Fetalai, aisea ua faanatinati ai faapea? O le Tulafono e tatau ona iloilo lelei, iloilo lelei e se Komiti, aua o lea na ou faalogologo nei i saunoaga a le Minisita, e lei iloa lava po o le a le mafuaaga e ala ai ona faatopetope, po o le faatopetope ne i te i ua ave tupe a le au milionea i isi atunuu? A o lou popolega lena, leaga e tele le Tulafono a o lea e faanatinati. O lou talitonuga, sa tatau ona ave le Tulafono e lauliliu lelei e le Komiti o le Palemene, ina ia aua ne i i ai se mea e sao – ma o le tasi lea mea o lea e tupu, Tulafono, e pasia nei, ae aumai taeao le teuteuga, ioe, ia na teuteu atu ai lava lea. E mafua aisea? Le lava le taimi e lauliliuina ai Tulafono. A o le agaga lea e aumai nei i i, ia maua mai ni tupe, ia lelei, e manaomia e le atunuu le tupe aua ana atinae, aua ne i o tatou naunau i le lupe, ae galo ai le gata la e faatalitali mai, ne i te i ua tatou naunau tele i le tupe, ae galo ai isi solitulafono e sau i totonu o le

Tulafono lenei. O le uiga o sau faamatalaga, ese le taua o le SIFA, ae ia faifai fuafua lelei, ne i te i ua maimau le Faalapotopotoga, ona o le tatou le iloiloina lelei o le Tulafono lenei. O le mea la lea lau Afioga i le Fofoga Fetalai.....

Tofa Hon Fonotoe Nuafesili Pierre Laufo: Lau Afioga i le Fofoga Fetalai, o le mea e fia faasao.

FOFOGA FETALAI: Ia malie le sui usufono mamalu, o lea lava sa tuu atu le avanoa, sei tulai mai le Afioga i le Sui Palemia.

Tofa Hon Fonotoe Nuafesili Pierre Laufo: O lea lava ua tatou masani i faiga o a tatou galuega i le faatinoga e faapena, o Tulafono uma lava e oo mai i le Maota ia ona faapena laia ona tatou lauliliuina ma pasia, a alu alu foi ua i ai se taimi e manaomia ai ia ni teuteuga, ia ona faapena foi laia ona toe teuteu. O tulaga masani, e le o se mea fou e le o se mea leaga foi, e faapena ia tulaga.....aemaise lava la i mea o pisinisi, mea o faiga faa.....foi lea o mea tau Investment, ia o tupe foi i le fesoloaiga o tupe ma le faafaigaluegaina o tupe, e faapena ona vave suiga e oo mai. Ma o le mea moni lava, o le faigata ia ona tatou keep up i suiga e oo mai i mea o...aemaise lava la i mea faapenei, e tatau lava la ona fai ma tatou toe tilotilo, a oo foi la ina manaomia le teuteuga, ia ona aumai foi lea o ni teuteuga i luma o le Maota, ae le faapea e aumai nei ae teuteu taeao. E leai ni tulafono e aumai nei ae toe teuteu taeao, ae i ai le taimi e toe silasila lelei. O le Tulafono Tau Faaofi lenei, ua matua atoatoa lelei. O lea e pei ona saunoa le Afioga i le Minisita, ua atoatoa lelei, o lona faatinoga, a la e i ai le Ofisa, na e galulue ai i latou ua tomai faapitoa i le faatinoga o le Tulafono lenei. O le latou foi fautuaga pe a faapea e manaomia le teuteuga, ia ona aumai foi lea o fautuaga ia ona tatou toe silasila foi lea i ai ma teuteu. E le faapea o le a uma ai i i. A o le tele o a tatou Tulafono ia e oo mai i le Maota, o lea lava e fai ona teuteuga, o le tele o isi Tulafono lea na pasia ananafi ma le aso mo Tulafono Toe Teuteu, ioe, o le tulaga lena e i ai le tatou faatinoga o le tatou galuega.

FOFOGA FETALAI: Malo. Ia tulai mai lau Afioga i le....

Afioga Tufuga Gafaleata Faitua (Vaisigano Nu. 1): Lau Afioga o se mea e fia malamalama.

FOFOGA FETALAI: Malie lau Afioga i le Taitai o le Itu Agai....

Afioga Hon PALUSALUE FAAPO II: E fia malamalama ia au po o?

FOFOGA FETALAI: Tulai mai le sui usufono mamalu mo Vaisigano Nu. 1.

Afioga Tufuga Gafaleata Faitua: Leai o lea e maitau atu foi...ua uma ona saunoa le sui usufono mo Faleata Sasae ia faavavevave le Tulafono aua e manuia ai le atunuu, a o lea ua saunoa mai le Taitai o le latou itu, e faatelegese. O lea la ou te fia malamalama ai, pe aisea le mea ua faapea ai le latou itu? Faafetai.

FOFOGA FETALAI: Ia o lona uiga e fai le tatou Semina o la e momoe isi. Ia ae tulai mai lau Afioga i le Taitai o le Itu Agai e faaauau mai le saunoaga.

Afioga Hon PALUSALUE FAAPO II: Ia lau Afioga, o le mea lava e naunau i ai ma faatatope, a, o lea tou te silafia, a, aua e oo i mea tau tupe.....

FOFOGA FETALAI: Ia malie le sui usufono, sa faapea ua e finagalo malie i le faamalamalama a le Sui Palemia, aua o lea lava sa taumafai atu o lo o manino ma malamalama faiga faavae, silasila foi i le tatou Semina na saunoa ai le Faaululuga o le Matagaluega, ua lua tausaga o taumafai mai lenei Tulafono, e le o se Tulafono na faatoa tagofia nei, e lei tago faatumutumulima foi le Matagaluega, ma o lea ou te maitau, o le afioga i le tamaitai pule ma loia o lo o aafia i le mataupu lenei, o tagata ua matua lava lo latou silafia i mea tau financial institution. O mea foi ia e i ai a outou atugaluga i isi vaega o le Tulafono, ua uma uma ona tapu, o a tatou Criminal Law, Criminal Act, o lo o ua matua sauni le tatou Money Laundering Act, o lo o matua i ai masini tamea tetele e tata ai tagata faapenei pe a omai i le atunuu, vaeane le paia o le Maota. Ae malie ia lau Afioga i le Taitai o le Itu Agai, ou te manatu ua malamalama o lea ua saina Lana Afioga Mamalu O Le Ao o le Malo i le Tulaga Faanatinati, e le mafai ona toe solomuli le tatou taavale, o lea ua i finagalo o le Minisita ma finagalo o le Matagaluega ua tataua ona faatino, e le faatali le taimi ma le tai ia tatou. E le na o tatou o agai i ai investors nei. A tatou tuai taeao, e pue e isi atunuu, a ia tulitulimatagau le faamoemoe o le Matagaluega ina ia vave ona taunuu mai, vave ona manino ma vave ona folasia ia latou, the most secure island in the world, is Samoa. O lona uiga e tataua ona fai le mea lena ina ia tau i tagata nei investors, they were secured e omai e invest tupe nei.

Tulai mai lau Afioga i le Minisita o Tupe se i faamalamalama ona toe tuu atu lea o le avanoa pe a faapea e te le fia malamalama.

Afioga Hon FAUMUINA TIATIA FAAOLATANE LIUGA: Lau Afioga i le Fofoga Fetalai, o lea ua e saunoa tonu lava, o le Tulafono Tau Faaofi lenei, e lei faapaole ona saunia, ua loa taimi o tulituliloa, e le gata o le matou foi pitolaau, a o le pitolaau a i latou o lo o fesoasoani mai i atunuu Asia ina ia taumafai e faapotopoto le tulaga lea.

Na oo mai foi iinei le kamupani loia lea o lo o tatou faifaimea faatasi i Asia ma fai ai le workshop i Savaii sa ma auai faatasi atu i ai ma le Palemia i se tasi o weekend i le faamalamalamaina lava o le Tulafono Tau Faaofi lea, lea foi na aumai ave i le Ofisa o le Loia Sili ma galulue ai foi ma se loia sinia mai Peretania i le taumafaiga e tuufaatasi le Tulafono Tau Faaofi lea. Ma o le Tulafono Tau Faaofi foi lea e pei lava ona mafiafia i i, o le Tulafono lea pe fai sau mavaega pe leai sau mavaega, o le Tulafono Tau Faaofi lea e faamanino ai, e alu lava au meatotino po o au oa i lau fanau po o lou aiga. Pe e te maliu e lei faia sau mavaega, e faatino lava i le Tulafono Tau Faaofi lea, ua uma ona aiaia ai tulaga uma e puipuia ai tagata e ona oa, puipui ai le atunuu o lo o fai ai pisinisi. E pei lava ona ou fai atu o le Tulafono Tau Faaofi lea, o lea foi e i ai ma nisi Tulafono ua puipuia ai. O le mea lea e taumafai i ai atunuu lapopoa e pei lava foi ona ou lauga ai i Jakarta i tausaga ua tea, o lea ua taumafai atunuu lapopoa e toe foi atu financial centres ia latou. O lona

uiga ua mananao e toe tuu atu tatou i le taimi e faakoloneina ai tatou. E leai ua tatou tutoatasi. O Samoa, e laitiiti le risk, e leai ni piliona o teuina i inei e finance ai terrorist. O lona uiga o tatou e almost zero risk i le aumaiga o tupe faava o Malo i inei, aua e le lava se tau o se loketi i tupe ia e teu faavaitaimi ia tatou. Ma lou faaaloalo lava lau Afioga.

FOFOGA FETALAI: Malo. Ia tulai maia lau Afioga i le Taitai o le Itu Agai e faaiu mai o lona foi e taua le fautuaga.

Afioga Hon PALUSALUE FAAPO II: Ia, e leai, mo le agai i luma, e tatau ona silasila i ai lau Afioga i le Fofoga Fetalai ma le mamalu o lenei Maota i Tulafono Tau Faaofi nei aua ana faapea e saunoa mai nei le Minisita, a le lisi lea o tagata e fia aumai, tatope le Tulafono Tau Faaofi ia vave ai ona aumai, a? Leaga e i ai foi isi Tulafono faapea o lea o le a fai le tatou stock exchange. Ia e oo lava i le aso e leai se mea. O le mea lea e ala ai ona ou fai atu lau Afioga.

FOFOGA FETALAI: Ia malie lau Afioga i le Taitai o le Itu Agai, o lea o le a faamalamalama le tulaga lea i le financial centre and stock exchange. O le matimatiga lona o le amataga o mea na e lua.

Tulai mai lau Afioga i le Minisita o Tupe.

Afioga Hon FAUMUINA TIATIA FAAOLATANE LIUGA: Lau Afioga i le Fofoga Fetalai, o lea e fai mai ou te sau e avatu e faaali atu le lisi, e le mafai ona faaalua se lisi pe a le uma le product lea. O le product lea o la e faatali ma ii ai tagata pe fia omai pe leai. O le financial centre po o le financial exchange, a lea ua i ai le UTOS, o lea ua amata i le UTOS, o lea foi e invest ai le SIFA i totonu o le UTOS, that is a domestic arms o le stock exchange. Ma lou faaaloalo lava.

FOFOGA FETALAI: Tulai mai le sui usufono mamalu.

Afioga Hon PALUSALUE FAAPO II: Ua uma foi sou manatu. Ae na pau lava le mea, ia talosia ia manuia le Tulafono Tau Faaofi. Ia manuia ae aua nei i ai ni faafitauli e tulai mai, leaga o Samoa o le igoa pele tatou te faapelepele i ai, aemaise lava ituaiga invest nei. O le mea lea lau Afioga i le Fofoga Fetalai, na ona tuu atu lava o fautuaga, e tele tele le Tulafono Tau Faaofi, a ia manuia lau Tulafono Tau Faaofi lau Afioga. Faafetai mo le avanoa.

FOFOGA FETALAI: Faafetai mo finagalo faaalua o sui usufono mamalu. Faafetai foi i le Afioga i le Taitai o le Itu Agai. Ia, e leai lava se faiva e asa ma se maumau, ae taua fautuaga e tuuina atu, po o fea lava e aga i ai tu ma aga o le tatou Tulafono Tau Faaofi lenei, ae talitonu ua lava tapena ma lava taoso le Matagaluega, aemaise le Faalapotopotoga o le SIFA ua molimauiina le tele o lona sao taua i totonu o le atunuu.

Na faamaonia le lafo ma faitauina le Tulafono Tau Faaofi o Mavaega Tausi 2014 i lona faitauga faalua.

**TULAFONO TAU FAAOFI O TEUTEUGA O LE TULAFONO O
KAMUPANI FAAVA O MALO A SAMOA 2014 – faitauga faalua**

FOFOGA FETALAI: Talu ai ua ou taulimaina le Tusi Faamaonia o le Tulaga Faanatinati ma ua maea foi ona sainia e Lana Afioga Mamalu O Le Ao o le Malo e uiga i le Tulafono Tau Faaofi lenei, o lea o le a alo atu loa le Fono Aoa mo le faitauga faalua.

Tulai mai lau Afioga i le Minisita o Tupe.

Afioga Hon FAUMUINA TIATIA FAAOLATANE LIUGA: Lau Afioga i le Fofoga Fetalai ou te faatu le lafo, *Ina ia faitauina nei le Tulafono Tau Faaofi o Teuteuga o Kamupani Faava o Malo 2014 i lona faitauga faalua ma ou te fia tautala faamalamalama i ai.*

Faaluuina e le Sui Palemia ma le Minisita mo Tina ma Tamaitai, Atinae o Nuu ma Afioga ma Agafesootai.

FOFOGA FETALAI: Ia, tulai maia lau Afioga i le Minisita o Tupe e saunoa faamalamalama i Tulafono Tau Faaofi.

Afioga Hon FAUMUINA TIATIA FAAOLATANE LIUGA: Lau Afioga i le Fofoga Fetalai ma le mamalu o lenei Palemene, o teuteuga ia na o le lua lava vaega e moomia, e pei o le o le Phase 1 review o le Peer Review Group, o le see atu ai o tatou i le tulaga foi lea o le avea ai ma sui auai o le Global Forum a atunuu ia o lo o faifaimea faatasi ma le OECD e toe lua lava mea ia e totoe lea na mana'o ia toe amend ai le Tulafono, ia iloa le lisi o i latou o lo o fai pisinisi iinei ma ia manino foi le tausia o a latou... ia lelei ona tausia a latou tusi o mea tau tupe, ma ia mafai ona submit atu pe a moomia a latou financial statements pe a moomia e tatou vaega ia o lo o siakia po o i ai ni kamupani o lo o faia ni tulaga faasolitulafono i totonu o jurisdiction e pei o Samoa nei.

Na pau ia o suiga e lua lau Afioga o le amendment lea, ina ia mafai ai ona toe faaleleia le Tulafono o lo o i ai nei mo le Pulega o le SIFA. Ma lou faaloalo lava.

FOFOGA FETALAI: Malo faafetai. Ua avanoa le tatou Maota o lea e lava le tatou taimi. Tulai mai le sui usufono mo Aana Alofi Nu.3.

Afioga TOEOLESULUSULU CEDRIC POSE SALESA SCHUSTER: Faafetai lau Afioga i le Fofoga Fetalai mo le avanoa. E laitiiti lava si faafesili i lau Afioga i le Fofoga Fetalai, ona o le Tulafono Tau Faaofi out e talitonu o se Tulafono taua ona o lea e maitau atu i le tausisiga o aiaiga foi faava o Malo. Na pau le faafesili lau Afioga i le Fofoga Fetalai, i le Tulafono Tau Faaofi lea, e na o kamupani o lea e resitala i le SIFA pe tatala foi mo pisinisi uma i totonu o Samoa e le o resitala i le SIFA le release ina o information uma ia pen a o kamupani o lea e resitala i lalo o le SIFA faamolemole.

FOFOGA FETALAI: Tulai mai lau Afioga i le Minisita o Tupe.

Afioga Hon FAUMUINA TIATIA FAAOLATANE LIUGA: Lau Afioga i le Fofoga Fetalai, e faafetai atu i le sui usufono mo le faafesili. E na o i latou lava mai fafo o lo o resitala i lalo o pisinisi o teugatupe faava o Malo. Ma lou faaaloalo lava.

FOFOGA FETALAI: Ia, e manatu e leai se isi sui usufono e fia saunoa, e tasi foi lenei mataupu sa talanoaina i le tatou semina. O le aoga lena o tatou semina nei e fai e matuai malamalama uma ai, e lelei lena e manino ai ma sagatonu lau o le fo i manatu ma lagona ma finagalo.

Na faamaonia le lafo ma faitauina le Tulafono Tau Faaofi o Teuteuga o le Tulafono o Kamupani Faava o Malo a Samoa 2014 i lona faitauga faalua.

TULAFONO TAU FAAOFI E TAOFIA AI FAIGA FAATERORISI 2014 – faitauga faalua

FOFOGA FETALAI: Talu ai ua ou taulimaina nei le Tusi Faamaonia o le Tulaga Faanatinati ua uma ona sainia e Lana Afioga Mamalu O Le Ao o le Malo e uiga i le Tulafono Tau Faaofi lenei, o lea o le a alo atu loa le Fono Aoao i lona faitauga faalua.

Tulai mai lau Afioga i le Minisita mo Leoleo ma Falepuipui.

Afioga Hon SALA FATA LISATI PINATI: Lau Afioga i le Fofoga Fetalai, sa ou manatu lava faapea o taeao o le a tuu i ai lenei Tulafono Tau Faaofi, ae ui i lea leaga e faigata o le tulaga faanatinati. O le ala foi lea o le a taumafai atu ai se leo o lenei sui usufono.

Lau Afioga i le Fofoga Fetalai ou te faatu le lafo, *Ina ia faitauina nei le Tulafono Tau Faaofi e Taofia ai Faiga Faaterorisi 2014 i lona faitauga faalua ma ou te fia tautala faamalamalama i ai.*

Faalua e le Minisita mo Galuega, Felauaiga ma Atinae Eeseese ma le Minisita mo Punaoa Faalenatura ma le Siosiomaga.

FAAIUGA A LE FOFOGA FETALAI

FOFOGA FETALAI: Ou te faamalulu atu i lau Afioga i le Minisita, ona ou te talitonu o lea ua tatou tulalata i le tatou taimi malolo, ma ua fetai lelei ma lau saunoaga o le a e sasau muamua ai i le taeao a taeao ma amata ai le tatou Fono, leaga o mea faaterorisi e le tatau ona faia i lenei tuneva o le po ona o taimi e feoi ai tagata faapa pomu ma tagata le migao ma faatupu faalavelave i le atunuu. O lona uiga e tatau ona feala uma mafaufau o le Maota ina ia aua ne i i ai se mea e tasi e faaletonu i lau Tulafono Faanatinati.

E momoli atu le faafetai tele i lenei itula afiafi. E talitonu le faamoemoe o lea ua tatou tini tauao i le tatou taimi malolo, e faamalo atu ai i le tatou Maota. E talitonu ua malulu le Maota nei, ae o lea lava o lo o faatasi mai le

paia ma le mamalu o le Maota ona o lo outou naunau aua le faaaauina o a tatou galuega. Faafetai usufono, faafetai le tomanatu, faafetai foi i le tofa saili, le tofa mau ma le tofa tatala. E talitonu ua tele ma anoanoai le tatou galuega ua fai i lenei aso.

E momoli atu le agaga faafetai tele i le Afioga i le Palemia ma le Kapeneta aemaise foi lea tala-na-atoa i le Taitai o le Itu Agai ma sui usufono mamalu uma o le Maota Fono. O a foi upu ma suaga a le vaatele i lenei itula afiafi, o se upu ua laavale ma le tau tamalii i le faafofoga mai a Samoa, matou te talitonu o lau tapuaiga e iu ai ma le manuia mea uma. O oe lava o le atua moeao ma o le atua moepo i lenei Maota a o alo i le sailiga tofa aua se manuia o le atunuu - e momoli atu ai le agaga faafetai tele. O se tasi lenei o faaiuga a le Fofoga Fetalai e tatau ona tuuina atu i le afiafi lenei ina ia nofouta uma i ai le paia ma le mamalu o le Maota.

Mo le silafia e tuuina atu sao le talosaga lenei i Afioga i Taitaifono o Komiti Filifilia. Ua ou tuuina atu le Faaiuga e faapenei; ia finagalo malilie o Tulafono Tau Faaofi uma ua tuuina atu i Komiti Filifilia i le aso ma le aso ananafi, ia toe lipoti uma mai i le Fono Aoao i le masina o Iuni 2014. Ua ou talosaga atu ona o le agaga ia aua ne i toe toalia galuega o le Fono lenei o lo o tatou taumafai ai e faatopetope a tatou galuega ona o le tele o a tatou galuega na tuua. O lea ua ou tatalo atu ai o lo o i ai le lua masina. O a tatou Tulafono Tau Faaofi uma ia na tuuina atu i aao o Komiti ananei ma ananafi, e tatau ona toe lipoti mai i le Fonotaga ia Iuni. O le agaga lea ina ia aua ne i toe faaletonu pe tuai a tatou Fono, ae ia tatou alo i le autafeloa ina ia faataunuuina le tele ma le anoanoai o a tatou galuega tuua.

A o le i tolopoina le Fono i lenei itula afiafi, e faigata foi o lea sa lato i le ea ma lato i le tai le Minisita o Tausala o le atunuu, o lea faatoa tatou toe feiloai ma tau mai lau faigamalaga i fanua, o lea o le a lafo atu ai le faaaloalo e te tatalo faaii e faamanuia le tatou po.

Na tolopo Taulumaga a le Fono Aoao i le itula e 11:02 i le po seia aulia le itula e 9:00 i le taeao o le Aso Tofi, 20 Mati 2014.

